

Genesis Arrpmernenty-they

Akngeyel alker-then ahern-then ingkerrenh arrpmernekk

¹ Awank-akerr, Akngeyel alker-then ahern-then arrpmernekk. ² Kwaty alayelant ahern ingkerrenh artenh. Ingwemerntarl ingkerrenhangkwarr aynten. Akngeyel awer ilkwa tyarlewek. Akngey-kenh Itnweng rtnen.

³ Akngey angkek, “Arrtyernerl-aynta!” Rap arrtyernenhey-alhek-anem. ⁴ Akngeyel arek mwerr arrtyernenhey-alhek. Akngeyel ingwethen arltethen amentant-atherr arrpmernekk. ⁵ Akngeyel itnewek “Arlta.” Kel ra akethirrenhekk. Ingwer Akngeyel itnewek “Ingwa.” Arlta arrwekel anyent ikwerel, atwerrpirrenhekk. Ingwemernt-anem irrek. Ingwel-anem. Ikwer-they angkep arrpemarl ra akethirrenhey-alhek.

⁶ Akngey angkek, alker ampep-warl arrkngert rnkernetyek, kwaty alay amentant-atherrileyek. Kel alakenh-anyem. ⁷ Kwaty ingwer irrwerl, kwaty ingwer kwaty kweneng. ⁸ Akngeyel arrkngert renh itnewek “Alker.” Ikwer-they angkep arrpemarl ra akethirrenhey-alhek. Ingwirrek arrpemarl. Arlta 2 ikwerel, kel ingwepenh-anem irrenhekk.

⁹ Akngey angkek ahern-then kwaty alay-then amentant atherrileyek, ahern artwerretyirreykety. Kel ahern aremirrek. ¹⁰ Akngeyel itnewek

ahern-then kwaty alay-then. Akngeyel arek rarl mwerr-angkwarr arrpmernek.

¹¹ Akngey angkek atherrk-then arwerl amern-akert-then atherrk ntang-akert-rnem-then rnker-netyek. Kel alakenh-anyem. ¹² Arwerl ingwerek-ingwer-then ntang ingwerek-ingwer-then Akngeyel arrpmernek. Akngeyel arek ingkerrenh-angkwarr, rarl mwerr-angkwarr arrpmernek. ¹³ Ingwirrek arrpemarl. Arlta 3 ikwerel, kel ingwepenh-anem irrenhek.

¹⁴ Akngey angkek “Ingkenyel arrtyernetyek arltel, ingwel arrtyernetyek alkentel.” Arltethen ingwethen amentant-atherr ra anthek. Ratherr aherrety-then alyangkw-then ament-atherr arrpemarl ra anthek, rernem iterl-arayntetyek ilenger rernem akarrirettyek. ¹⁵⁻¹⁶ Akngeyel arrernek atherrap-antey, ikngwer arrernek ra artewentyel arrtyerney-angker arltel. Akngeyel antyarr akngerr arrernek. ¹⁷⁻¹⁸ Alkent ra arrernek alyeparl arrtyernetyek ingwel. Alkent-then ingkeny-then ra arrernek, ingwethen arltethen akngaketyek. Akngeyel arek ingkerrenh-angkwarr, rarl mwerr-angkwarr arrpmernek. ¹⁹ Ingwirrek arrpemarl. Arlta 4 ikwerel, kel ingwepenh-anem irrenhek.

²⁰ Akngey angkek kwaty alayek, atnwenth ingwerek-ingwer ikwerel anayntetyek. Rap angkek thip ingwerek-ingwer alkerel alhayntetyek. ²¹ Akngeyel arrpmernek kwaty-areny ingwerek-ingwer kwaty alay kwenel anayntetyek, akely-rnem-then, ilkwernem-then. Akngeyel arrpmernek thip ingwerek-ingwer

alkerel alhayntetyek. Akngeyel arek ingkerrenh, rarl ingkerrenh mwerr-angkwarr arrpmernek.

²² Akngeyel renh-rnem ilek, “Akngerram-akngerrirretyek, arlperrtyirremel kwaty alay-angkwarr ingwer-rneman alker-angkwarr ingwer-rneman.” ²³ Ingwirrek arrpemarl. Kel ingwepenh-anem irrenhek, arlta 5 ikwerel.

²⁴ Akngey angkek, “Ahern ikwer-penh atnwenth ingwerek-ingwer akngerrirretyek, ateralth-rnem-then, mwerr-rnem-then, ahernel alheyel-rnem-then.” Kel alakenh-anyem.

²⁵ Akngeyel atnwenth ingwerek-ingwer arrpmernek, atnwenth ateralth ingwerek-ingwer, atnwenth mwerr ingwerek-ingwer, ahernel alheyel ingwerek-ingwer. Akngeyel arek ingkerrenh, rarl ingkerrenh mwerr-angkwarr arrpmernek. ²⁶ Akngey angkek, “Ahern-areny arrpmerneyek rernem anetyek anwantherr-apeny, rernem Atyetyart anetyek kwaty-areny ingkerrenhek, thip ingkerrenhek, atnwenth ingkerrenhek, atnwenth mwerr-rnemek-then, atnwenth ateralth-rnemek, ahernel alheyel-rnem-then.”

²⁷ Akngeyel arrpmernek artwethen arelh-then, ratherr rapeny anetyek. ²⁸ Akngeyel ahern-areny ilek akngerrirretyek, ahern ingkerrenh-angkwarr, apmer arrpanenhel. “Arrantherr atyetyart anetyek, ahern ingkerrenhek, irrpeng ingkerrenhek, thip ingkerrenhek, atnwenth ingkerrenhek.”

²⁹ Ikwer-penh Akngeyel renh-rnem ilek, “Atha arrenhantherr anthem, amern-rnem-then arwerl ntang-akert-rnem-then, arrantherr arlk-

wetyek. ³⁰ Atnwenth ahern-areny-rnem-then, thip alker-areny-rnem-then, ahernel alheyel-rnem-then. Ahern-areny ingkerrenhek, atha amern-rnem-then atherrk-rnem-then anthem.” ³¹ Akngeyel ingkerrenh arek, rarl mwerr-angkwarr arrpmernek.

2

Arlta 7-el Akngey ltyerrekk

¹ Alker-then ahern-then ingkerrenh anenh.

² Arlta 7 ikwerel-antey Akngeyel warrk ik-werenh ywerrelhilek. Ltyerrekk-anem. Ra ipmelhek-anem. ³ Akngeyel arlta 7 anyentan akngakek ltyerrey-angker, impenan arlta ikwerel ra ltyerrenh.

⁴ Alakenh-anyem Akngeyel alker-then ahern-then ingkerrenh arrpmernek.

Eden apmer arrwekeleny

⁵ Lyertenyenp, alker-then, ahern-then Akngey INGKART ra arrpmernek-penh arwerl-weny, atherrk-weny. Kwaty ra thweney-angenh-antey ahern-warl, ingwer aney-angenh-kety amern lyapelheletyek. ⁶ Kwaty apeynt lherrparnpenn ahern-they. Ahern-anem ra apelyilek.

⁷ Akngey INGKARTel ahern-anem inek, artwa anyent-anem mpwarek ahern-penh. Ra ahern-areny renh itethilek-anem, pewilemel. Awer-anem anthek. Ahern-areny ra itethirrek-anem, weyangkemel. Iteth-anem irrek ra.

⁸ Akngey INGKARTel akngerrakw-ampenyek arwerl ilek-ilek-anem rnkernek, apmer itnan Eden. Artwa renh-anem ra arrernek apmer

ikwer-itwek. ⁹ Arwerl ilek-ilek rnkernek ra, arwerl lyapelemel, amern-akert-rnem-then. Arwerl atherr apmer ampep-itwek lyapek.

¹⁰ Arwerl ingweran mwerr itethiley-angkerarl, arwerl ingweran akalty-anthey-angker. Amern ntwa arlkwenty arwerl ikwer-penh nga apmwek-then mwerrek-then akaltyirrem, atherr-angkwarr-antey. Apmer Eden-they kwaty atnyerr ankalhenh, arwerl-rnem atherrkenyilayntetyek. Lher anyent-they ra irrpety-anem irrek, irlkwenty-anem. ...

¹⁵ Akngey INGKARTel artwanem amern-angketyarr ikwer-itwek arrernek, ra arntarnt-arayntetyek. ¹⁶ Akngey INGKARTel renh ilek, “Arwerl ingwer-rnem-itwek ntwa arlkwayntetyek. ¹⁷ Arwerl ingwer apmwek-then mwerrek-then akaltyirreyel, menty arlkwey-angenh. Ntwa arwerl yanh-penh arlkwentyan, nga arlta ikwerel-antey ilwem.”

¹⁸ Akngey INGKART angkek, “Ahern-areny anyent anerl-anekerr, atha ilkwatherr ikwer mpwarey.”

¹⁹ Akngey INGKARTel ahern-anem inek arrpemarl, ra atnwenth ilek-ilek, thip ilek-ilek-anem mpwarek ahern-penh. Ra artwewarl akngetyek, ra itna renh-rnem itnewetyek.

²⁰ Ahern-areny ranem itneweynek atnwenth ateralth-rnem-then, mwerr-rnem-then, thip-rnem-then, ingkerrenh-antey. Alakenh-anyem ahern-arenyel itnewek-penh itnakert ingkerr-anem rernem anek. Ahern-areny ament-areny ilkwatherr-weny anenh, atnwenth rernem ament anenh arrpemarl, ingwer-lkwer.

²¹⁻²² Akngey INGKARTel ahern-areny renh ankwayntetyek athenek. Artwa ra apelp-anem ayntek. Artwa ikwer-penh ngkerraly anyent ra inek. Renh ampwerrkileynek, ra arelh-anem ikwer mpwarek ilkwatherr, ngkerraly anyent-penh. Akngey INGKARTel arelh renh atnwenhek artwa ikwer-warl. ²³ Ra arek-penh arelh renh, ra angkek, “Nhenh atyeng-apenyarl, nhenh arlka atyeng-penh, ngkwern atyeng-penh arnwarnekarl. Atha renh itnewem ‘arelh’, ra atyeng-penh artwepenh arnwarnekarl wenh!”

²⁴ Aleyarl alakenh aynteyel ra. Artwa anyentel aynikw-then amikw-then iwerl-alhem. Ra arelh ikwer-itwek itengirrem, anyent-apenyantey ratherr aynteyel. Alakenh-anyem Akngey INGKARTel arrerneke.

²⁵ Arrwekeleny ratherr arnkeweweny anenh, nyerrirrey-angenh-antey.

3

Artwethen arelh-then apmwelheleyel

¹ Rtnwem anyent anenh Akngey INGKARTelarл arnwarnek, irrtywerremel apmwangkwarr ileyangker. Apmwarlap ran atnwendh ingkerrenhangkwarr. Arlta anyentel ra alhek arelh-warl. Ra ayernek, “Mpwelenhanth apek ilek Akngeyel, arwerl anyent-penh mpwelanth amern arlkwey-angenharl wenh, mentyarl aretyek?”

² Arelh ra angkek, “Akngeyel ilek, ‘Arwerl ingwer-rnem-penhant arlkwetyek.’ ³ Arwerl

anyent-penh nthakenh mpwelanth amern akey-angenh amern-angketyarr ampep-itwek. Mpwelanth arwerl ikwer-penh arlkwenty, mpwelanth ilwemarl.’”

⁴ Rtnwem ra irrtiyerremel ilek, “Mpwelanth nthakenh ilwey-angenh arwerl ikwer-penh amern arlkwenty. ⁵ Akngey akalty, arlta ikwerel mpwelanth amern arlkwenty, Akngey rapeny mpwelanth anem, akalty-anem, apmwangkwarr-then mwerr-angkwarr-then.”

⁶ Arelh ra amern renh arek. Amern ra mwerr-angker innga. Ra ilkelhenh, amern arlkwenty-penh Akngey rapeny akalty-anem anetyek. Amern renh akek, arlkwemel-anem. Arelh ra artwanem anthek, ratherr atherrel-antey arlkwek amern renh. ⁷ Ratherr iterl-arek ratherr-arl Akngeyek awelhey-angenh. Angath-antey ratherr apmwelhelekan. Ratherr iterl-arelhek-anem, ratherr arnkeweweny-anem anenh. Arwerl tywerrk aylpepenh ratherr arnkwa atanthenh pweytilemel, aylpemel-anem. Artelhenh-anem ratherr.

⁸ Ikwer-penhan alherrp ratherr awek, amern-angketyarr ikwer-itwek Akngeyarl alhenh. Ratherr aterirremel arwerlel arlengkewelhek Akngey ikwerety. ⁹ Akngey INGKART artwa ikwer arlek, “Nthenh-angkwarr nga?”

¹⁰ Artwel renh ilek, “Ayeng arnkeweweny arlengkewelhek ngkwengety, nyerr-anem irrek.”

¹¹ Akngey INGKART angkek, “Nthakenh mpwelanth iterl-arelhek, mpwelanth arnkeweweny anenhan? Ntwa amern-angketyarr ampep-itwek arwerl anyent-penh arlkwek apek?”

¹² Artwa ra angkek, “Arelhel amern akek, rap ayenh-anem anthelek, athanem arlkwetyek, arelh yanhel ntwarl ayenh anthekarl.”

¹³ Akngey INGKARTel arelh renh ayernek, “Arwerl ilek-penh ntwa arlkwek?” Arelh ra angkek, “Rtnwemel ayenh irrtiywerl-ampernek wenh! Ikwer-penh atharl arlkwek.”

¹⁴ Akngey INGKARTel rtnwem renh ilek, Ntwa arelh renh irrtiywerl-ampernek-penh, nga atner-tel artnerrerl-apem ahern-penh arlkwerl-aperlanem. Atha ngenh anyent apmwewarlilem intem-antey.

¹⁵ “Arelh nhayman ngkwengety arlkarirrem. Arelh-kenh-rnem-then ngkwenh-rnem-then ilkelhey-angenh intem anayntem. Arelh-kenhel-rnem ngenh akapwert atwayntem, ngkwenh-rnemel ingkan tnhwayntem.”

¹⁶ Akngey INGKARTel arelh renh ilek, “Nga ampakert rlterrk anayntem. Nga artwa ngkwen-hek aleth ilkelh-ayntem. Artwa Atyetyart-anem ngkwenh anayntem.”

¹⁷ Akngey INGKARTel artwa renh ilek, Nga arelh ilenhek awelhek, ntwa amern-anem arlkwek. Atha weth ngenh artwerilek arwerl ilenh-penh amern ntwa arlkwekerr. Nga atyeng awelhey-angenh. Ahern yanh apmwanem, amern rnkernayntetyekan. Nga warrkirretyek artewentyel amern intwelheleyek, nga ilwetyek-atwety. ¹⁸ Atherrk apmwethen intwayntem. Ntwa amern-angketyarr ikwer-penh amern arlkwey-angenh.

¹⁹ “Ntwa artewentyel warrkirretyek amern ngkwenhek. Nga ahernirreyenh ilwenty-penh.

Ahern-penh atha ngenh arnwarnek. Nga angkep ahern arrpemarl irreyenh. Ngan ahern arwarl.”

²⁰ Adam-el arelh ikwerenrh itnewek Eve.

²¹ Akngey INGKARTel arnkwanem ikwer-atherr mpwarek, atnwenth yep-penh.

²² Akngey INGKARTel ilek, “Ratherr iterl-areyel apmwangkwarr-then mwerr-angkwarr-then, atharl iterl-areyel-apeny. Amern-angketyarr yanh-they ratherr alpetyekant-anem. Ratherr arwerl yanh itethiley-angker-penh ratherr arlkwey-angenh anetyek. Ratherr arlkwenty-penh, ratherr intem-antey iteth anekerr.”
²³ Akngey INGKARTel renh-atherr aketh-warlanem irrentek, apmer ingwer-warlanem ratherr alpek.

²⁴ Aympelh-akert-rnem akngerrakw-ampenyek arrnkngert rnkernek arwerl ikwerety. Nayp arlpenty Akngeyel rnkernek, ikwer-atherr-itwek. Nayp arlpentyel ampep-they arrtyernenh. Aympelh-akert rernem akwerrelant arrkngert rtnek, ratherr angkep alpekerr, arwerl ikwer-itwek arlkwekerr, amern-angketyarr ampep-itwek, ratherr intem iteth anekerr.

4

Cain atherr; Abel atherr

¹ Adam-then Eve-then ratherr awey akely atnyenek. Avey akely ikwerenrh itnan Cain. Eve angkek, “Atha renh itnewey Cain, INGKARTelar� awey akely ayenh anthek.” Itna Cain angka ikwerenrh-angkwarr aynteyel, “INGKARTel ampa anthek INGKART-they renh inek.” ² Ikwer-penhan, Eve ra awey ingwer-anemarl atnyenek.

Amelikw renh itnewek Abel. Ratherr ilkwerrek-anem. Abel yep-yep arntarnt-arenh-arenh, Cain ran amern atherrkarl ingwerek-ingwer lyapelhe-lenh. ³ Ingwer-ingeran Cain ra amern INGKART-anemarl tyenkerr anthek. ⁴ Abel ra yep-yep akwerrk atwemel, INGKART ra tyenkerr anthek arrpemarl. Yep-yep akwerrk lyertenyankarl atnyenek. Abel-el aker atwek, ra INGKART renh tyenkerr anthetyek. Aker ikwer-penh ra tyelk mwerr-rnemant rlwanemel INGKART renh tyenkerr anthetyek, mpwerrkenty anter-akngerr. INGKART Abel ikwerant inkwerelhek, renharl ra tyenkerr anthekek. ⁵ Cain-ekan ra inkwerelheyangarl. Cain ra artwerrety-anem anenh, ahelirremel.

⁶ INGKARTel Cain renh ilek, “Ilekek ngarl aneyel artwerretyan? ⁷ Ntwarl ayenh tyenkerr arraty-angkwarr anthek-penh, ngarl irrkngerney-anem anetyek. Ngarl mwerr-angkwarr anem, ngap irrkngerneyarl aneman. Ngarl mwerr-angkwarr anem, ngap irrkngerneyarl aneman.” INGKARTel renh ilek, “Ngap apmwelhelekerr, nga mwantyel iterretyek.”

⁸ Cain-el ayteyikw ikwerenh irrtyelherl-alhek, “Mpa, ayla awangk alhey arrkent, peleyn ilkwewarl.” Irrtyelherl-alhek ratherr arrkent alhetyek-arrpantey irrtywerremel, renh ra at-nwenhek akwerr-warl, ra atwey-alhetyek renh. Cain-el renh atwek, ipmek-antey.

⁹ INGKARTel Cain renh ayernek, “Abel-alew? Ayteyengkw ngkwenh-alew?” Cain-el renh irrtywerremel tyernek, “Inpa, ayeng arlarl.”

¹⁰ INGKARTel renh ilek, “Ntwa atwek ayteyengkw ngkwenh. Arrknga thelhelek ikwer-they ahern-warl. Atha ngenh apmer nhethay irrentem, ntwarl ayteyengkw atwek, rarl arrknga thelhelek apmer nhel. ¹¹ Ahern nhakan amernan nthakenh ntwa intwelheleyang-anemarl. Arrkngarl ayteyikw thelhelek-kety.” ¹² INGKARTel renh ilek, “Nhenhekan amern atherrk intwelheley-angenh. Apmer nhelan nga aney-angenh-anemarl arrangkw. Nga alhaytant-anem.”

¹³⁻¹⁴ Cain-el renh ilek, “Ntwa atyeng angka awerr arrernek. Apmer nhetheyarl apmer ingwerel-anem ayeng anayntem. Apmer-wenyengarl ayenh ingwerentyel atwetyek alhewer, mentyan.”

¹⁵ INGKARTel renh ilek, “Ingwerel ngenh attwenty, atha renh arntety anthem. Ingwerel ngenh atwekerr, atha ngkweng-warl impaty arrernem.” ¹⁶ Apmer Nod-warl ra alpek, Eden-they akngerrakw. Cain aney-alpek intem-antey INGKART ikwerety, angkepirreyang arrangkw, ikwerenh-rnem-warl. Ingwer-kenh apmer-itwek aney-alpek. ...

6

⁵ ... Akngeyel arek, apmwangkwarr ahern-areny ingkerrenh anenh. Rernem apmwangkwarrant iterrenh. ⁶⁻⁷ Ra iterrek renh-rnem ingkerrenh ywerrelhilemel atwetyek, atnwenth-rnem-then, thip-rnem-then, ahernel alheyel-rnem-then. Artwa apmwangkwarrarl aneyel-rnem-then ingkerrenh ywerrelhiletyek. “Atha

renh-rnem mpwarey-angenh, atyeng awelhey-angenh-rneman. Ra iterrenh, apmwel renh-rnem mpwarekerr.” ⁸ Akngey inkwerelhek artwa Noah ikwer, rarl ikwer inkwerelhemel awelhek rarl renh ilekek.

⁹⁻¹⁰ Noah ra anyentant mwerran Akngey ikwer awelhek. Alerikw irrpety ikwerenh-rnem itnan ikwer-rnem-kenh Shem, Ham, Japheth.

¹¹⁻¹² Akngeyel ingkerrenh iterl-arek, rernemarl apmwangkwarr anenh. ¹³ Akngeyel Noah renh ilek, “Ahern nhel artwa ingkerrenh ahelant atwerreyel, mwerr aney-angenh. Atha ahern-areny ingkerrenh irrarlkeyenh ahern nhek. ¹⁴ Arwerl mwerr-angker arterna, ntwa rtnwa arnwarnetyek warl-akert. Warl arnwarnetyek amentew-ament rwem-akert. Ankerel aperna kwen-then akwerr-ampeny-then. ¹⁵ Arlpenty innga mpwara 130 metres-ek-atwety. Arlpaw innga mpwara, 25 metres-ek-atwety. Irrwerl innga mpwara, 15 metres-ek-atwety. ¹⁶ Arwerl ilperr-ilperr-rnemarl irrwerlengan arrerna! Anker-anem aperneyna kwaty aylpekerran. Altywerarl ntwa arrernetyek arriwan ampepekan. Iwerr ingwer-ampenyek arrerna aylpenhey-alhayntetyek. Rwem irrpety irrwerl-akert mpwara!

¹⁷ Atharl kwaty ilkwa tyarlewem-kety, ahern-areny ingkerrenh irrarlketyek. ¹⁸ Atha ngenh innga ileyel, nga, anew ngwenh, alerengkw ngkwenh-rnem, ampengkw-rnem-then arrantherr rtnwa ilenhel arrantherr iteth anetyek, kwaty-kety. Ingkerrenh aker-rnem tywena, atnwenth-rnem-then, thip-rnem-then, ahernel

alheyel-rnem-then. **19-20** Atnwenth amarl-rnem-then irrwey-rnem-then anewart-anewart akngakeyna, rtnwearl tywenemel. **21** Amern akngerr-antey arrerna ikwer-rnem ngkweng-then. Ayeng ilkelheyel rernem iteth intem-antey anetyek.”

22 Noah Akngeyek awelhek, rarl renh ilanthek.

7

1-18 INGKARTel Noah renh ilek, “Rtnwearl aylpa, ngkwenh-rnem-akert. Atha ngenh iterl-areyelarl, mwerrarl ngan atyeng awelheyel.” Kel arlta ikwerel-antey Noah-rnem rtnwearl aylpenhek, Shem, Ham, Japheth. Ingkerenh-antey rernem aylpenhek rtnwa ikwer-warl, anewikw-rnem-anem alerikw-rnem-anem. Noah ikwerenh-rnem-akert aylpenhek rtnwa kwen-warl. Aker ahern-areny ingwerek-ingwer rernem akwernek rtnwearl, atnwenth ateralth-rnem-then ingkerreh, thip-rnem-then akwernek rtnwa ilkwa ikwer-warl. Anewart-anewart irrwey-rnem-then amarl-rnem-then ingwerek-ingwer atherrarl-atherrarl akwernek rtnwa kwen-warl, Akngeyelarl renh-rnem ilanthek. Ingkerrenharl ahern-areny renh-rnem tywenek. INGKARTel rtnwa arriw ikwer-rnemep akentek. Kwaty apeynt ikwer-they irrwerl-anem irrwerl-anem lherrparnpek kwen-they. Akngeyel alker renh altywerilek. Kwaty thelhelek alker-they, arlta 40-ek-atwety, ingwa 40-ek-atwety. Kwaty rntwek arlta arrpanenhel. Kwatyan kwen innganem.

Kwaty atnyerrel rtnwa ilkwa irrwerlilek, irrwerl-anem irrwerl-anem. Apwert ingkerrenh kwatyel kwenek. Kwatyel rtnwa irrwerlilek ikwer-rnemeñp. Ahern-areny ingkerrenh kwatyel ilwerl-athenek. Apmer arrpanenhel anenh-rnem, atnyerrel ingkerrenh ilwerl-athenek. Akngeyel ingkerrenh apmer arrpanenhek irralkek ingkerrenh kwaty atnyerrel. Irrpetyap rtnwa ilkwelarl anek-rnem rernemanit iteth anenh. Noah rant ikwerenh-rnem-akert iteth anek. Kwaty rtnenah aleth arla 150-ek-atwety, arla arrpanenhel. ...

8

¹ Akngey ra iterl-antey-areyel, iyelpelerlewyang New-rnem-then atnwenth-rnem-then. Akngeyel awer tyarlewek. Kwatyarl akelyirreynek ahern ingkerrenh artwerretyiletyek. Kel alakenh-anyem Akngeyel awer thwenek. ² Akngeyel arrkngert arrerneñk, kwaty ahern-they thelhelenhek. Akngeyel kwaty apeynt ywerrelhilek. Akngeyel kwaty alker-areny ywerrelhilek arrpemarl. ³ Arla 150-penh kwaty akelyant-anem ahernel rtnenah. Alkent 5-ek-atwety kwaty ra akely-anem irreynenah. ⁴ Kwatyarl atnyerr ywerrekel, rtnwa ilkwa ra Ararat apwertel-anem arrernelhey-alpek. ⁵ Alkent 10-penh apwert ingkerrenhan akethel-anem arem-anemirrek. Alkent 10-ek-atwetyarl rtnek-penh kwaty akelyirrek.

⁶⁻⁷ Alkent anyent-penh Noah-el iwerr tyet altywerilek, ra aretyek. Noah-el thip anyent

irrpwerl angerl thwenek. Noah arntarnt-arelhenh thip ikwer ra apey-alpentyek. Ahern artwerretyirreyek-atwety thip alkerel-antey alhenh. Alkerel-antey ra amperelenh, kwaty-antey ra arenh. ⁸ Kwaty ywerreynentyek Noah ra thwenek thip pwelker-anem, kwaty ywerreynentyek ra aretyek. Thip anyent ra arrernelhetykan ikwer arrangkwarl. ⁹ Kwatyantarlar ayntek. Ra apey-alpek arrpemarl, rtnwa ilkwa ikwer-warl. Noah-el thip anyent renh anterrkwey-ayntek, kwen arrpemarl akwernemel rtnwa ilkwa ikwer-warl.

¹⁰ Arlta 7-penh, Noah-el pwelker anyent renh arrpemarl thwenek. ¹¹ Thip ra apey-alpek atwerrp, alperr anyent-akert-anem. Noah ra arek kwatyarl ywerr-anemirrek. ¹² Arlta 7-penh pwelker renh thwenek arrpemarl, ra arlta ikwerel apey-alpeyang ywerrey-alhek. ¹³ Noah-el iwerr altywerilek-anem, rtnwa ilkwa renh ahern artwerretyirrenty aretyek. Ra arek ahernan atwerrety-anem. Noah-el arek kwatyarl kel-anem ywerreyneyel. ¹⁴ Alkent atherr-penh ahernan ingkerrenh-angkwarr artwerrety-anem.

¹⁵⁻¹⁶ Akgneyel Noah renh ilek, “Ngan ngkwenh-rnem-akert tyerr-anemelha, rtnwa ilkwa ilenh-theyan. ¹⁷ Atnwenth ilenh-rnem-then thip-rnem-then ahern alheyel-rnem-then ingkerrenh tyarlewa rernem akngerr arrpemarl irretyek ahern nhel.”

¹⁸ Noah rernem-tangkwel atwarrek rtnwa ilkwa ikwer-they. ¹⁹ Atnwenth ingwerek-ingwer ingkerrenh atwarrek rtnwa ilkwa ikwer-they, amentew-ament.

20 Noah-el apwert ilperr-ilperr arrernek, aker ampernetyek. Noah-el tyenkerr INGKART renh anthek, kwenirremel angkek. **21** Akngeyel aker intenek mwerr-angker ikwakert. Rernemarl apmwel-areth aneylek, ampa akely-penh, atha ahern apmweley-angenh-anem. Akngeyel renh ilek, “Atha ahern-areny-rnem nthakenh atwey-angenh weth atha atwek-apeny, menty-anem. Anyent-inger-antey athan irrarlkek. Akely-penh apmwangkwarr alkenhirreyelan, awaretyel.

22 Atha ahern-areny ingkerrenh atwey-angenh-anem. Ahern nhenh intem-antey aynsteyenh. Rernem amern lyapelheletyek, amern akwetyetyek. Ahern nhenh ywerrey-angenh arltel, ingwel, aherretyel, alyangkwel ywerrey-angenh. Ahern nhenh aherretyel ywerrey-angenh, ahern nhenh ingwel ywerrey-angenh. Ahern nhenh intem aneyenh ahern nhenh ywerreyek-atwety.”

9

Akngeyel Noah renh ileyel, rarl atnyerr ilkwel atwey-angenh ywerrelhilemel aleth-antey

1 Akngeyel Noah renh ilek, alerikw ikwerenh-rnem-akert, “Ampa akngerr atnyena ahern nhel, thip-rnem-then, ahernel alheyel-rnem-then, aker irrpeng-then. Ahern nhel akngerrirretyek ampa akngerr anetyek. **2** Atnwenth ingkerr arrekan-therrety ater irrayntem aneyenh, ahern nhel. Nga ingkerrenhek Atyetyart aneyenh. Atha

ngenh arrernem Atyetyart nga anetyek, ahern-areny ingkerrenhek. ³ Aker ntwa alhewer arlk-wetyek, ingwerek-ingwer. Atha ngenh atnwenth ingkerrenh anthem, ntwa arlkwayntetyek. Kel, atha ngenh anthek amern ntwa arlkwayntetyek.

⁴ Aker menty, arrkngewenyirremel ayntey. Iteth-antey, ra arrkngakert-anteyarl atnwenth ran. Nthakenh arrngeynp arlkwey-angenh. Ar rknga thela ahern-warl, artwerretyilemel, aker arlkwey-alenty. ⁵ Atnwenthel artwa anyent ipmek attwenty, artwa ingwerel ipmek arrpemarl atnwenth renh atwetyek. Artwa anyentel artwa ingwer ipmek attwenty, ipmek arrpemarl atwetyek.

⁶ Artwa ingwerel atwem, angkep renh atwenhey arrpem. Atha ahern-areny ingkerrenh arrpmernek, atyeng-apeny ingkerrenh anetyek. ⁷ Ntwa akngerr-anem ahern nhel ngkwenh-rnem atnyena! Artwa akngerr ntwa anetyek, ahern nhel artwa akngerrirretyek.”

⁸ Akngeyel Noah ikwerenh-rnem-akert ilek, ⁹⁻¹¹ “Atha arrenhantherr ilem, Nhepenh-anyeman kwaty arrekantherr-warl atha tyarlewyang-anem, menty. Kel anyent-inger atha kwaty ilkwan tyarlewek, ingkerrenh atwetyek, ingkerrenh ahern nhек irrarlketyek. ¹²⁻¹³ Mpwelarr ilkwa alkerek atha arrekantherr arrernem. Mpwelarr arrantherr alker-itwek aremel, arrantherr iterl-aretyek wetharl atha arrenhantherr ilek-angkwarr. ¹⁴ Kwaty kwenpayel mpwelarr aremirrenty atha iterl-aremel atharl weth arrekantherr ilek-angkwarr.

¹⁵ Nthakenh atha atnyerr ilkwel atwey-angenh ywerrelhilemel aleth-antey. Yanh-angkwarr atha ilek, nthakenh atwey-angenh. ¹⁶ Atharl arem mpwelarr alker-itwel aremirrenty, atha iterl-aremarl atharl weth arrenhantherr ilerlelpék-angkwarr.

¹⁷ Mpwelarr lwewarrernelheyel alkerel ap-melerrarl atharl weth ilerl-alpek-angkwarr, arrantherr iterl-aretyek. Ilenh atyetyart impen anwantherr iterl-aretyek.” ...

11

Akngeyel angka ingwerek-ingwer ipertileyel

¹ Awank-akerr, ahern-areny-rnem angka anyentelant angkerrenh. ² Ikwer-theyan ingwer-rnem apmer Babylon akngerrakw-ampeny-warl alpek. Rernem ingkerrenh alperlewek akngerrakw, peleyn ilkwewarl, apmer Shinar-arrangarr-warl. Apmer-anem rernem arrernekk. ³⁻⁴ Rernem angkerrenh, “Tern ilkwa mpwaretyek, warl arrpanenh, warl arlpenty-then anwantherr mpwarey alker-warl-athek, alkerek-atwety. Apwert-weny anwantherr mpwarey bricks-elant, ankerelant anyentelhilem anterrkwetyek bricks renh. Ingkerrenhel anwenhantherr iterl-aretyek apmer anyentek. Anwantherr apmer arrpanenh-warl nthakenh arlpimperrey-angenh. Anwantherr arlperryirreyang anetyek, apmer anyent ikwerel.”

⁵ Akngeyel tawen renh aretyek apetyek rerne-marl arnwarnenh. ⁶ Ra ilek, “Nher nem war-kirreyel rernem arl angka anyentel angkerreyel. Rernem arlkwententyelan, ilek-ilek mpwarerl-anekerr. Rernem tnakelheyel rernem arl ilkwa artek-penh. ⁷ Atha renh-rnem angka amentew-ament-anem iley, rernem awerrey-angnenh-antey ingkerr anayntetyek.”

⁸⁻⁹ Angka anyentarl angkerrenh-penh Akngeyel renh-rnem angka ilpertelhilek ingkerrenh. Angka ingwerek-ingwer-anem rernem angkerrenh. Rernem menty-anem ipmek, warrkirreyang-anem. Rernem arlperrtyirremel alpek apmer arrpanenh-warl, aney-alpek. ...

Abraham-kenh aynikw

²⁷ Nhenh angka Terah-penh-anem. Terah Abram Nahor-rnem aynikw-rnem anenh. Haran-kenh-rnemek aynikw anek. Haran ra Lot-kenh aynikw anenh. ²⁸ Haran Ur tawen-itwek atnyenek Chaldea-areny-rnem-kenh apmer-itwek. Ra apmer ikwerel-antey ilwek, aynikw ikwerenh Terah iteth anenhel-antey. ²⁹⁻³⁰ Abram-el Sarai anew inek ikwer, Nahor-el Milcah anew ikwer inek. Milcah aytey ikwerenh Iscah anenh, Haran-kenh alerikw. Sarai ampek arrangkw anenh. ³¹ Terah anperl-alhek Ur tawen-they, Canaan ikwer-warl anperl-alhetyek. Ra Abram alerikw ikwerenh akngek, Sarai, amikw ikwerenh, arrengikw ikwerenh, Lot ra akngek arrpemarl. Rernem Haran tawen-el-anem aney-alpek. ³² Terah ra ampwirremel

aherrety 205 anenh. Ikwer-penhan Haran tawen ikwerel-antey ilwek.

12

Akngeyel Abram renh ileyel, apmer ingwer-warl alhetyek

¹ Akngey angkek Abram-warl, “Apmer nhanyem iwerl-alha ngkwenh-rnem-akert, apmer atharl ngkweng iylparrernem-warl alpemel. ² Atha ngenh arntarnt-arayntem apmer ilenhek, akngerr-anem atha ngenh anthem, akngerram-akngerr irretyek. Ingkerrenhel ngenh iterl-arayntem. Ngkwenh-rnem-angkwarr angka atyenh arlpimpirreyenh, apmer arrpanenh-angkwarr, ingkerrenhel ayenh iterl-arayntetyek-awaty. ³ Ingwer-rnem mwerr anayntem ngkweng-itwel, ayeng mwerr arrpemarl ikwer-rnem anayntem. Alakenh-anyem ahern-areny ingkerrenh ngkweng inkwerelhetyek. Ingwer-rnem ngkweng awelhey-angenh, rernemarl apmwangkwarr apenteyenh, atha renh-rnem arntety anthemarl.”

⁴⁻⁵ Abram aherrety 75 anenh, artwa ampwelanem, Akngeyelarl ilek apmer ingwer-warlanem ra alpetyek. Abram Akngeyek awelhek. Anew ikwerenh Sarai ampikw ikwerenh Lot, ampwal ilek-ilek ingkerrenh warrkenh-rnem-then, rernemarl apmer Canaan ikwer-warl alpek.

⁶ Abram ra arwerl ilkwewarl, arwerl arnenty ikwer-warl alhek, ikwerenh-rnem-akert.

Abram arwerl arnenty apmer Moreh ikwer-warl alhek, apmer Shechem-itwek. Canaan-areny-rnem arrwekel-antey apmer ikwer-itwek anenh. ⁷ Akngey Abram ikwer aremirrek. Renh ilek, “Atha ngenh apmer nhenh anthetyek, ngkwenh-rnem-akert intem-antey.” Abram ra apwert ilperr-ilperr-anem arrernek Akngey aker tyenkerr anthetyek inkwerelhemel.

⁸ Abram ra Bethel apmer akngerrakw-ampeny-warl alhek, rap ampepel ayntenhek apmer Ai-arrangarr. Kalikw-anem artek. Ra apwert ilperr-ilperr ingwer-anem arrernek, Akngey ikwer kwenirremel inkwerelhek. ⁹ Ikwer-penhan ra antekerr-anem alhek, apmer arlpaw-ampeny-warl.

Abram alheyel Egypt-warl amern inetyek

¹⁰ Apmer arrpanenh Canaan-ampenyel, amern lyapey-angenh-anem ra arenh, aherrety innaganem. ¹¹⁻¹³ Abram-then Sarai-then Egypt-warl rernem alpek, amern-angketyarr-warl atherrkeny-ampeny-warl. Abram iterremel angkek anew ikwerenh-warl, “Egypt-warl alhenty nga angkwerey atyenh-arrpantey ilelha ingwer-rnemek. Egypt-arenyel inngerr mwerr-angker ngenh arey-ayntenty, ayenharl rernem atwekerr, ngkweng-they angwarekerr.”

¹⁴⁻¹⁵ Rernem Egypt ikwer-warl alhek. Egypt-arenyel renh arek ra mwerr-angker innga. Atyetyart ilkwel-rnem Pharaoh-an ilek Sarai renh. Artwel-rnem Sarai renh akngek Pharaoh-kenh apmer-warl. ¹⁶ Pharaoh rarl iterrek Sarai ikwer Abram-kenh angkwerikwek-athen,

ra Abram renh ingkerrenh anthek, yep-yep-rnem-then, pwelek-rnem-then, tangkey-rnem-then, warrkenh-rnem-then, kamwerl-rnem-then ingkerrenh anthek.

¹⁷ Atyetyart ilkwa rarl Sarai renh apmwangkwarr ikngwey-ayntek-they, INGKARTel Pharaoh-kenh-rnem arntety ilkwanem anthek. ¹⁸⁻¹⁹ Pharaoh-el ingwer ilanthek, Abram renh ikngwetyek, ratherr angkerretyek. Pharaoh ra angkek Abram ikwer-warl, “Ntwa atyeng iley-angenh arraty anew ngkwenh. Kel ineyna apmer nhenh-they alpemel. Apalel anew ngkwenh atha ikngwek.” ²⁰ Pharaoh-el ikwerenh-rnem thweneck, Abram renh artengewetyek, ratherr ampwal-rnem ikwer-atherrenh ingkerrenh akngeynetyek, apmer ingwer-warl alpemel.

13

Abraham Lot ratherr amentant-atherr alheyel

¹ Abram Sarai atherr alhek apmer arlpaw Canaan-ampeny-warl, Lot ra ikwer-atherr-angkwarr alhek arrpemarl. ² Abram ampwal akngerr-akert alhek, pwelek-rnem-then, yep-yep-rnem-then, nanikwet-rnem-then, thilp-then, gold-then.

³ Abram ra apmer arrpanenhel aneynenh, apmer arlpaw antekerr-ampeny-itwek. Ayerrer-anem ra alpek, Bethel tawen-warl. Kalikw-anem rap ampepek artey-alhek, apmer ikweren. Ayntey-alhek tawen Ai-they ampepel, Bethel tawen-they angath. ⁴ Apey-alpek antekerr-they,

ra aynteynek apwert ilperr-ilperr-akert ikwer-itwel, irrkatyel arrpemarl. Ra kalikw akely-anem artek. Ra kwenirremel Akngeyek-anem angkek inkwerelhemel.

⁵ Lot-el akngerr arrpemarl atnyenek, yep-yep-rnem-then, nanikwet-rnem-then, pwelek-rnem-then, warrkenh ikwerenh-rnem-then. ⁶⁻⁷ Apmeran akely inngarl ayntenh atnwenth-rnem-then ingwerek-rnem-then. Atherrkarl atnwenth ingkerrenhel arlkwenh. Abram-kenh warrkenh-rnem-then Lot-kenh warrkenh-rnem-then atnwenth arntarnt-arey-angker-rnem rernem apmer-they ahel-anem ilterrenh.

⁸ Abram angkek Lot-ek, "Aylakan mwarrant-atherrarl anetyek. Aylekakenh-rneman mwarrant-arey arrpemarl anetyek, ilterrey-angenh. Aylak arrer nthakenh ilterrey-angenh. Artwa aylekakenh ilterrey-angenh anetyek. ⁹ Ahern arlpawel nhan! Aylak amentant atherr alhey. Ngarl altwerl alhem-kety, ayengan akngerrakwarl alhey. Ngarl akngerrakw alhem, ayeng altwerlarl alhey."

¹⁰ Ikwer-they, Lot alhek arrwekel-antey. Kwaty akngerr ra arey-alhek Jordan Ilpay-itwek. Aleth-antey ra Ilpay atherrkeny aynteynenh ikwer-angkwarr apmer Zoar-ek-atwety. ¹¹ Jordan Ilpay ingkerrenh ikwertangkwel rlwanek akngerrakw-ampeny. Rarl akngerrakw alhek, Abram amentant atherr ratherr irrek, arlperrtyirremel. ¹²⁻¹³ Abram anek apmer Canaan-ampenyel. Lot alhek tawen Sodom arrerenty, wak-rnem artey-alhek, artwa apmvernem arrerenty-itwek, rernem

INGKARTek irrpelthirrenh. ¹⁴ INGKARTel Abram renh ilek, "Apmer ingkerrenh-angkwarr ara! ¹⁵ Atha ngenh anthey, nga intemantey anayntetyek, apmer arrpanenh ilenhek, ngkwenh-rnem-akert. ¹⁶ Atha ngkwenh-rnem akngerram-akngerrileyen, arrantherr akngerranem ahern nhel anetyek. Ngkwenh-rnem akngerrirreyen ahern akely akngerr aynteyelapeny. ¹⁷ Nga angkepelarreng apmer nhel alhaynta, atharl ngenh anthetyek."

¹⁸ Wak kalikw akely-rnem lhelherl-alhek akngeynemel apmer arwerl arnenty-akert ikwer-itwek aney-alhek apmer Mamre-arrangarr, Hebron-itwek. Apmer ikwer-itwek apwert ilperr-ilperr tyenkerrek-arelh ra arrernek, Akngey ikwer inkwerelhemel kwenirrek.

14

Abram-el Lot renh arntarnt-areyel

⁸ ... Atyetyart tawen ikwer-areny-rnem, Sodom-areny, Gomorrah-areny, Admah-areny, Zeboim-areny, Bela-areny. Rernem atwerrenh Atyetyart ingwer-areny-rnem-then. Atyetyart Chedorlaomer, Elam-areny atyetyart, Tidal, Goim-areny atyetyart. Amraphel, Shinar-areny atyetyart. Arioch, Ellasar-areny atyetyart. Atyetyart 5-pel-ek aherrety 12 anek, ikwer-rnemek. ⁹ Ikwer-penhan rernem ikwer-warlapetyek, rernem atwerretyek. ¹⁰ Atyetyart ingkerrenh akarirrek peleyn ikwer-itwek, itnan

Sidim. Sodom-areny-rnem Gomorrah-areny-rnem-then rernem anyentirrek, artwa ingwer-rnem atwerretyek. Ingwer-rnem rernem Sodom-areny-rnem-then Gomorrah-areny-rnem-then antengilek. Sodom-areny-rnem-then Gomorrah-areny-rnem-then rernem aytnek irrkewarl, anker-angketyarr-warl. Ingwer-rnem anterrek apwert-ampeny-warl. ¹¹ Sodom-then Gomorrah-then-they amern ingkerrenh rernem rakek, ampwal ilek-ilek. ¹² Abram-kenh ampikw-then-antey, Lot anterrkwek, akngeynemel.

¹³ Abram artwa Hebrew anenh arwerl arnenty ikwer-itwek. Arwerl arnenty ran Mamre Amor-areny-kenh. Artwa Mamre Amor-areny. Ayteyikw ikwer-atherrenh anek, itnan ratherr Eschol, Aner. Ratherr mwerr innga anek Abram-ek. ¹⁴ Artwa anyentel Abram renh angkan ilek, rernemarl alerikw ikwerenhanterrkwek, ampwal ikwerenhr-nem-akert. Abram-el artwa ikwerenhr-nem anyentilek. Kel rernem alwernek apmer Dan ikwer-warl, ¹⁵ Abram-el renh-rnem ingkerrenh atwek-penh, ingwer-rnem anterrek apmer Hobah-warl Damascus ikwer-angkwarr aterel. ¹⁶ Abram-el renh-rnem alwernek, apmer Hobah-ek-atwety. Ra alerikw Lot renh ineynek, arelh-rnem-then ampwal ikwerenhr-nem-then.

¹⁷ Abram rarl king ingwer-rnem-then atwek-penhan, ra apey-alpek. Atyetyart Sodom-areny apetyek Abram-warl peleyn Shaveh ikwer-itwek, ratherr angkerretyek. Shaveh ikwerenh itna ingweran arterterr King-kenh.

¹⁸ Atyetyart Salem-arený itnan Melchizedek.

Ra wayn-then amern-then Abram-warl akngetyek. Melchizedek INGKART anenh, Akngey ilkwa ikwer. ¹⁹ Melchizedek angkek, “Akngey atha ayernem, ngenh rlterrkiletyek, rarl alker-then ahern-then arrpmernek. ²⁰ Nga Akngey ikwer inkwerelhey-areny, ntwarl artwa ingkerrenh atwek, rlterrk ikwerenhan-kertel. Ntwa artwa ingkerrenh antengilek.”

Abram-el Melchizedek ampwal ilek-ilek ingkerrenh ikwerenhan-theyel

²¹ Atyetyart Sodom-arenyel Abram renh ilek, “Atyenh-rnem, Sodom-areny-rnem ingkerrenh ipma, apmwal-rnem ntwa akngemel.”

²² Abram-el Atyetyart Sodom-areny renh ilek, “INGKART Akngeyel anyentelarl ahern-then alker-then arrpmernek. ²³ Atha renh arrayt innga ilek, atharl ampwal-rnem nthakenh ineyangenh, ntwa ayenh ingkern ayntarrp-ilekerr, nga atyeng angkekerr, ‘Atharl Abram renh ampwal ingkerrenh anthek.’ Akngeyelant ayenh ampwal ingkerrenh anthek. ²⁴ Amern arlengant anwantherr arlkwey artwa atyenh-rnemelan arlkwekant. Aner Eschol-atherr ampwal akelyrnem inem arrpemarl.”

15

Akngeyel Abram renh alheleyel

¹ Abram-el altyerr arek, INGKARTelarl renh ilek, “Nga aterirreyang anetyek, atha ngenh arntarnt-areyel, ilek-ilek akngerr atha ngenh anthetyek.” ² Abram angkek, “INGKARTay, ntwa ayenh ilek-ilek akngerr anthek. ³ Ntwa ayenh

ampan anthey-angenharl. Ayeng iltwentyel, warrkenh atyenthal ilek-ilek ingkerrenh inem.”

⁴ INGKARTel ilek, “Ntwa alerengkw ngkwenh atnyeneyenh. Warrkenh ngkwenhel nthakenh ingkerrenh iney-angenh. Alerengkw ngkwenhel ingkerrenh atnyeneyenh, nga iltwenty-kety.”

⁵ Akngeyel renh atnwenhek aketh-warl. Ra renh ilek, “Alker-warl itnywena! Antyarr-rnem ntwa areyel? Ntwa count-em-anem renh-rnem ila! Ngkwenh-rnem antyarr ilenh-rnem-apeny akngerrirreyenh.”

⁶ Abram Akngeyek inkwerelhemel awelhek. Akngeyel renh artwa arraty innga arek, rarl Akngeyek awelhenh.

⁷ Akngeyel ilek, “Ayeng Akngey ra, atharl ngenh apmer Ur-they, Chaldea-rnem-kenh apmer-they atnwenhey-alhek, apmer nhenh ngenh anthetyek, ngkwenh-rnem-akert.”

⁸ Abram angkek, “Akngeyay, nthakenh atha iterl-areman apmer yanh atha atnyenetyek?”

⁹ Akngey ra ilek, “Pwelek amarl akely atyeng-warl akngetyay! Nanikwet anyent yep-yep irrwey anyent rwelyarr anyent, pwelker anyent.”

¹⁰ Abram Akngey ikwer awelhek. Aker-rnem aknkek, Akngey renh anthetyek, tyenkerr-anem. Abram-el aker renh-rnem rlweth-rlweth akek, amentew-ament arrernek ahern-warl, pwelker-then rwelyarr-then rlweth-akey-angenh-antey.

¹¹ Irrety-rnem-then inkwel-rnem-then akarrirrek aker-warl. Thip ingwerek-ingwer-then. Rernem aker-warl apetyek. Abram-el renh-rnem irrentek.

¹² Ingkeny aylpenhetyek irrek. Kel ankwanem irrek. Abram artewentyel aterirrek-anem. Ingwel artek. ¹³⁻¹⁴ INGKARTel ilek, “Ngkwenh-rnem ingwer-rnemek warrk antherl-aneynenh, arlkarewerl-aneyen. Ngkwenh-rnem nhak-itwek ingwer-rnemel warrk antherl-aneyn, rernem aleth innga warrkirk-ayntetyek aherrety 400-ek-atwety. Apmer ingwer-areny-rnemel renh-rnem ilpertileyen. Ngkwenh-rnem apmer ingwerel arlengeny-apeny aneyen. Atha apmer ingwer-areny-rnem ingkerrenh arntety antheyen. Atharl apmer renh atwem-kety, rernem apmer-they alpeyenampwal akngerr-akert. ¹⁵ Nga ampwirremel ilweyenh, ngkwenh-rnemel ngenh ikwer-itwel-antey akwernayn, nga artwa ampwanem mwerr aneyen. ¹⁶ Rernem aherrety 400-penh apey-alpeyen, Amor-areny-rnemel apmer nhenh atnyeney-kety.”

¹⁷ Ikwer-penhan ingkeny aylpenhek, ingwemernt-anem irrenhek. Rwalep-then rwa lherrm-then, ampep-itwek aker ampep-angkwarr aremirrenhey-alhek. ¹⁸⁻²⁰ Arlta ikwerel-antey Akngeyel Abram renh alhelek, “Atha ngkwenh-rnem ingkerrenh apmer nhenh antheyen. Egypt lher-they Euphrates lher ilkwa ikwerek-atwety, ingkerrenh-kenh apmerek-artwey. Atha ngkwenh-rnem apmer ingkerrenh-antey ilenh antheyen.” ...

16

Angka Hagar Ishmael atherr-akert

¹⁻³ Sarai, Abram, ratherr anewart ampeweny anenh. Arelh warrkenh anyent ikwerenh, itnan Hagar. Sarai angkek Abram-warl, Akngeyel ayenh menty ilek ampekety. “Warrkenh atyenah ntwa ikngwa, ntwa ampa atnyenetyek.” Alaken-haym Abram ra arelh warrkenh-anem ikngwek. Abram apmer Canaan-itwek aherrety 10 anenh. Abram awelhek, anew ikwerenhelarl renh ilek. Sarai ra warrkenh Egypt-areny ikwerenh Abram renh anthek. ⁴ Abram-anem Hagar-itwek ayntek, ampanem ikwerenh anenh. Ikwer-they Hagar tnakelhenh, ikwer Sarai irrpelthirremel. ⁵ Sarai angkek Abram-warl, “Ntwa atyeng apmwel-areth mpwarek. Atha ngenh warrkenh yanh anthek anew ngkweng ra atyengety arlkariurrekarl. INGKARTel iterl-areyel ntwarl atyeng apmwel-areth mpwarek.” ⁶ Abram angkek, “Warrkenh yhanan ngkwenharl. Ntwarrp kel atnyenetyek. Ayengan arlarl.” Sarai-el Hagar renh ayntarrp-ilek. Irrwernek. Hagar anterrek-anem ikwerety.

⁷⁻⁸ Akngey-kenh angel-el Hagar renh areyalhek apmer arlpaw-itwek kwaty ngenty-itwek, apmer Shur-ampeny-itwek. Angel-el renh ayernek, “Hagar Sarai-kenh warrkenh, nthenh-they nga alpeyel, nthenh-warlay?” Hagar angkek, “Ayeng Sarai ikwerety aterel alpeyel.” ⁹ Angel-el renh ilek, “Sarai-warl alpa, ikwer awelhetyek. ¹⁰ Atha ngenh ngkwenh-rnem akngerr innga antheyenh, ingwerel-rnem nthakenh count-emiley-angenh.”

¹¹ “Ntwa awey akely atnyeneyenh, ntwa renh itnewa Ishmael. ¹² Ra artwa ateralth aneyenh, tangkey saddle-ek akwerrp-apeny. Ra artwa

aneyenh, tangkey ateralth-warl arrernem-apeny. Ra awelhey-angenh ingkerrenhek aneyenh, ingkerrenh ikwer awelhey-angenh arrpemarl. Ra nthakenh ikwer-rnem-itwek aney-angenh, nthakenh ingwerenty-itwek ra aney-angenh.”

¹³ Hagar-el INGKART renh ilek, “Nga atyeng aremirrek.” Ra iterrek, “Atha INGKART arekpenh, ayeng iteth-antey aneyel, ilwey-angenh.”

¹⁴ Alakenh rernem kwaty ngenty renh itneweyel Beer Laha Roi, kwaty ngenty ampepel apmer Kadesh-they apmer Bered-angkwarr aynteyel.

¹⁵⁻¹⁶ Abram-el atherr Hagar-el-atherr avey akely atnyenek, avey ikwerenh itna itnewemel Ishmael. Abram ra aherrety 86 ampwa innga anenh, renharl ratherr atnyenek-penh.

17

Akngeyel Abram renh ilantheyel, avey ikwerenh artwiletyek

¹ Abram ra aherrety 99-anem. Akngey ikwer aremirrek angkemel, “Ayeng Akngey Atyetyart ra. Nga aleth anaynta, arraty innga. ² Abrahamay, atyeng nga awelhetyek. Atha ngenh alhelek-angkwarr, atha alhelem arrpemarl, atha ngkwenh-rnem akngerr innga ileyenh.”

³ Abram ahern-warl inngerr kwenirremel atnertel ilperr-ayntek. ⁴ Akngey angkek ikwer-warl, “Atha ngenh alhelem, nga Atyetyart anetyek, ingkerrenh ngkwenh-rnem ngkweng-they akngerrirreyenh, apmer arrpanenh-areny-rnemek. ⁵ Rernem ngenh itneweyen Abramweny, Abraham-ant-anem. Alakenh-anyem

nga Atyetyart aneyenh apmer arrpanenh-areny-rnemek. ⁶ Atha ngenh akngerr innga antheyenh, ngkwenh ingkerrenh. Rernem apmer arrpanenh-areny aneyenh Atyetyart ilkwernem-then. ⁷⁻⁸ Atha ngenh arntarntarem, atha ngenh alhelek-angkwarr. Atha arrenhantherr apmer Canaan-anem antheyenh, arrantherr apmerek-artwey-wenyarl aneyel, atha arrenhantherr apmer Canaan anthem arrekantherr.” ⁹ Akngey angkek Abraham-warl, “Nga atyeng-angkwarr anayntetyek ngkwenh-rnem-then. ¹⁰⁻¹¹ Arrantherr awey arrekantherrenh artwa mpwaretyek, yanh alhelenty aneyenh, atharl arrenhantherr ilek-angkwarr. ¹² Arlta 8 ikwerel-antey arrantherr awey renh-rnem artwa mpwaretyek, alehang-rnem-then ingkerrenh, rernemarl warl ngkwenhel aneyel-rnem-then. ¹³ Apmer ngkwenh-itwek atnyenek-rnem-then ntwa ingkerrenh artwa mpwaretyek, warrkenh ngkwenh-rnem-then ingkerrenh. ¹⁴ Rernem alakenh-anyem mpwarey-angenh, rernem atyeng irrpelthirrenty, atha renh-rnem ilek-kety. Angka atyenhek awelhey-angenh anenty, atha renh-rnem atwem.”

¹⁵ Akngeyel Abraham renh ilek, “Ntwa anew ngkwenh Sarai itnewey-angenh, ntwa renh Sarah-ant-anem itnewem. ¹⁶ Atha renh arntarntareyel, atha ngkweng aler anthem ikwer-angkwarr. Akngerr ikwer-they akngerrirreyen arrpemarl, apmer arrpanenh-areny Atyetyart-rnem-then.”

¹⁷ Abraham ra ilperr ayntek arrpemarl. Ra

irrpelthirremel atherrek, “Nthakenhan artwa aherrety 100-kenh ampa atnyenetyek? Sarah-el nthakenh ampa atnyeney-angenh aherrety 90-el?” ¹⁸ Abraham-el Akngey renh ayernek, “Ishmael-el-arleng atyenharl?”

¹⁹ Akngeyel renh ilek, “Arrangkw wenh! Anew ngkwenhel Sarah-el awey atnyenem, ntwa renh itneweyen Isaac. Atha renh ingkerrenh alhelem. Atha ngenh awek ngarl perayirrenh Ishmael ikwer. Atha renh arntarnt-areyenh, akngerr ikwer-they irreyenh, apmer arrpanenh-areny-rnem. ²⁰ Ra Atyetyart irreyenh 12 prince ikwer-rnem. Atha renh Atyetyart ilkwa anetyek arrerneyenh, apmer arrpanenhek. ²¹ Atha arraty mpwareyenh, atha alhelek-angkwarr Isaac ikwer-angkwarr, renharl Sarah-el atnyeneyenh, irrkaty-angkwarr aherrety ingwerel.” ²² Ikwer-penh Akngey alpek-anem.

²³ Abraham-el Ishmael, alerikw ikweren, warrkenh ikwerenh-rnem-then, apmer ikwerenh-itwek atnyenekarl-rnem-then. Ra renh-rnem artwilek, Akngeyelarl ilek-angkwarr.

²⁴ Abraham aherrety 99 anenh, artwa ampwanem. ²⁵ Ishmael aherrety 13 anenh, amerrk-antey, rernemarl renh-rnem ingkerrenh-anem artwilek. ²⁶ Abraham-atherr Ishmael-atherr arlt aanyent ikwerel-antey artwirrek.

²⁷ Abraham-kenh artwernem arlt ikwerel-antey artwirrek arrpemarl.

18

Abraham-el artwa irrpety arntarnt-areyel

¹ Akngey aremirrek Abraham ikwer apmer Mamre-itwek, arwerl arnenty ikwer-itwek. Arlta ampep ikwerel Abram kalikw ikwerenrh arriwel anenh. ² Ra arek artwa irrpety rtney-alhenty aketh-itwek.

³ Ra ikwer-rnem-warl anterrekk, renh-rnem rlwatetyek. Ra ahern-warl-athet kwenirrek, angkemel, “Anper alhey-angenh, lytwenty-itwek ltyerrenherr-arey! ⁴ Kwaty atha arrekantherr iney-akenh ingka ahern-penh lhewelhetyek, arrantherr lywel ltyerretylek. ⁵ Amern-then atha arrekantherr iney-akenh alethel arrantherr alpetyek.”

“Ya, kel mwerr,” rernem angkek.

⁶ Abraham wak-warl aylpenhek, Sarah-arl anenh-warl, renh ilek, “Amern arlety irrpety inay, amern rtamp ampernetylek.” ⁷ Ra aker mwerr innga rlwanek, anter-akngerr akely. Abraham-kenh warrkenhel pwelek irrwey akely atwerliwek aker artwa irrpety ikwer-rnemek. ⁸ Abraham-el aker-then milk-then anthek, artwa irrpety renh-rnem. Abraham lywel anenh, rernem amern arlkwenh-kety.

⁹ Rernem ayernek, “Anew ngkwenh Sarah-alew?” Abraham ra angkek, “Kalikw kwenel.” ¹⁰⁻¹¹ Artwa alethang angkek, “Aherrety anyent-penh ayeng apey-alpeyenh Sarah ampa akely atnyeneyenh. Sarah-el-tangkwel ampa atnyeneyenh arrwekel-antey ayeng apey-alpey-alenty.” ¹² Sarah-el angka awek-penh, irrpelthirremel. Sarah atherrek, “Nthakenh

atha ampa atnyenem ampwelam-athen, aylanth atherr-antey ampwa, nthakenh ampa atnyenem.”

¹³ INGKARTel Abraham ilek, “Nthakenhek Sarah angkek atherremel-anem, atyeng irrpelthirreyel? Ayengan INGKARTarl, ampa innga atha anthey-angker! ¹⁴ Aherrety anyentpenh ayeng apey-alpeyenh aherrety ingwer ikwerel-antey. Sarah-el ampa atnyeneyenh arrwekel-antey ayeng apey-alpey-alenty.”

¹⁵ Sarah ra aterirrek, irrtywerremel ilelhek, “Ayeng atherrey-angenh arrangkw.” Artwa alethang ra ilek, “Inngarlap nga atherrek.”

Abraham-el Akngey renh ayerneyel, ra apmer Sodom atwey-angenh menty aretyek

¹⁶ Artwa alethang irrpety rernem apmer Sodom-warl alpek. Abraham ikwer-rnem-angkwarr antelherl-alhek, artengewemel iwerr iylparrernetyek ikwer-rnemek. ¹⁷ INGKART iterrenh, “Abraham atha iley-angenh apmer Sodom-arl atha atwem. ¹⁸ Ikwerenh-rnem akngerrirreyenh apmer arrpanenh-warl arlpartyirreyenh. ¹⁹ Atha Abraham renh arntarnt-arek, ra ikwerenh-rnem akalty-antheyek atyeng-angkwarr, rernem arraty anetyek. Ikwer-penh atha renh-rnem arntarnt-arem, atharl renh-rnem ilek-angkwarr.”

²⁰ INGKARTel Abraham renh ilek, “Atha awek tern atherral artwa apmwangkwarr aneyel. Atha angka ilkwa awek. ²¹ Ayeng alhem, atha renh-rnem aretyek, ntheck-angkwarr rernem aneyel, innga apek, arrangkw apek.”

²² Artwa alethang ratherr anperl-alhek, apmer Sodom ikwer-warl-anem, Abraham INGKART-itwelarl anen. ²³ Abraham-el INGKART renh ayernek, “Artwa apmwernem ntwa attwenty, artwa mwerr-rnem ntwa atwem arrpemarl? Arlernem-alew?” ²⁴ Tern yanh alerl atnyenenty artwa mwerr-rnem 50-akert? ²⁵ Ntwa mwanty arntarnt-aretyek. Ngan INGKART arraty innga, arlernem-then arntarnt-aretyek, tyatyemiley-angenh renh-rnem.”

²⁶ INGKART angkek, “Atha apek artwa mwerr-rnem 50 arentyel, atha apmer Sodom renh ywerrelhilemel atwey-angenh.”

²⁷ Abraham angkek, “Ayengan ahern-arenyarl. Nthakenharl artwa 45 mwerr-rnem arentyian? Ntwa tern ilkwa yanh ywerrelhilemel atwetyek?” ²⁸ INGKART angkek, “Atha apek artwa mwerr-rnem 45 arentyel, atha apmer Sodom renh ywerrelhilemel atwey-angenh.”

²⁹ “Artwa mwerr-rnem 40-alew?” Abraham-el renh ayernek. “Kel menty atwey-angenh.” INGKART angkek, “Atha tern ilkwa ywerrelhilemel atwey-angenh.”

³⁰ Abraham angkek, “Nga atyeng ahelirrey-angenh, INGKARTay. Nthakenharl artwa 30 mwerr-rnem arentyian? Ntwa tern ilkwa ywerrelhilemel atwetyek?”

INGKART angkek, “Atha apek artwa mwerr-rnem 30 arentyel, atha apmer Sodom renh ywerrelhilemel atwey-angenh.”

³¹ Abraham angkek, “Ayengan arrangkw. Artwa 20 mwerr-rnem-alew?” INGKART angkek,

“Atha apmer renh ywerrelhilemel atwey-angenh.”

³² Abraham angkek, “Nga atyeng ahelirrey-angenh INGKARTay, artwa mwerr-rnem 10-alew?”

“Kel, menty atwey-angenh,” INGKART angkek. “Atha tern ilkwa ywerrelhilemel atwey-angenh.”

³³ Abraham angkekarl-penh INGKART alpek-anem. Kel Abraham apmer-warl alpek.

19

Akngeyel Sodom Gomorrah atherr ywerrel-hileyl

¹ Atwerrp-anem angel atherr apetyek apmer Sodom-warl, tern ilkwewarl. Artwa Lot keyt ilkwa iwerr-angkwarr anenh. Lot-el angel renh-atherr arek, ra akapwert ahern-warl-athek kwenirrek. ² Ra angkek, “Mpwelanth apmer atyen-h-warl apetyenherr-atherr, ingkernem-then mpwelanth lhewelhetyek. Ingwa anyenting-er mpwelanth ayntetyek, ingwepen mpwelanth alethek alpey-akenh.” Ratherr renh ilek, “Mwerr aylanth akethel ayntem, tawen ampepel?” ³ Lot-el renh-atherr irrtyelh-ilenh inngantey apmer ikwerenh-warl alpetyek, ratherr inngantey alpek ikwer-angkwarr, apmer ikwerenh-warl. Lot-el amern ampernek ikwer-atherr.

⁴ Rernem ankwayntetyek irrek-anem. Artwa ingkerrenh Sodom-areny-rnem ikwer-rnem-warl, artwa atningk apetyek. ⁵ Rernem ayernek, “Artwa alehang weth-atherr-alew? Warl ngkwenharl aneyel atherr-alew? Akngetya

renh-atherr anwantherr apmwa mpwaretyek ikwer-atherr-angkwarr.”

6 Lot alhek arriw-warl-athek. **7** Ra menty angkek. **8** “Kwey aleyak nhenh-atherr akngeynenherr-areyay, artwa atherr mentyarl. Atha renh-atherr arntarnt-areyel, ratherr atyeng-itwel ilkwatherr aneyel.”

9 Artwa apmwernem arlek, “Iwerr-kety alha! Arrkngert angkey-angenh! Artwa yanh alethangarl, nthakenh ra anwekantherr angkey-angenh alakenh. Anwantherr ngenh atwekerr!” Rernem akarirrenhey-alhek arriw renh ngkweltyiletyek, warl Lot-kenh.

10-11 Artwa angel ratherr Lot renh ayteng inek, warl renh martemel artwernem akethelarl rtmenh-rnem ingkerrenh aparrngilek, rernem iwerr renh arey-angenhilek.

12-13 Ratherr Lot ikwer angkek, “Ngkwenh-rnem apek apmer nhel aneyel? Alerengkw-rnem-then. Ingkerrenh apmer nhenh-they akngeyna, aylanth apmer nhenh atwem-kety. Aylanth apmer nhenh atwem, rernem apmwangkwarr alheyel-kety.”

14 Lot-el malyikw ikwerenh-atherr ilek, rernem apmer-they alpetyek ingkerr-antey. Ratherr ikwer irrpelthirrenh, menty renh awenh.

15 Ingwepenh angel-el atherr Lot renh ilek ra apmer ikwer-they alpetyek, “Anew ngkwenh alerengkw ngkwenh-atherr anamerl apmer nhenh-they atnweneyna alpemel. Arrangkwelan nga alpey-angenhan, ingkerrenharl arrenhantherr atwem.”

16 Lot arlan anyentel-antey rtnenh. Akngey ilkelhenh renh atnyeneyek. Angel-el Lot renh anew ikwerenh alerikw ikwerenh-atherr-then apmer ikwer-they atnwenhek. **17** Angel-el renhnem ilek, “Apmer renh artepang arey-angenh alpetyek.”

18-19 Lot-el ilek, “Awethem ntwa ilekan. Apwert-warl anwenhantherr ilanthey-angenh, apwert arleng-ketyarl, anwantherr atwelhekerr. **20** Tyarlewa anwenhantherr apmer akely ikwer-warl alpetyek.” **21** Angel-el ilek, “Ya, kel mwerr, atha apmer renh atwey-angenh. **22** Anamerl alhenherr-arey arrenhantherr atwekerr-awayt.” Lot-el tawen akely renh itnewek Zoar, angka ikwerenh-angkwarr aynteyel apmer akely.

23 Ingkeny tyerrelhetyek irrek-anem. Lot apmer Zoar ikwer-warl aney-alhek-anem. INGKART-kenh lherrm ikwerenhel tawen renh-atherr atwek. **24-25** INGKARTel lherrmel-anem apmer renh atwek. Apmer atherr-antey ra atwek, arwerl-rnem-then atherrk-rnem-then. Altherrp-itwekan atwek arrpemarl lherrmel. Akngeyel arrpemarl tern ilkwitwel atwek arrpemarl. Tern ilkwernem ingkerrenh atwek. **26** Lot-kenh anewel artepang arek, ra apwert thalt-anem irrek.

27 Ingwepenh ikwerel-antey angkep-antey arrpemarl Abraham alpek irrkaty ikwer-warl, rarl arrwekelarl angkek Akngey-warl. **28** Ra kwen-warl-athek lherrm-rnem kwert-then tyerrelhey-ayntenty apmer ikwer-atherr-they.

29 Akngey ra iterl-arek, Abraham ra alhelek Lot-anem arntarnt-aremel. ...

21

Isaac ampa akely atnyeneyel

¹ INGKARTel Sarah renh arntarnt-arek, rarl Sarah renh ilek-angkwarr. ² Abraham ampwanem irrek. Sarah-el awey akely atnyenek. ³ Abraham-el renh itnewek Isaac. ⁴ Arlta 8 ikwerel-antey renh artwilek, INGKARTelarl renh ilek-angkwarr. ⁵ Abraham aherrety 100 anenh.

⁶ Sarah angkek, “Akngeyel ayenh irrkngerney anthek. Ingkerrenhel awem, atharl awey akely atnyeneyel, rernem inkwerelhem arrpemarl.”

⁷ Rap angkek, “Ingwer-rnemel Abraham ilek, ‘Sarah-el awey aylpaty anthem,’ ra ikwer-rnem irrpelthirrenh. Lyert, ra ampwan aneyel, awey ikwerenh atnyeneyel.”

Abraham-el Hagar-then Ishmael-then irrenteyel

⁸ Isaac kel ilkwerrek. Ra kel amernant arlkwenh, aylpaty menty ipmek. Abraham-el tyenkerr ilkwa ikwer atnyenek. ⁹⁻¹⁰ Sarah-el awey Ishmael renh arek. Sarah-el alharlkwemel Abraham-ek angkek, “Ntwa warrkenh yanh Egypt-areny irrenta! Ampikw ikwerenh-them. Ayeng ilkelhey-angenh ampa Hagar ikwerenh-kety ngkweng-they ampwal-rnem inayntetyek. Ampa atyenhelant ampwal ngkwenh-rnem atnyenerl-ayntetyek, arntarnt-arayntetyek ngarl ilwem-kety.”

¹¹ Abraham ahelirrek, Sarah-elarl renh irrentetyek-anem arrkernelhek. ¹² Akngeyel Abraham renh ilek, “Menty arelh yanh-then ampa akely-then menty alpetyek tyarlewa,

Sarah-elarl renh ilek-angkwarr. Isaac impen ngkwenhan. Ikwer-they akngerram-akngerrirreyenh arrpemarl. ¹³ Arelh warrkenh-kenh ampikw yanh menty-anem. Yanhan alerengkw ngkwenh arrpemarl. Ikwer-they akngerram-akngerrirreyenh arrpemarl.”

¹⁴ Abraham-el Hagar renh arranty kwaty-akert anthek amern-then, anpethel akngeynetyek. Hagar-then Ishmael-then irrentek-anem. Ratherr alpek, apmer Beersheba-angkwarr, arlpaw-angkwarr.

¹⁵ Kwaty kel ywerrek-anem. Hagar-el awey renh iwerl-alhek, lytwenty-itwek. ¹⁶ Ra arleng-warl alhek, arrernelhemel, awey renh arekerr, ra ilwekarl-kety.

¹⁷ Akngeyel awey renh awek, rarl artnek. Akngey-kenh angel-el irrwerl-they arlek, “Hagar, ilekek nga artneyel? Aterirrey-angen. Akngeyel awek, awey rarl artnek. ¹⁸ Avey ngkwenh inerl-alha, renh arternpiletyek. Atha ngkwenh-rnem akngerram-akngerrileyenh.”

¹⁹ Akngey kwaty Hagar ikwer anayntelhilek. Ra kwaty ngenty arek. Hagar-el kwaty inpek arranty-warl, awey renh anthek, antywetyek.

²⁰ Akngeyel awey renh arntarnt-arek. Ra ilkwerrek-anem. Ra apmer arlpawel anenh. Ra akaltyirrek pewenarrek. ²¹ Ra arlpawel anenh, rernem apmer renh itnewek Paran. Ingwer-ingeran amikw ikwerenhel anew inek ikwer, aleyak Egypt-areny. ...

22

Akngeyel Abraham renh ilantheyel, Isaac renh ipmek atwetyek

¹ Abraham renh Akngeyel arrkernek, nthekwern irrem ran wenh. Arraty renh arrkernek Akngeyel, ikwer-angkwarr anetyek apek. Akngeyan ikwer arlek, “Abraham-ay!”

“Ilekekay!” ran angkek.

² “Isaac, alerengkw ngkwenhant aknga apmer yanh-warl, Moriah-warl. Atyeng aknga Apwert renhan atha ngkweng tnernemarl. Aknga renh tyenkerr-anem atyeng. Atwey-alha renh, tyenkerr-anem. Ikwerek-anem tyenkerr-anem atyeng atwa! Yanhan alerengkw ngkwenhan.”

³ Ingwepenh-antey rap akemirrek. Ingwepenh-antey Abraham ra artwa ingwer-atherran-anem ikngwerl-alhek alerikw-anem ikwerenh. Rwanem ngkwelty ngkweltyilek ra, tangkey-anem ingwepenh-antey saddle-emiley-ayntek. Saddle arertney-ayntek tangkey-warl artep-warl. Rwanem ra inenh. Tywenerl-alhek ra. Apmer ikwer-warlap ra alhek Abraham irrkaty ikwer-warl renharl Akngeyel ilek-warl. ⁴ Irrpety-inger-penh rap arek arleng innganem, alker innganem, arleng-antey-anem. ⁵ “Mpwelherl-ayntenh-atherr. Akngeyek inkwerelhemel alhem-kety! Awey nhenh atyenh atha alerey akngem-kety. Anerl-ayntenh-atherr! Mpwelh-ayntenherr-atherr tangkey nhitwek. Akngeyek inkwerelhemel alhem-kety.”

⁶ Abraham rap awey ikwer-warl rwernem tywenekan pwerlep-warl, artep-warl-anem,

awey ra akngeyn-aynteyew-anem. Abraham-el akngeynenh rwalep-then inkwartey-then. Ilperlarlap ran. Anperl-alhek-anem ratherr.
7-8 Awey rap apatey-alhek, “Aker nthenharl ngkwenh tyenkerrew? Yep-yepew?” Abraham renh-anem ayernenh. Awey apatenh-anem. Abraham-anem ikwer angkenh, “Akngelyelarl tyenkerr anthem.”

9 Akngelyelarl Abraham renh ilek-angkwarr, akngelyel ratherr anperl-alhek-anem. Apwert ilperr-ilperr renhan ra arratylekan. Rwernem ampwerrety-inenh arratylemel. Awey renhan tyweney-alhek rlterr-atherr itep-atherr renhap athenew-anem. Awey renhan arertnek ra, rlterr-atherr itep-atherr. **10** Inkwartey-anem irrwerlilek ra atantheylek-anem awey renh.
11 INGKART-kenh angel angkek ikwer, “Abraham, Abraham!”

“Ilekekay?” Abraham-an angkek.

12 “Ipmay! ipmay! Abraham ipmay!” Angel-an angkek. “Abraham ipmay! Atwey-angen! Yanh atha ngenh iterl-areyel-anem. Alerengkw ngkwenh ayenh anthek ntwa. Ngkwenh. Anyent-antey. Impen-antey. Iterl-areyel-anem. Athap ngenh anthem ampa arnkengeny-anem. Akngerr-anem.”

13 Abraham-elan arerl-arrernek, “Ay, yep-yeparlap wenh!” Akapwert yanhey yep-yep mwerneleheng ra. Arwerl-rnemel mwernek artekerrel-anem. Akapwertan renh. Mwernek-anem. Rewelyey-anem renh. Artekkerr arwerl-rnemel-anem renh yep-yep mwernekan.

Rap ywarn-anem tyerrelhenhan, Abraham-el renh-anem arerl-arrenernekan. Rap yep-yep renh, Abraham-el tyenkerr-anem renh anthekan, ikwer-warl-anem arrernekan. Apwert ilperr-ilperr ikwer-warl-anem ra arrernekan. Tyenkerr-anem renh anthekan. ¹⁴ Abraham-el apmer renh itnewek INGKARTel Wantem. Lyert aley renh itneweyel INGKARTel Wantem apwert ikwerenhel. Itnan renh anthek, apmer Tyarlap-tyarlap ran. Itnan renh anthek Akngeyeley. Apwert ilperr-ilperr renhan.

¹⁵ Angel ikwer angkek arrpemarl, ¹⁶ “Ngarl impenirrey-angenh atyeng angwenhirrek, impenirrey-angenh alerengkw ngkwenhek. ¹⁷ Ngenh anthem ampa arnkengeny-anem, akngerr-anem. Ampa akngerr-anem atha ngenh antheman. Athap ngenh anthem ampa arnkengeny-anem. Akngerr-anem. Ampa akngerr-anem atha ngenh antheman. Apmer arrpanenh-anem ampa ngkwenhel tern ilkwernem akngeman amentew-ament. Tern ilkwernem-anem. Apmer arrpanenh-anem. Tern arrpanenh ngkwenh ingkerrenh akngerrirreyenh, ahern akely-rnem akngerr aynteyel-apeny. Ampa ngkwenhel-rnemey. ¹⁸ Athap ngenh arntarnt-arem irrwerl-theyan, ngarl atyeng awelhek. Athap ngenh arntarnt-areman Abraham-ay.”

¹⁹ Abraham ra warrkenh ikwerenh-atherr-warl alpek alerikw ikwerenh-akert. Abraham rap alpek apmer Beersheba-warl-anem. Aleth-antey aney-alpek-anem ra. ...

23

Sarah ilweyel

¹⁻² Sarah aherrety 127 anenh, apmer Kiriath Arba ilwemel-antey ikwer-itwek-antey. Apmer itna ingweran Hebron, Canaan-itwek.

³ Abraham rarl amperrngirrek ikwer. Ikwer-penh Abraham Hitt-kenh-rnem-warl alhek, ra renh-rnem ayerney-alhek, ⁴ “Ayengan alethang. Nthenhek atha anew atyenah arrewaly akwernem? Apmer mwerr ngay ntwa akely atyenah anthem?”

⁵⁻⁶ Rernem angkek, “Ngarl Atyetyart ilkwan intey nthenhek ngarl arlkwententyelan? Kel, ntwa intey yanhek anew ngkwenh arrewaly akwerna.” ⁷⁻⁹ Abraham angkek, “Ephron ayernerr-arey intey renh parrik impalh-itwek tharlemiletyek. Atha man ilkwan anthem, arrantherr ayenah ingkerrel aytaretyek, atharl anthem.” ¹⁰ Ephron apmerek-artwey, artwa Hitt-kenh apmer tern ilkwa arriw-itwek-antey anenh. Abraham-el apmer ikwer ayernek. ¹¹ Ephron angkek, “Kel, intey atha anthey, ingwerel-rneman ngenh aytaremel ntwarl atyeng-they intey ineman.”

¹²⁻¹³ Abraham angkek, “Man ilkwa innga atha ngenh anthem, arraty-angkwarr.”

¹⁴⁻¹⁵ Ephron ra ilek, “Menty! Thilp 400 ntwa payemeley-areny inteyekey! Arwa ngkweng aknga, man-weny. Atha ngenh menty anthek, man-weny-anem.”

¹⁶⁻¹⁸ Abraham-el artwa Hitt-kenh 400 thilp anthek, artwa akngerrel aytarek-angkwarr.

Alakenh Abraham-el apmer Ephron-kenh payemelek ikwerant-anem, ikwerenh-rnem-akert, intey-akert, arrewaly renh akwernetyek. Apmer ranap arwerl-angketyarr. ¹⁹⁻²⁰ Abraham-el anew ikwerenh intey ikwer-itwek akwernek, rarl payemelek-itwek, Hitt-kenh-rnem-itwek.

24

Isaac Rebekah atherr

¹ Abraham artwamp-anem irrek, ampwal akngerr atnyenek. Akngeyel renh arntarnt-arek. ² Ikwer-penhan, Abraham-el warrkenh ikwerenh innga ilek, rarl ampwal ikwerenh-rnem arntarnt-arayntetyek. ³ “Anew apmer Canaan-areny iney-angenh alerey atyenhek. ⁴ Kel apmer ayengarl ilkwerrek-ampeny-arenyant anew ikwer inetyek, atyenh-rnemarl aneyel-itwek.”

⁵ Warrkenh ikwerenhel renh ayernek, “Nthak-enharl arelh ra apetyetyek ilkelhey-angenhel. Ilek-apenyarl Isaac atha thwenenty, renh ikng-wetyek.”

⁶ “Kel, menty ipmay iterrey-angenh,” Abraham-el tyernek. ⁷ “INGKART alker-arenyel ayenh atnwenhey-alpek apmer nhenh-warl, apmer alhelenty nhenh-warl ayenh ra anthek, atyenh-rnem-akert. Nga apmer ikwer-warl alhentyan, INGKARTel angel ikwerenh thwenem, arraty-antey atnwenhetyek arelh ikwer-warl. ⁸ Ra arlkarirrentyan menty ra aney, alerey atyenh Isaac akngeyney-angenh, ikwer-warl.” ⁹ Warrkenh ra Abraham ikwer ilelhek,

“Ayeng ngkweng awelheyel, ntwarl ayenh ilek-angkwarr-antey.”

10 Ikwer-penhan warrkenh ra ampwal ilek-ilek akngerr-anem Abraham-kenh kamwerl 10-warl tywenek. Ikwer-they ra anperl-alhek apmer Syria-ampeny-warl, artwa Nahor anenh-warl. Nahor Abraham-kenh atyeyikw. **11** Ra kamwerl-rnem kwaty-itwek apmer tern akwerr-ampenyek apmer ltyerreyek arrerney-alhek. Atwerrpanem arelh-rnem tern ilkwareny-rnem kwaty-warl apetyek.

12 Warrkenh ra kwenirremel irrwerl-warl-athek angkek, “Akngeyay, ngan Abraham Atyet-yartarl aneyel. Ntwa ayenh arraty ila, anew atha Isaac-ek anetyek, ntwarl Abraham renh alhelek-angkwarr-antey. **13** Arelh yanh-rnem kwaty-warl rlengk apetyem, **14** atha renh-rnem ayernem anyentel kwaty anthetyek apek, rarl ayenh kwaty anthem anathap renh iterl-aremarl, Isaac-kenh anewikw, ntwarl Atyetyart atyenh alhelek-angkwarr.”

15-16 Aleyak anyent mwerr-angker innga apetyek kwaty inpetiek, ampwal kwatyek-arelh anpethel akngetiek, itnan ra Rebekah. Rebekah ra Bethuel-kenh alerikw. Bethuel ra Nahor-kenh ra Nahor-kenh alerikw, Milcah-kenh ampikw. Rebekah anper ikwer-angkwarr alhek, kwaty-anem ra inpenh kwatyek-arelh-warl. Ra apmer-warl alpetiek-anem irrek.

17 Abraham-kenh warrkenhel renh ayerney-ayntek, “Kwaty atyeng antha!”

18 Aleyak ra angkek, “Kel, antywa!” Ra anpeth-they renh atwarrelhilek, anterrkwemel artwa renh-anem kwaty antywetyek anthek.

19-20 “Atha kamwerl-rnem-then kwaty antywetyek anthem,” aleyak ra angkenh. Aleyak ra kwaty thelhek. Ra angkepelarreng kwaty inperlenty-akngengh kamwerl-rnemek. Kel kamwerl-rnem kwaty akngerr antywek-penh. **21-22** Abraham-kenh warrkenhel arelh renhant-anem arenh, ra renh aretyek, ra apek innga nhenhan. Artwa warrkenh ra atnyenek ampwal alhek-arelh anyent ampwal akwek-arelh anyent, apwert gold-penh. Ra Rebekah renh anthek. **23** Warrkenh ra ayernek, “Angwenh aynengkw ngkwenhan? Warl arlpimp ngkwenhan aynteyel, anwantherr ayntetyek?”

24 Aleyak ra ilek, “Artwamp atyenhan Bethuel-arl, Nahor-kenh alerikw, Milcah-kenh ampikw.

25 Kel warl arrekantherr arlpimparl. Amern atherrk akngerr kamwerl-rnemek.”

26 Warrkenh ra kwenirrek, Akngey-warl-athet angkemel. **27** “Kel, Abraham-kenh Atyetyart, ayeng ngkweng inkwerelhem, ntwarl ayenh Abraham-kenh-rnem-warl atnwenhek, ntwarl alhelek-angkwarr.”

28 Rebekah anterreynek apmer-warl ikwerenh-rnem anenh-warl, ra renh-rnem ilek. **29-30** Rebekah-kenh awayikw, itnan Laban. Ra renh awek, rarl renh ingkerrenh-angkwarr ilek. Ra ampwal alhek-arelh-rnem-then, ampwal akwek-arelh-rnem-then kel arek. Laban anterrek Abraham-kenh warrkenh-warl, kamwerl-rnem-itwel rtnenh-warl, kwaty ngenty

impalth-warl. ³¹ INGKARTel ngenh mwerrantey akngeteyek apmer nhenh-warl. Akethel anwekantherrety rtney-angenh. Apmer atha ngkweng mpwarek, nga ingwel ayntetyek, kamwerl-rnem-then, ngkwenh-rnem-then.

³² Abraham-kenh warrkenh alhek, Laban-angkwarr. Laban-kenh warrkenh-rnemel ampwal-rnem atwarrelhilek kamwerl-rnem-they. Kel ra atherrk-rnem kamwerl renh-rnem anthek. Kwaty-anem ikwer-rnem akngeteyek warl kwen-warl Abraham-kenh warrkenh-rnemel ingka lhewelhetyek. ³³ Ikwer-penhan rernem amern-anem artwa renh-rnem anthek, rernem arlkwetyek. Warrkenhel ilek, “Amern arlkwey-alentyelan, angketangkwel atha ngenh ileman ilekek Karl ayeng apetyek apmer nhenh-warl. Kel ilant ilekek nga apetyek,” Laban angkek.

³⁴ Warrkenh ra ilelhek, “Ayengan Abraham-kenh warrkenharl. ³⁵ INGKARTel Abraham renh aleth arntarnt-arenh, akngerr renh anthek, yep-yep-rnem-then, pwelek-rnem-then, nanikwet-rnem-then, kamwerl-rnem-then, tangkey-rnem-then, thilp-rnem-then, gold-rnem akngerr, warrkenh-rnem-then. ³⁶ Atyetyart atyenhenh-kenh anewikwelan ampa atnyenek ampwelant-anem. Ra awey atnyenek, Abraham-el renh anthek ampwal ilek-ilek akngerr innga. ³⁷ Atha Atyetyart atyenhenh ilek, ayengarl ikwer awelheyek, rarl ayenhenh ilek-angkwarr. Ra ayenhenh ilek, ‘Menty arelh Canaan-areny ikngwey-angenh alerey atyenhek. ³⁸ Atyenhenh-rnem-ampeny-theyant anew ikwer inetyek.’

39 Atha Atyetyart renh ayernek, ‘Nthakenharl arelh atyeng-angkwarr apetyey-angenhan?’

40 Atyetyart atyeng angkek, ‘Ayeng aleth Akngeyek inkwerelhemel awelheyel. Akngeyelarl angel thwenem, ra ngenh atnwenhetyek arelh ikwer-warl anew ikngwetyek alerey atyenhek. **41** Rernem arelh renh ngkweng-angkwarr tyarlewey-angenhan nga menty-anem ana.’

42-43 Ayeng kwaty ngenty ikwer-warl apetyek Akngey-warl-anem ayeng angkek, ‘Ngan Atyetyart ilkwa Abraham-kenh. Atyeng iylparrerna, Abraham-kenh alerikwek anew atha ikngwetyek. Arelh ra rlengk apetyem kwaty-warl, atha renh ayernem, ra ayenh kwaty ngenty itwek inpemel anthetyek, atha antywetyek. **44** Rarl ayenh kwaty antywetyek anthenty, kamwerlrnem-then, athap renh inngarl iterl-areman, nt-warl atyeng iylparrernekk.’

45 Atha Akngeyel ayernenhel-antey, arelh ra apetyek, kwaty inpeteyek, ngenty ikwer-itwek, kwatyek-arelh anpeth-itwek akngetyen. Ra kwatyek-arelh kwaty akngerr innga inpek, atha renh kwaty antywetyek ayernek, kwatyek-arelh-they.

46 Ra kwatyek-arelh anpeth-they ayenh anthek, atha antywek. Ra kwaty inpek kamwerl-rnemek-anem, anthwengileyek.

47-48 Atha renh aynikwek ayernek, ra aynikw ikwerenitnewek Bethuel, Nahor-kenh alerikw, Milcah-kenh ampikw. Anamerl-antey atha arrernek ampwal alhek-arelh-then ampwal akwek-arelh-then ikwer-warl. Ikwer-penhan ayeng

kwenirremel Akngey-warl angkek, inkwerelhemel, rarl arraty innga atyeng arelh renh iylparrernek, Abraham-kenh alerikwek anew ikngwetyek, Abraham-kenh-rnem-itwek. ⁴⁹ Ila atyeng Atyetyart atyenhek, ntwarl renh arraty innga anthem. Atha apek aleyak renh akngeynetyek. Arrangkwelan aleyak ingwerekanemarl ayeng nthwetyek alhem, anew ikngwetyek Abraham-kenh alerikwek.”

⁵⁰ Laban, Bethuel atherrel renh ilek, “Nhan Akngey-kenh-angkwarrarl, yanh-angkwarr anwantherr apenteman. ⁵¹ Kel-anem Rebekah akngeyna-anem, atyetyart ngkwenh-kenh alerikwek anew, INGKARTelarl ngenh ilek-angkwarr.”

⁵² Abraham-kenh warrkenh Akngey kwenirremel angkek inkwerelhemel ikwer, rarl renh arraty iylparrernekek. ⁵³ Ra arnkwernem-then thilp-rnem-then ampwal akwek-arelh-rnem-then gold-penh ingkerrenh anthek Rebekah renh. Ra ampwal mwerr-angker ingwer-rneman amikw-then awayikw-then anthek. ⁵⁴ Abraham-kenh warkenh-rnem anyent-inger-antey ayntek, ikwer-itwek. Ingwepenh, Abraham-kenh warrenhel renh-rnem ilek, “Kel, ayeng alpem-anem Atyetyart atyenh-warl.”

⁵⁵ Rebekah-kenh-rnem arrkngert angkek, “Alerey kwey Rebekah nhenh alerl aney anwekantherr-itwek-anem wik anyentel. Ikwer-penphant-anem ra alpeman.”

⁵⁶ Warrkenh angkek, “Arleng-alenty atyeng mpwarey-angenh ayeng anetyek, INGKARTel arraty innga iylparrernek-angkwarr. Ayeng kel alpem Atyetyart ikwer-warl.”

⁵⁷ Rernem angkek, “Ilek-apenyarl Rebekah anwantherr ayernentyan nthakenh rarl angkem?”

⁵⁸ Rernem renh ayernek, “Kel mwerrang artwa nhenh-angkwarr nga alpem?”. Kel Rebekah mwerr angkek artwa ikwer-angkwarr alpetyek.

⁵⁹⁻⁶⁰ Rebekah renh-then arelh warrkenh-then Abraham-kenh warrkenh ikwer-angkwarr renh-atherr thwenek, alpetyek Abraham-kenh alerikw ikwer-warl. Ikwer-penhan rernem inkwerelhemel Akngey-warl angkek, “Anwantherr ngkweng Akngey-warl angkem, ngkweng-they akngerram-akngerrirretyek anyany-rnem-then, aperl-rnem-then. Akngeyel renh-rnem arntarnt-arayntem artwa ahelengkw-rnem-kety.”

⁶¹ Kel Rebekah ingwer-rnem-then alpetyek-anem irrek. Rernem kamwerl-warl nganek, Abraham-kenh warrkenh-rnem-angkwarr alpek.

⁶² Isaac ra Caanan-they antekerr-ampeny anenh. Apmer ra Beer Lahai Roi-they apetyek, apmer Canaan-they antekerr-ampenyal anenh.

⁶³ Atwerrp ra alhenh, artwernem-anem ra arnarek kamwerl-akert apey-alperl-anenty. Ra ikwer-rnem-warl-athek alhenh. ⁶⁴ Rebekah-el renh arnarek. Ra kamwerl-they atwarrek. ⁶⁵ Warrkenh renh ayernek, “Artwa angwenh apetyeyel?” Warrkenh angkek, “Atyet-yart atyenh yanhan apetyeyel, Isaac-an.” Rebekah arnkwa artelhek inngeerr-angkwarran, artwel arey-ayntekerr.

⁶⁶ Warrkenh ra ilek Isaac renh ilek-ilek-angkwarr ayntek. ⁶⁷ Isaac ra Rebekah renh atnwenhek kalikw kwen-warl. Ratherr itengirrek-

anem. Ra ikwer inkwerelhek, amikw ikweren-harl ilwekarl-kety.

25

Abraham ilweyel

¹⁻² Abraham ra anew ingwer-anem ikngwek itnan Keturah. Ampernem atnyenek 6-pel. ...

⁵ Abraham iteth-antey anenhel, ra ampwal ingkerrenh anthek, Hagar-atherr, Keturah-atherr. ⁶ Ra alerikw ikwerenh-rnem thwenek, akngerrakw-antey, arleng innga, alerikw ikwerenh Isaac-kety. Abraham ilwey-alentyel ra ampwal ingkerrenh Isaac anthek.

⁷ Abraham aherrety 175 ampwa innganem anenh. ⁸ Kel ra ilwek-anem. ⁹⁻¹⁰ Alerikw ikwerenhel atherr renh intey-itwek akwernek, Hebron-angkwarr akngerrakw, rarl Hitt-kenh-rnem-itwek payemelek intey renh. Isaac-el atherr Ishmael-el atherr Abraham renh anew ikwerenh-itwek-antey akwernek. ¹¹ Abraham ilwek-penhan Akngeyel Isaac renh arntarnt-arenh. Isaac ra alpek apmer Beer Lahai Roi-warl. ...

Jacob-then Esau-then

¹⁹ Nhenh angka Abraham-kenh alerikw-then Isaac-penh Isaac alerikw anenh Abraham-kenhan. ²⁰ Isaac aherrety 40 anenh ra itengirrek Rebekah-itwek, Bethuel-kenh alerikw-itwek. Bethuel ra apmer Aram-areny anenh. Laban Rebekah-kenh awayikw apmer Aram-areny anenh arrpemarl.

²¹ Rebekah ra ampek arrangkw anenh. Isaac-el INGKART ayernek renh-atherr ampa anthetyek.

INGKARTel Isaac renh awek, rarl ayernek ampek, renh-atherr ra anthetyek. ²² Rebekah ra atyewenheng-atherr-akert awelhek, ratherrarl atwerrek. Ran Akngey ayernek, “Ilekek atyewenheng-atherr atwerreyel?” Rebekah ywarn iterrek nthakenharl ratherr atwerrenh.

²³ INGKARTel renh ilek, “Aler ngkwenh amentant-atherr ratherr atyetyart aneyenh, ingwer apmer ingwer-ampenyekan, ingwer apmer ingwer-ampenyek. Awayikwan aytayikwek awelh-ayntem, aytayikw rarlap atyetyartan anayntem. Amentant atherr ikwerek-atherr anaynteman.” ²⁴ Rebekah ra ampa akely renh-atherr-anem atnyenek. ²⁵ “Arrwekelely alta rnter-rnterarl anek, atha renh itnewem Esau.” ²⁶ Ra awayikw ikwerenh atnererrk-they anterrkwek. Rernem renh itnan Jacob renh itnewek.

²⁷⁻²⁸ Awayenheng-atherr ratherr ilkwerrek-anem. Esau ran awangk-awarrarl anenh, Jacob ra arteny-areny anenh. Isaac Esau-ek arlk-wenten, rarl akerel renh wantenhek. Amikw ikwer-atherrenh Jacob anyentekant arlkwenten. Isaac aherrety 60 anenh.

²⁹ Arlta anyentel, Jacob ra ltya ampernenh, Esau ra angayakw irrek. ³⁰ Esau ra aytayikw ikwerenh ltyek ayernek, “Ltya ayenh anthay, ayeng angayakwirrek, atnert ayeng akelhek, angayakw innga irrek.”

³¹ Jacob angkek, “Ngenh ampwal ingkerrenh antheyenh, nga arrwekelelyarl. Ntwa ayenh ampwal ingkerrenh antha, atha ngenh aker ltyarl anthey-akenh.”

³² Esau angkek, “Ayeng ilwetyekan arrer-anem. Kel menty ampwal-rnem atnyeney-angenh ilwetyekan arrer-anem.”

³³ Jacob angkek, “Ampwal ayenh anthay, akngeyelarl ngenh alhelek.” Esau mwerr angkek ikwer, ra ampwal-rnem menty anthetyek.

³⁴ Jacob-el amern-then aker ltyethen Esau renh anthek. Esau ra aker arlkwek-penh ra anperl-alhek apmer-warl alpek, ampwal-rnem menty iwerl-alhek.

26

Akngelyel Isaac renh alheleyel, renh arntarnt-aretyek

¹ Awank-akerr, Abraham rarl iteth anenh-angkwarr, apmer Canaan amern-weny irrek. Irrkaty-angkwarr arrpemarl apmer ra amern-weny irrek arrwekel. Isaac tawen Gerar-warl alhek, Abimelech-warl, Philistia-areny Atyetyart ikwer-warl, INGKARTelarl Abraham renh ilek-angkwarr. ² INGKART aremirrek Isaac ikwer-warl. Angkek ikwer-warl, “Egypt-warl alhey-angenh-antey nhennhel-antey anaynta! Atha ngenh atnwenhey, apmer renh atha ngkweng iylparrernetyek. ³ Atha ngenh aleth arntarnt-arayntetyek apmer ilenhek, alethang inngey ngarl. Atha apmer ngenh anthem, ngkwenh-rnem-then, atharl Abraham renh alhelek-angkwarr. ⁴⁻⁵ Atha ngenh apmer anthem, ngkwenh-rnem akngerrirretyek apmer ilenhel. Akngerr innga rernem aneyenh, antyarr-rnem akngerr innga aneyel-apeny. Ngkwenh-rnem ingkerrenh mwarrant-arey anetyek, apmer

arrpanenhek, Abraham-arl atyeng awelhek-angkwarr.” ⁶ Isaac apmer Gerar-itwek kel aney-alpek. ...

27

Jacob irrtywerremel ilelheyel aynikwek

¹ Isaac artwa ampwanemarl irrek, ra annga aparrng-anem irrek. Ra alerikw ikwerenhek arlek Esau.

² Isaac angkek, “Ayeng artwamp-anem. Arreranem ayeng ilwetyekan.” ³ Isaac-el renh ilanthek, “Ntwa aker atyeng atwerl-alpa. Pewenarr ngkwenh aknga! ⁴ Peleyn-warl alha! Aker amperna peleyn ilenhek, mwerr-angker inetyek, mwerr-angker atha arlkweyek. Ayeng mwerrangkwarr ngkweng angketyek ayeng ilweyalenty, INGKARTel ngenh arntarnt-aretyek.”

⁵ Rebekah awelhenh, Isaac rarl angkenh. Esau anpenhek awangk, akerek aretyek. ⁶⁻⁷ Rebekah Jacob-ek angkek, “Atha awek Isaac-elarl Esau ilanthek aker ikwer atwerl-alpetyek ltyakert-anem ampernemel. Artwamp ilwey-alentyel arlkwetyek, awayengkw ngkwenhek mwerranem ra angketyek, INGKARTel renh arntarnt-aretyek.” ⁸ Amikw angkek, “Awelha atyeng! ⁹ Nanikwet akely atherr atwerl-alpa akngey-alpemel. Atha ampernetyek aynengkw ngkwenhek. ¹⁰ Ntwa ikwer-warl akngeyek, ra arlkwetyek ra mwerr-angkwarr angkey-alhenty, ra ngkweng inkwerelhemel.”

¹¹⁻¹² Jacob angkek, “Awayaty atyenh altangket-yarr. Ayengan arrangkw, alteweny. Artwampel

ayenh iterl-arekerr, atha irrtywerremel ilerlanenty. Apmwangkwarr atha ilerl-anentyek, ra akengenty atyeng angkekerr.”

¹³ Amikw ikweren angkek, “Mwerr, atyengarl ra iterrem. Akngeyel ayenh aytarrp-iletyek. Kel ngalha aker atwetyekantarl.”

¹⁴ Jacob-el aker renh atwerl-alpek. Amikwelarl renh ampernek, aynikw-kenh impen. ¹⁵ Esau-kenh arnkwa amikwel Jacob renh anthek, ra aylpetyek. ¹⁶ Nanikwet-penh yepn ra mpwarek, Jacob ikwer-warl arrernek, itep-atherr-warl, itewarl, Esau-apeny. Aynikw-warl aker akngetyek. ¹⁷ Amikwel Jacob amern-then aker ltyethen ra anthek.

¹⁸ Jacob aynikw-warl alhek. Aynikw-warl ra angkek, “Kel, ayeng apey-alpek.”

“Nthenh-apeny ngan?” Aynikwel ayernek.

¹⁹ Jacob irrtywerremel ikwer ilelhek, “Ayeng arrwekelenyan ngkwenh Esau. Atha aker atwerl-alpek, ntwarl ayenh ilanthek-angkwarr. Aker nhanyeman arlkwa ntwa mwerr-angkwarr angka atyeng iletyek, Akngeyel ayenh arntarntaretyek.”

²⁰ “Alyarnpel-anem ntwa akeran atwerliwek! Ilek-kety?” Isaac-el renh ayernek. Jacob-el irrtywerremel ilek, “Akngeyel INGKARTel ayenh aker anthek.”

²¹ Isaac angkek, “Arrer-apeny irray, atha ngenh arnep-arnetyek, Esau-ek apek atha ngenh arnep-arnetyek.”

²² Jacob arrer-apeny irrek ikwer-warl. Isaac-el renh arnep-arnek. Artwamp angkek, “Jacob-apenyarl nga angkeyelan, Esau-apenyarl nga

arlkan.” ²³ Angka mwerr innga ra angkek Esau-ek-arrpantey. ²⁴ “Nga alerey atyenh Esau innga?” Isaac-el ayernek.

“Ya, ayengan alerengkw ngkwenharl, Esau-arl,” Jacob-el irrywerremel ilek.

²⁵ “Aker-rnem atyeng akngetya, angka mwerr atha ngkweng ileyek. Jacob-el renh anthek aker-then wayn-then. Isaac-el arlkwek, antywek.”

²⁶ Isaac angkek alerikw ikwerenhek, “Apetya! Ayenh arrwantyetyek. Kel, atha ngkweng ileyek, atharl ngenh kel ilek-angkwarr.”

²⁷ Isaac-el arnkwa Esau-kenh intenhek, Esau-arrpantey iterl-arek, angkek, “Arlka ikwakertarl nhan, ahern atherrkeny kwaty-penh mwerr-angker inteyel-apeny, amern lyapelhelekarl INGKARTel. ²⁸ Akngeyel ngkweng-warl kwaty thwenetyek, ngenh arntarnt-arem, amern-angketyarr, ntang ingwerek-ingwer-then, amern-rnem-then lyapelheleyek. ²⁹ Nga Atyetyart ilkwa anetyek apmer arrpanenhek, atyeyengkw-rnemek, atyetyart ilkwa nga anetyek. Ingwerarl ngkweng akengenty angkenty, ayeng akengenty arrpemarl ikwer angkem. Ingwerarl ngkweng mwerr angkenty, Akngey mwerr arrpemarl ikwer angkem.” Isaac mwerr angkek Jacob ikwer.

³⁰ Esau awangk-angkwarr-penh aremirrek ikwer-warl aker-akert. ³¹ Aker mwerr-angker ampernek aynikwek aker renh anthemel, “Aker nhenh arlkwa atharl ngkweng akngetye.”

³² “Angwenharl ngan?” Isaac angkek.

“Ayengan Esau-arl, alerengkw ngkwenh arrwekelenyan,” Esau ikwer ilelhek.

33 Ikwer-penhan Isaac artewentyel arrewemel iterrek. “Angwenhelarl aker arrwekel-antey akngetyek? Atharl arlkwek, mwerr ayeng angkek, atharl arrwekel alhelek-anemarl renh, kel-antey. Kel, yanhey-antey atha ilek.” Artwampel ilek.

34 Esau artewentyel arlkemel artnek, aynikwarl awek-penh, “Kel ayenhan ntwa alhela arrpemarl!” Esau-el ilek.

35 Isaac angkek, “Aytteyengkw ngkwenhel ayenh irrtywerl-ampernek.”

36 Esau angkek, “Atherr-inger ra irrtywerl-ampernek, itna ikwerenh-apeny.”

37 Artwampel ilek, “Jacob-an Atyetyartarl arrekingkerr-angkwarr, ingkerrenh-angkwarr. Arringkerr ingkerrenh ikwer awelhetyek. Atha renh ingkerrenh anthek, amern-rnem-then. Ilek-anem atha ngenh anthem, ingkerrenh-antey atha anthek-kety.”

38 Esau-el aynikw renh ayernek arrpemarl, “Ayenh-anem ilay, Akngayel ayenh arntarnt-aretyek! Ampwal-rnem anthetyek apek!” Ra artewentyel artnenh.

39 Aynikw ikwerenhel renh ilek, “Apmer arlpawel nga aneyenh. Kwaty aypmerr ayntey-angenh arrangkw, aherrety inngel.

40 Ngethen atwerrerl-ayntem Jacob-kenhrnem-then aleth-antey. Aytteyengkw ngkwenh ngkweng Atyetyart aneyenh. Ingwer-ingeran, mpwel amentant-atherr irreyenh. Mpwel arlengant-atherr anetyek, ra ngkweng atyetyart-weny aneyenh.”

Jacob-el Laban-warl aterel anterreyel

⁴¹ Esau arlkarirrenh Jacob-kety, rarl renh irrrtywerl-ampernek-kety. Ra ament iterrenh, “Akngay atyenh iltwentyel, atha Jacob renh ipmek atwem.”

⁴²⁻⁴³ Rebekah-el awek ingwer-rnemel ikwer ilek, Esau Jacob ikwer mpwelhenh renh atwetyek, Jacob renh ilek, “Nga awayaty atyenh-warl alpa, Laban-warl, rarl apmer Haran-itwek aneyel. ⁴⁴ Arleng ikwerety aney-alpa. ⁴⁵ Esau ra iylpelirrenty atha ingwerenty ilanthem ngenh ikngwerl-alpetyek. Mpwel aleth anayntetyek, mwarrant-atherr ipmek atwerrey-angenh anetyek.” ⁴⁶ Rebekah-el Isaac renh ilek, “Arelh Hittkenh-rnem, Esau-kenh anew-rnem, ayeng ikwer-rnem-kety arlkarirreyel. Jacob-el arelh Hittkenh ikngtwenty-they, ayeng kel ilwemarl. Ayeng ilkelhey-angenh ayeng iteth anetyek, rernem ayenh arlkarewerl-anekerr.”

28

¹ Isaac Jacob-ek arlkek, renh rlterrkel iletyek. Ra mwerr angkek ikwer, renh rlterrkiletyek. Ra Jacob renh ilek, “Arelh Canaan-areny-rnem itengirrey-angenh. Kel menty-anem renh-rnem ipma! ² Artartey ngkwenh-kenh apmer-warl alha, Bethuel-warl, apmer Syria-ampeny, apmer Paddam Aran. Apmarlengkw ngkwenh-itwek anew ntwa ikngwetyek, apmarlengkw ngkwenh-kenh alerikw. ³ Ayeng Akngay-warl angkey, ra ngenh rlterrkiletyek, ampa ngkwenh-rnem akngerrirretyek. ⁴ Nga apmer ikwer-itwek

anayntetyek, Akngeyel Abraham renh anthek-itwek, anwantherr aneyelan alethang-rnemarl. Akngeyel Abraham renh alhelek, apmer renh anthetyek, Ngan arwa alethangarl aney-alhek.”

...

Jacob ra altyerr areyel

¹⁰ ... Jacob anperl-alhek apmer Beersheba-they apmer Haran-warl. ¹¹ Atwerrp-anem, ingkeny aylperl-alhekan. Apwert rtemal arrernek. Rap ankwanem ayntek. ¹² Rap altyerr arek. Angel-rnem ladder ikwerel angkepelarreng al-henh. ¹³ Alkerel irrwerl Akngey ra rtnenh. Ra angkek, “Ayeng INGKART ra, Akngey arrengengkw ngkwenh-kenh, Abraham-kenh, INGKART Akngey ngkwenh-kenh, Isaac-kenh. Apmer nhenhan ngan aynteyelan, atha ngkwenh-rnemek antheyen. ¹⁴ Rernem arlperrtyir-reyenh, amentew-ament irremel. ¹⁵ Atha ngenh apmer nhewarl akngey-alpem. Ayeng ngkweng ilkwatherr alhem. Atha ngenh arntarntaretyek intem-antey, nthakenh ngenh ipmey-angenh. Atha ngenh anthem, atharl ngenh alhelek-angkwarr.”

¹⁶ Jacob akemirrenhey-alpek, “INGKART wenh apmer nhel aneyel! Atha iterl-arey-angenharl! Iwerr altywer alker-warl-athetk!” ¹⁷ Ra aterirrek, “Apmer nenh aknganenty! Nnenh apekan Akngey-kenh apmerelarl ayeng aynteyel!”

¹⁸ Ra apwert rtemal renh arrernek Akngeyek, anterel apernemel. ¹⁹ Ra apmer renh itnewek Bethel, Luz-tangkwel arrwekel-antey itna ra aytenten. Ra angkek, “Akngey nhel-antey aneyel!”

²⁰ Ra Akngey ilek, “Ntwa ayenh arntarntarem, amern-then arnkwethen anthem, ²¹ ntwa ayenh iteth-antey akngey-alpenty, ayeng ngkweng awelhem. Nga INGKART atyenh aneyenh. ²² Apmer nhan apmer ngkwenhan. Atha ngenh tyenkerr anthem.”

29

Jacob alheyel apmarley-kenh apmer-warl alhek

¹ Jacob aleth-antey alpenh akngerrakw-antey.

² Ra ngenty-anem arey-alhek. Ngenty ra apwert-rnemel artekarl. Yep-yep akngerr rt-nenherrenh, kwaty ngenty-itwel, apwertelarl artek-itwel. ³ Yep-yep arntarnt-arey-angker-rnemel apwert renh arnangilek, yep-yep-rnem kwaty anthwengiley-alkenh. Kwaty yep-yep-rnemarl ayntwek-penh, rernem angkep arrpemarl marteynenh apwert ikwerel-antey.

⁴ Jacob-el renh-rnem ayernek, “Nthenh-areny arrantherr?”

“Anantherr apmer Haran-arenyarl,” rernem ilelhek.

⁵ Jacob-el renh-rnem ayernek, Arrantherr iterl-areyel Laban apek, Nahor-kenh arrengikw? Kel, anwantherr renh iterl-areyel, rernem renh ilek.

⁶ Rap renh-rnem ayernek, Ilek-apenyarlap ran? Kel, ra mwerr, rernem renh ilek. Alerikw ikwerenh Rachel apetyeyel apmer nhenh-warl yep-yep-rnem-akert.

⁷ Jacob angkek, “Itwern irrwerlel-antey, rwenp inngarl, yep-yep arlwelenhey-alpenh-arey.

Kwaty renh-rnem anthwengiletyek, peleynwarl-anem akngeynemel, atherrk-anem rernem arlkwetyek.”

⁸ “Alerl-antey mpwelheyel ingkerrenhek, ingkerreh-angkwarrant apwert renh ahartelheleetyek, kwaty-kety.”

⁹ Jacob ikwer-rnem-itwek angkenh-antey, altyleikw ikwerenh apetyek, aynikw-kenh yep-yep-rnem-akert. Rachel yep-yep arntarnt-arey-angker anenh. ¹⁰ Renh arek, Jacob-elarl apwert renh arnangilek, yep-yep-rnemarl kwaty antywey-alkenh. Apmarlikw-kenh yep-yep-rnem anthwengilek. ¹¹ Jacob artnek, Rachel renh arrwantyek, ikwer inkwerelhemel. ¹² Jacob Rachel ikwer ilelhek, “Ayengan Laban-kenh ampikwarl, Rebekah-kenharl.” Rachel ra anterrek, aynikw ikwerenh iletyek. Ra aynikw ikwerenh ileyalpek.

¹³ Laban ra angka awekarl-penh, ra anterrek Jacob ikwer-warl, renh atnyenemel arrwantyek, apmer ikwerenh-warl-anem atnwenheynek. Jacob Laban ikwer-warl ilelhek. ¹⁴ Laban angkek, “Nga ampaty atyenhan inngarl.” Jacob alkent anyentel Laban ikwer-itwel anek.

Jacob warrkirreyel Laban-ek

¹⁵ Laban Jacob ikwer angkek, “Ngan ampaty atyenhan. Arwa nga warrkirrekerr, ilek atha ngenh antheman, ngenh kwarteweyek Nthakenh nga iterreyelan?” ¹⁶ Laban-kenh alerikw-atherr anek, Leah-atherr. Ayteyikw ikwerenh Rachel. ¹⁷ Leah aleyak alpwely, alkwemp-apeny, Rachel aleyak twentyeyn innga. ¹⁸ Jacob ilkelhenh

Rachel-ekant. Laban ikwer-warl angkek, “Aherrety 7-pelek-atwety ayeng warrkirrem ngkweng Rachel-itwek-anem ayeng itengirrey-alenty.”

¹⁹ Laban-el renh ilek, “Mwerrarl nga iten-girrentyan ingwer-rnem-kety. Mwerr-ayteng atha ngenh anthetyek. Mwerr atyeng-itwel ana warrkirremel.” ²⁰ Jacob aherrety 7-pelek-atwety warrkirrek Laban-ek, Rachel renh anthey-akenh. Ra ikwer-itwel itengirrey-angenh-antey. Kel, aherrety 7-penh, Jacob ra inkwerelhek Rachel-ek. Jacob angkek Laban ikwer-warl,

²¹ “Kel-anem anew atyeng Rachel anthanem, ayeng ikwer-itwek ayntetyek. Aherrety 7-pel ayeng warrkirrenh. Atha warrk atyenh kel ywerrelhilek.”

²² Ingwa ikwerel-antey rernem amern kwenty-anem arlkwek inkwerelhemel. Artwa ingkerrenh akarirrek ikwer-rnem-warl. Laban akngerrek yangkelhek, amern tyenkerr arlkwetyek, Jacob Rachel-itwel itengirrek-angkwarr, amern rernem akngerr arlkwetyek inkwerel-hemel ikwer-atherr. ²³ Ingwel, Laban-el Leah-anem Jacob renh anthek, anew ikwer anetyek. Jacob ra ikwer-itwek ayntek, Rachel-itwel-arrpantey, apal-antey. ²⁴ Laban-el arelh Zilpah renh ilanthek Leah-ek warrkirretyek.

²⁵ Ingwepenh-anem Jacob-el arek, Leah-anem ikwer-itwek aynten. Ra iterrek Rachel-ek-athen. Jacob-el Laban renh ayernek, “Ilekek ntwa ayenh irrtywerremel ilek, Rachel anthentyek-arrpantey! Ilekek ntwa irrtywerlampernek? Ntwa ayenh Leah anthek, ayengan warrkirrek Rachel-ekant.”

²⁶ Laban-el Jacob renh ilek, “Apmer anwekantherrenh-itwekan arrwekele ny-tangkwel itengirrem. Kwey arrwekele ny-antheman, ingkerneny nthakenh anthey-angenh. Alakenh-anyem anwekantherrenh-angkwarran aynteyel, arrwekele nyant antheyel, ingkernenyan arrangkwarl. Wik anyentek-atwety mpwelanth Leah-atherr anetyek. Ikwer-penhan nga Rachel-itwek itengirrey-akenh, nga aherrety 7 ingwerek-atwety atyeng warrkirretyek, atharl Rachel anthek-penh, iteng-anem.” ²⁷⁻³⁰ Wik anyent-penh, kwenty arlkwek-penh Laban-el alerikw ikwerenh Rachel anthek Jacob-itwek itengirretyek. Laban-el arelh Bilhah renh ilanthek, Rachel-ek warrkirretyek. Jacob Rachel-itwek innganem ayntek. Ra Rachel ikwerant inkwerelhek, Leah-angkwarran. Aherrety 7 ingwerek-atwety warrkirrek.

Jacob-kenh alerikw-rnem

³¹ INGKARTel arek, Jacob-arl Leah-kety arlkarirrenh, ra ikwer amperrngirrek. ³² Alakenh Leah-el ampa atnyenek. Rachel ampek arrangkw aleth anek. Leah-kenh awey akely aynten. Ra renh Reuben itnewek, alakenh angka ikwerenhel aynteyel, “INGKARTel ayenh irrkngerney anthek. Anew atyenh apek atyeng inkwerelhem.” Ra iterrek Jacob-an ikwer ilkelherl-anentyek-athen.

³³ Leah ra ampa ingweran atnyenek, awey akely arrpemarl. Leah angkek, “Akngayel arek anew atyenh, rarl atyeng inkwerelhey-angenh. Alakenh-they ra ayenh awey nhanyem anthek. Rernem renh itnewek Simeon.”

³⁴ Ikwer-they ra ampa ingweran atnyenek, awey akely arrpemarl. Avey irrpety-anem ik-werenh. Ra angkek, “Ikwer-they anew atyenh inkwerelhem-anem atyeng. Avey irrpety-anem atyenh.” Ranem renh itnewek Levi.

³⁵ Ampa ingweran atnyenek, awey akely arrpemarl. Ra angkek, “R lengk-anem atha INGKART renh tnakem.” Ranem renh itnewek Judah. Ikwer-they Leah ra ampa ingwerek arrangkw-anem anek.

30

¹ Rachel ahelirrenh Leah-ek, ampa rantarl atnyenek-they. Rap Jacob renh alharlkwemel ilek, “Ayeng ilweyehn ampeweny-antey.”

² Jacob rarl awek-penh, ra antwerr-anem anenh ilelhemel, “Ayengan arlarl Akngey-wenyarl. Nhenhan Akngey-kenh-angkwarr.”

³ Rachel-el anew renh ilek, “Warrkenh atyenh Bilhah ikngwerl-alpa, ngkweng-itwek ayntetyek, ampa ntwa atnyenetyek ikwer-angkwarr.”

⁴ Rachel-el arelh warrkenh Bilhah ilanthek, Jacob-itwel itengirretyek. Kel ratherr itengirrek, Jacob arelh warrkenh ikwer-itwel ayntek.

⁵ Bilhah ra ampa akely atnyenek, awey akely.

⁶ Rachel renh itnewek Dan alakenh angkemel, “Akngayel ayenh arntarnt-arek, Akngay atyeng awelhek atharl renh ayernek, kel ayenh awey akely anthek.”

⁷ Rachel-kenh warrkenh Bilhah, ra ampa ingwer atnyenek, Jacob-kenh. ⁸ Rachel angkek, “Ayengarl arrkernelhenh, kel angkwerey atyenh

atha antengilek.” Rap awey akely renh itnewek Naphtali.

⁹ Leah iterrek kel ampa anyent ilenh ra atnyenek, ingweran ra atnyeney-angenh, arrangkw-anem. Ra arelh warrkenh ikwerenh Zilpah ilanthek, Jacob-itwel itengirretyek. ¹⁰ Ratherr awey akely atnyenek. ¹¹ Leah angkek, “Nhenh mwerr-angkwarr alakenh.” Ranem awey akely renh Gad itnewek, alakenh aynteyel angka ikwerenhel, “Nhenh mwerr-angkwarr alakenh.”

¹² Zilpah ra awey ingweran atnyenek. ¹³ Leah angkek, “Irrkngerney-anem ayeng aneyel. Arelh ingwer-rnem atyeng angkerreyel, ayengarl irrkngerney-anem aneyelek.” Leah-el renh itnewek Asher.

¹⁴ Kel rernem ntang weyt akwetyemel warkirrek, awey Reuben-el amern mandrake-angketyarr arek, amern irrwarlp-apeny. Kel ra amern mandrake akek, amikw ikwerenh-warl akngey-alpek. Rachel-el Leah renh ayernek, “Avey ngwenhel amern mandrake irrpety ayenh anthey.”

¹⁵ Leah-el renh ilek, “Kel amern mandrake-anemarl ntwa raketyek arrkernelheyel.” Rachel-el Leah renh ilek, “Ntwa amern mandrake ayenh anthem, nga Jacob-itwel iteng ayntey-kety.”

¹⁶ Atwerrp, Jacob kel apey-alpek, amern weyt-angketyarr-they. Leah ikwer anekirrek, angkemel, “Nga lyert atyeng-itwel ayntetyek. Avey atyehel Rachel amern mandrake renh kwartewemel anthek-apeny.” Kel, Jacob Leah-itwek ayntek.

¹⁷ Akngey Leah-ek inkwerelhemel awelhek, rarl renh ayernek, ampa renh anthetyek. Leah-el ampa akely atnyenek, avey anyent. Jacob-kenh avey 5-pel anek, Leah ikwer-angkwarr. ¹⁸ Leah angkek, “Akngey atyeng inkwerelhek, atharl warrkenh atyenh ilanthek, Jacob ikwer ratherr iteng anetyek.” Ranem renh itnewek Issachar.

¹⁹ Leah-el ampa ingwer atnyenek, avey akely. Jacob-kenh avey 6-pel-anem anek, amikw anyent-kenh 6 Leah-ek. ²⁰ Leah angkek, “Akngeyel ayenh ampa akngerr anthemel kwartewek. Anew atyenh atyeng inkwerelhem, aylernekanthenharl avey 6-pel aneyel.” Ranem renh Zebulun itnewek.

²¹ Ikwer-penh Leah-el kwey akely-anemarl atnyenek, renh Dinah itnewek.

²² Akngey Rachel-ek amperrngirrek, irrepernek, rarl renh ayernek, ampa renh anthetyek. ²³ Rachel ra ampa ingweran atnyenek, avey akely. Ra angkek, “Akngey atyeng amperrngirrek irrepernek, ampa ayenh anthetyek. Ingwerel-anem nthakenh ayenh kwanthey-angenh, ayengan ampewenyarl.” ²⁴ Ranem renh itnewek Joseph alakenh angkemel, “Atha Akngey renh ayerney, avey akely ingwer-anemarl ayenh anthetyek.”

Jacob apmer Haran-itwek anenh

²⁵ Joseph, Rachel-kenh avey akely ayntek. Jacob Laban-warl angkek, “Ayenh ntwa tyarlewytyek, ²⁶ ayeng apmer atyenh-warl-anem alpetyek.

Anew atyenh-atherr-then ampernem-then an-wernantherr ingkerrenh alpetyek. Ayeng ngkweng warrkirrek.”

²⁷ Laban-el renh ilek, “Nga atyeng arlkwenty, atyengel-arleng anarl! Artwa tyakel ayenh ilek, Akngeyelarl ayenh arntarnt-arek, ngkweng-angkwarr. ²⁸ Ilek atha ngenh kwartewem, nga inkwerelhetyek?”

²⁹ Jacob-el renh ilek, “Ayeng ngkweng mwerr-angkwarr warrkirrenh. Aker ngkwenh akngerr innaganem irrek. ³⁰ Lyertenyank ayeng apmer nhewarl apetyek yep-yep irrpetyaparl ngkwenh ntwa atnyenek. Anamerl yep-yep ngkwenh akngerrirrek. Akngeyel ngenh arntarnt-arenh, atyeng-angkwarr. Ayeng ipmelheyek warrk nhethay, atyenh-rnem-anemarl atha arntarnt-aretyek.”

³¹ Laban-el renh ayernek, “Ilek atha ngenh antheman, nga nhel atyeng-itwel anetyek? Ilek-angkwarr ngkweng mwerran?” Jacob-el renh ilek, “Kel menty, man-weny. Ngkwelty ntwa ayenh antheyang. Yep-yepel-then nanikwetel-thenant ntwa ayenh kwartewa.

³² Atnwenth irrpowerlant ayenh antha lthweyakw, arkeny-arlkeny. Irrpowerl-rnem-then lthweyakw-lthweyakw-rnem-thenant ayenh antha! Kel ayeng inkwerelhem ilenh-rnemant ntwa ayenh anthentyek. ³³ Ntwa alhengk-aretyek irrpowerl-then lthweyakw-lthweyakwantarl ntwa ayenh antheke, atha ngkwenh anyelkel yep-yep-rnem inentyek, ntwa alhengk-aretyek, yep-yep ngkwenh-rnem, atharl yep-yep ngkwenh-rnem irryertel-inekerr.”

³⁴ Laban ikwer angkek, “Mwerrarl ilenh-angkwarran.” ³⁵ Arlta anyent ikwerel-antey Laban-el atnwenth lthweyakw-lthweyakwrnem-then irrpwerl-rnem-then ikweran amentilek, ikwerenh-rnem ament arrpemarl akngakek. Alerikw ikwerenh-rnem ra arrernek, yep-yep ikwerenh-rnem rernem arntarntaretyek. ³⁶ Laban-el Jacob renh ilek, “Arlta irrpetyel alpa yep-yep ilenh-rnem-akert, nanikwet-rnem-then.”

³⁷ Jacob-el arwerl akek walyenp, arwerl akngerr. Arwerl-penh rltemp alerrkw, lthweyakw-lthweyakw ilemel. ³⁸ Arwerl renh-rnem rnkernek kwaty trough impaltheik, yep-yepel-rnem kwaty-warl apetyentyel arwerl renh-rnem aretyek. ³⁹ Akwerrk lthweyakw-lthweyakw-rnem-then akngerr-anem anek. ⁴⁰ Laban-kenh-rnem lthweyakw-lthweyakw-rnem akngerr arrpemarl. Laban-kenh lthweyakw-lthweyakw-rnem pweytilek ikwerenh-rnem-warl. Akwerrk lthweyakw-lthweyakw-rnem akngerr-anem irrek. Jacob-el muster-emileynek anetyek akngakeynek lthweyakw-lthweyakw-rnemant, ikwerenh-rnem-warl pweytiletyek. ⁴¹ Yep-yep rlterrkrnem-kety arwerl-rneman alperr-akertan rnkernehr arrpemarl ra. Alakenh-anyem Jacob-el arlwerrek ikwerenh-rnem rlterrkingkerr. Laban-kenh-rnem rlterrkwenny-antey. ⁴² Yep-yep-rnem nanikwet-rnem-then mwerr ingkerrenh arntety-weny akngerrirrek ikwerenh. ⁴³ Jacob man akngerr-akert-anem, yep-yep akngerr-akert, nanikwet akngerr-akert,

kamwerl arrpemarl ikweren tangkey akngerr arrpemarl ikweren, artwa warrkenh-rnem akngerr arrpemarl ikweren.

31

Jacob anterreyel ikweren-hrnem-akert

¹ Jacob-el awek Laban-kenh alerikw-rnem ikwer angkerrenharl, Jacob ra man akngerr-akert, yep-yep-rnem-then nanikwet-rnem-then, ampwal-rnem-then. Akngey anwekingkerrenhel renh anthek, rarl akngey anwekingkerrenh-they akngerr inek. ² Jacob-el Laban renh arek, Laban rarl ikwer arlkwenteyang-anemarl.

³ INGKARTel Jacob renh ilek, “Akngey-kenh arreng-kenh apmer-warl nga alpetyek. Ayengan ngkweng-angkwarr alhetyek arrpemarl ilk-watherr.”

⁴ Jacob yangkelhek Rachel-ek-atherr Leah-ek-atherr ratherr ikwer-warl apetyetyek, renh rlwatetyek yep-yep-akert. ⁵ Jacob-el renh-atherr ilek, “Akngey mpwel-kenh atyengety arlkarirreyel-anem. Akngeyel ayenh arntarnt-arek, akngey atyenharl ikwer inkwerelhek.

⁶ Ayengarl warrkirrek mwantyel Akngey mpwel-kenhek. ⁷ Akngey mpwel-kenhel ayenh man arraty anthey-angenh. Akngeyelant ayenh arntarnt-areyel. ⁸ Akngey mpwel-kenhel yep-yep irrpwerl-rnemant, lthweyakw-lthweyakw-rnemant alhelek. Kel rernem-anem akngerrirrek. ⁹ Ilenh-angkwarr Akngeyel atnwenth renh-rnem kel rakek, ayenh-anem anthek.

¹⁰ Kel atha altyerr arek, atnwenth-rnem ingkerrenh. Yep-yep-then nanikwet-rnem-then akngerr innagan anek, lthweyakw-lthweyakw ingkerrenh. ¹¹ Akngey-kenh angel atyeng arlek, ‘Jacob-ay.’ ‘Nhantey ayeng aneyelaw.’ Ayeng ikwer ilelhek. ¹² Angel-el ayenh ilek, ‘Ntwa areyel lthweyakw-lthweyakw ilenh-rnem? Aray! Atharl arek Laban renh, rarl ngenh irrtywer-remel ilek. Atha atnwenth-rnem lthweyakw-lthweyakw renh-rnem mpwarek. ¹³ Aray, ayeng Akngey apmer Bethel-areny. Wetharl ntwa apwert anterel apernek, ayenh arraty ilek. Arraty ntwa ayenh alhelek. Apmer nhenh ntwa iwerlelpetyek, apmer ngkwenh-warl-anem nga alpetyek.’”

¹⁴ Angkwerenheng ratherr Jacob renh ilek, “Akngey-they anwantherr arnkwa akngerr ineyang ikwer-they. ¹⁵ Ingwer-apenyarl anwantherr ikwer arrareyel. Man anwenhantherr anthey-angenh, anwantherrarl itengirrek. Ratherr tyel-angkenh aynikw ikwer-atherrenhek. ¹⁶ Arnkternem ampwal ilenh-rneman aylekenharl ampernem-kenh-then, anwernekantherrenh. Akngey ikwer nga awelhetyekant. Alakenh-anyem akngey aylekenh-they Akngeyel rakek, ngenh-anem anthek, anwantherr-anem renh-rnem atnyenetyek.”

¹⁷ Jacob-el anew-rnem-then ampernem-then kamwerl-warl tywenek. ¹⁸ Rernem alpek aynikw ikwerenh apmer-warl, apmer Canaan-warl. Atnwenth-rnem ingkerrenh ampwal-

rnem-then rarl inek malyikw-they, ra akngeyne-tyek.

¹⁹ Laban-el yep-yep ikwerenh-rnem alta althek-angkwarr, Rachel-el ampwal ikwerenh-rnem anyelkel inerl-alhek. Akngey-arrpantey-rnem, akely-rnem. ²⁰ Jacob Laban ikwerety anyelk-antey alpek. ²¹ Jacob ra Lher Euphrates artarnpenhek, apwert-angketyarr-warl, apmer itnan Gilead, ampwal ingkerrenh-akert.

Laban-el Jacob renh alwerneyel

²² Arlta irrpety-penh, Laban ra Jacob ikwer ywarek. Ingwerentyel Laban renh ilek. ²³ Laban-el Jacob renh alwernek, artwa ikwerenh-rnem-akertel, arlta 7-el, apmer Gilead-ek-atwety. ²⁴ Ingwel Laban-el altyerr arek, INGKARTelar renh ilek, “Alhewer angkey-angenh-antey Jacob ikwer.”

²⁵ Jacob-el kalikw-rnem artek, apmer Gilead ik-werel, apwert-angketyarrel. Laban-el-rnem apmer arrernek, apmer Gilead-itwel arrpemarl, apwert ingwer-ampenyekarl. ²⁶ Laban Jacob ikwer-warl alhek. Rap renh ilek, “Ntwa ayenh irrtywer-remel ilerlelpuk anterrey-alhemel, ampa atyenh atherr-akert. Artwa ingwer-rnem irrtyertawarrarl aneyel-apenyarl ngan! ²⁷ Nga irrtyertelarl anterrek, atyeng ilerlelpay-angenh. Atha ngenh inkwerelhemel menty intwaremer, nga atyeng ilelhentyan. ²⁸ Atha artartey atyenh-rnem arrwanteyey-angenh-antey, ntwa anterrelhilek. Arraty-angkwarr-wenyarl alakenhan. ²⁹ Atharl ngenh atwetyek-anek. Akngey ngkwenh-kenh INGKARTel ayenh artwerilek,

ngkweng apmwangkwarr angkey-angenh, ayenh arternpiletyek. ³⁰ Kel, atha ngenh iterl-arekarl, ngarl alpetyek alharntek akngey ngkwenh-kenh apmer-warl. Ntwa ingkart-arrpantey akely-rnem anyelkel inerlelpek.”

³¹ Jacob-el Laban renh ilek, “Ayeng ngkwengety anyelkel alpek aterel, ntwa alerengkw ngkwenh-atherr anterrkwekerr. ³² Anyentel apek ingkart-arrpantey renh anyelkel inenty, ntwa renh ipmek atwetyek. Ngkwenh-rneman akalty arrpemarl anetyek, ntwarl renh atwemeck. Arnkwa ingwer-rnemarl aynteyel, ntwa kel akngeynetyekan. Jacob apal angkek, iterl-areyang Rachel renh rarl ingkart-arrpantey anyelkel inerl-alhek.”

³³ Laban ra kalikw arrpanenh-warl aylpek, ingkart-arrpantey-rnem aretyek, kalikw renh-rnem arrangkw ywarek, Jacob-kenh, Leah-kenh, arelh warrkenh-atherr-kenh. Rachel-kenh kalikw-warl-anem aylpek. ³⁴ Rachel-el arlengkewek kamwerl saddle-warl, kweneng-apert, Rachel ranem irrwerleng anenh kamwerl saddle ikwerel. Laban nthwek ipantey.

³⁵ Rachel-el Laban renh ilek, “Akngey, atyeng nga ahelirrey-angenh, ayeng intem nhel anayntem. Akapwert ayeng arntety, ayeng nthakenh akemirrey-angenh.” Alakenh-anyem ingkart-arrpantey ikwer-rnem Laban ra ywarek.

³⁶ Jacob ra ahelarl irrekel, Laban renh iltek, “Ilekekarl ntwa ayenhan itwenetilek, atha ampwal-rnem irrtyert-inenty-arrpantey? Atha

anyelkel ingkart-arrpantey renh-rnem akngey-alpenty-arrpanteyan. Ayeng arlarl, atha renh-rnem akngey-alpeyangarl. Ilek ntwa ayenharl alwerneyel? ³⁷ Ntwa apek arek, atharl ampwal-rnem anyelkel akngey-alpek? Ntwarl renh areyalhenty, ntwap renh arrerna akethek, akngerrel aretyek. Anwantherr ikwer angkerretyek, arratyilemel.

³⁸ Iterl-aray, ayengarl ngkweng warrkirrek aherrety 20-ek-atwety. Yep-yep akwerrk-rnem arek ilwey-angenharl mwerr. Ingkerrenh mwerr itethewek. Yep-yep irrwey atha anyelkel ngkwenh iney-angenh, inemel atwey-angenh. ³⁹ Arengk artnwerel yep-yep ngkwenh rlterrp-rlterremel tnhwek, atha yep-yep atyenh impen-anem angkep arrerney nem. ⁴⁰ Itwernek rwenp inngarl, ingwel ayenh irrentelarl atwek ankwayntey-angenh ilek. Aherrety 20-ek-atwety ayeng iylpareth ngkweng warrkirrenh, aylpenyirrey-angenh. ⁴¹ Ayeng ngkweng warrkirrenh aherrety 14-ek-atwety, alerengkw ngkwenh-atherr atha payemelemel. Aherrety 6-ek-atwety ayeng ngkweng warrkirrenh, atnwenth-rnem ingkerrenh payemelemel, ntwa ayenh anthetyek. Ntwa ayenh man mwerr payemeley-angenh, ntwa ayenh man akelyarl anthenh. Akngeyel-anem ayenh arntarnt-arenh, Akngey renharl arrengey atyenh Abraham-el apentek, akngey atyenh Isaac-el apentek. Arrengey atyenh-kenh Akngey Abraham-kenh, akngey atyenh-kenh Isaac-kenh Akngey ra ayenh arntarnt-arenh. ⁴² Ntwa ayenh thwenem apmer ngkwenh-they, ayeng arrangkw

alpetyek, Akngeyel ayenh arntarnt-arem ilenh-angkwarran, ntwa ayenh arrangkw thwenek. Akngeyel ayenh arek, ra atyeng amperrngirrek, ayengarl ngkweng mwerr-angkwarr warrkirrek. Ingwel, Akngeyel angka awerr ngenh anthek.”

⁴³ Laban-el Jacob renh ilek, “Alerey atyenhantherr ntwa atnyeneyel, artartey-rnem-then. Atnwenth atyenhantherr ntwa atnyeneyel. Ampwal atyenhantherr ntwa atnyeneyel, atharl ngenh anthek. Alerey atyenhantherr-then artartey-rnem-then nthakenh atha ngkwengety anterrkwey-angenh. ⁴⁴ Aylanth angkerretyek, mwarrant-atherr aylanth anetyek. Apwert ilperr-ilperr-rnem aylanth arrernetyek, ingkerrenhel aylenthal iterl-aretyek, aylanth mwarrant-atherr anetyek.”

⁴⁵ Jacob-el apwert ilkwa rnkernek. ⁴⁶ Jacob-el ikwerenh-rnem ilek, “Apwert ingwer-anemarl mpwer rnkerney. Apwert ingwer-rnem-anemarl akarriley.” Apwert ilperr-ilperrel ampernemel ratherr amern arlkwek. ...

⁵⁵ Ingwepenh, Laban-el artarteyikw-rnem arrwantyek, kwey ikwerenh-atherr-then. Alpekanem ra apmer-warl.

32

¹ Jacob angkep alpenh. Angel-rnemel renh rlwatek. Jacob-el renh-rnem arek-penh angkek, ² “Nhenh Akngey-kenh apmerarl.” Ra itnewek apmer renh itnan Mahanaim.

³ Esau apmer Seir-el anenh, apmer Edom ikwerel. Jacob-el angkakert atherr thwenek Esau-warl, apmer Seir-warl. ⁴ “Alakenh

ayeng ngkweng awelhem. Laban-itwek ayeng anenh. ⁵ Aleyan atyenh tangkey-rnem-then pwelek-rnem-then yep-yep-rnem-then warrkenh artwernem-then, arelh-rnem-then. Artwa nhenh-atherr atha ngkweng-warl thweneyel, nga atyeng inkwerelhetyek.”

⁶ Angkakert ratherr apey-alpek, ratherr iley-alpek, “Esau nhewarl apetyeyel atningk ingwer-rnem-then.”

⁷ Jacob ater-anem irrek. Aterirremel-anem akngakek, atnwenth-rnem ingkerrenh artwernem-then. ⁸ “Esau-el anyent-ampeny atwentyan ingwer-ampeny-they ikwerety anterremarl.”

⁹ Ikwer-they Jacob Akngey-warl angkek, “Akngay ngenharl arrengey atyenthal apenten, akngay atyenthal apenten. INGKARTay, ntwa ayenh thwenek apmer-warl, atyenthal-rnem aneyel-warl. Ntwa ayenh alhelek, ayenh arntarnt-aretyek, atyenthal-rnem akngerriletyek.

¹⁰ INGKARTay, nga atyeng inkwerelhek, ntwa ayenh ipmey-angenh, aleth-antey arntarnt-arek. Ayeng irrertety atyenthal-akert Jordan Ilpay-angkwarr artarnpenhek. Atyenthal-rnem akngerr innganem aleyant, atnwenth-rnem-then. ¹¹ Atha ngenh ayernem, ayenh awayaty atyenthal-kety Esau-kety arntarnt-ara. Ayeng ikwerety aterirreyel, ra anwenhantherr ingkerrenh-antey atwekerr. Amenheng-rnem ingkerrenh-antey. ¹² Ntwa ayenh alhelek, ‘Atha ngenh arntarnt-aretyek. Atha atyenthal-rnem akngerram-akngerrileyeh. Rernem

akngerr innga aneyenh. Rernem akngerram-akngerrirreyen h antyarr-rnem akngerr alkerel aynteyel-apeny. Ingwer-rnemel ywarn-antey count-emileyen h antyarr-rnem-apeny.’” ...

Akngey-then Jacob-then intewerrenh

²² Ingwa ikwerel-antey Jacob ra akemirrek. Anew ikweren h atherr-akert arelh warrken h ikweren h-atherr-akert alerikw ikweren h 11-pel-akert. ²³ Rernem Jabbok Ilpay-angkwarr artarn-penhek, atnwenth-rnem-then ikweren h ra artarnpelhelek. ²⁴ Kel, ament-areny ra anek. Artwa anyent ikwer-warl apetyek. Ratherr atwerren h ingwepenhek-atwety. Ratherr intewerren h. ²⁵ Artwa ra ikwerant-penh arrkernelhek, Jacob antengileyek. Ra aneny atwek, aneny ngkwern akngenhelhilek. Iytekilemel-anem apmwelek. Ratherr aleth-antey intewerren h. ²⁶ Artwa rap angkek Jacob ikwer-warl, “Ipmanem ayen h, ingwepen h-anem irreyel-kety.”

Jacob angkek, “Nthaken h alpey-angen h, mwerr-angkwarr atyeng angka, Akngeyel ayen h arntarnt-aretyek!”

²⁷ Artwa ra ayernek, “Ilek itna ngan?”

Jacob ra ilelhek, “Ayengan Jacob-arl.”

²⁸ Artwa ra ilek, “Itnan ngkwenn h Jacob-weny-anemarl, ngarl Akngeyek arrkernelhen h artwernem-then. Ingkerrenhel ngen h itnew-ayntem Israel-ant-anem.” Angka ikwer-rnem-kenhel-anem Israel aynteyel, “Ratherr Akngey-then intewerren h, antengileyek-arrpan tey.”

²⁹ Jacob-el renh ilek, “Nganem itna itnewelha atyeng!”

Artwa ra tyernek, “Nthakenh ntwa ayenh iterlarey-angenharl, ra mwerr-angkwarr mpwarek.”

³⁰ Jacob-el apmer renh Peniel itnewek, angka ikwerenhel. Alakenh-anyem aynteyel, “Atharl Akgrey renh arek, ra ayenh ipmek atwey-angenh.” Alakenh-anyem aleyan aynteyel itnan

³¹ Ingkeny kel tyerrelhek-anem. Ra iyternemel-anem alhenh, aneny ngkwern renh tyerrek-kety. ³² Alakenhaym-kety Israel-kenh-rnemel apmelerr aker aneny-penh nthakenh arlkwey-angenh atnwenth-penh.

33

Jacob-atherr Esau-atherr mwarrant-atherr anek

¹⁻² Jacob-el Esau renh arnarek, irlkenty akngerr-akert, artwa 400, ikwer-warlarl apetyenh. ... ³ Jacob ra ingkerrenh-itwek arrwekel-ampeneyel. Ra kwenirrek akngerr-inger arrwekel, rarl kakey ikwerenh-warl alhenhel. Jacob-warl. ... ⁴ Esau Jacob ikwer-warl anterreke, renh anterrkwemel renh arrwantyemel. Ratherr atherr-antey artnek. ...

35

Benjamin avey akely atnyeneyel, Rachel il-weyel

¹⁶ ... Jacob ikwerenh-rnem-akertel Bethel ikwer-they alpek. Rernem apmer Eprath-they arleng-antey alpenh. Rachel ra arntety awel-henh. ¹⁷ Arelh warrkenh rarl Rachel renh arntarnt-arenh. Arelh ra Rachel renh ilek, “Ntwa

awey atnyeneyel.” ¹⁸ Rachel ra ilwetyek-anem irrek, ra awey renh itnewek Ben-Oni. Rachel kel ilwek. Aynelikw ikwerenhh renh itnewek Benjamin. ...

Isaac ilwek-anem

²⁷ Jacob ra alpek aynikw ikwerenhh apmer-warl, apmer itnan Hebron, itna ingweran Mamre, Kerath Arba-they arrer. ²⁸ Aherrety 180 ra anenh. Isaac ra ilwek. ²⁹ Alerikw ikwerenhh atherr Esau-el, Jacob-el atherr renh apmer-itwek akwernek, rarl ilwek. ...

37

¹⁻² Jacob ra apmer Canaan-itwek anenh, aynikw ikwerenharl Isaac anenh-itwek. Angka nhenh Jacob-kenh-rnem-akert.

Joseph-el altyerr areyel atherr-inger

Joseph aherrety 17-anem anenh. Yep-yep-rnem-then nanikwet-rnem-then arntarnt-arenh, atherrk-warl ra akngenh, apmer Shechem-itwek. Kakey ikwerenhh-rnem. Aynikwel Joseph thwenek awayengkw-rnem-warl, “Alha yep-yep-rnem arntarnt-arayntetyek.” Joseph awayikwel-rnem-then yep-yep-rnem arntarnt-arek. Amikw ingwer atherr-kenh Bilhah-kenh-rnem, Zilpah-kenh-rnem. Jacob-kenh anew atherr-kenh. Joseph-el aynikw ikwerenhh angka apmwa ikwer-rnem ilenh. ³ Jacob Joseph-ekant inkwerel-hek alerikw ingwer-rnem-theyan, rarl ingker-neny ikwerenhh. Arnkwa arlkeny ingwerek-ingwer-akert aylpey-angker ra anthek. ⁴ Joseph-kenh awayikw-rnem ikwer ahelirrek, ikweran-

tarl aynikw inkwerelhenh-kety, arnkwa mwerrangker anthek-kety. Rernem ikwer-itwek angka mwerr angkerrey-angenh-anem.

⁵ Ingwer-ingerelan Joseph-el altyerr-anem arek. Ra awayikw-rnem ilek, rarl altyerr arek. Rernem ikwer ahelirrek. ⁶⁻⁷ Joseph angkek, “Atyeng arringkerr awelhenherrarey. Anwingkerr atherrk weyt-rnem arlwarey-arlwarey akwetyemel arertneynenh, ataperrelemel arraty rnker nemel. Atherrk ntang weyt-akert ataperr arlwa atyen h arraty rtnek. Ataperr arrekingkerrenhan ikwer kwenirrekarl, atyetyartekarl kwenirrem-apeny.”

⁸ Awayikw-rnem ingkerrenh-antey ikwer angkek, “Nganang ngay Atyetyart anwe kingkerrenh aneyel?” Rernem ikwer ahelanem irrek, rarl angka renh ilekek, ntang weyt-penh.

⁹ Joseph-el altyerr ingwer-anem arek. Ra awayikw-rnem angka ilek, rarl altyerr arek, “Ingkeny-then alkent-then antyarr 11-pel, rernem atyeng kwenirrek Atyetyart-apeny.” Joseph-el ikwer-rnem anayntiley-angenh-antey.

¹⁰ Ra aynikw ilek, rarl altyerr renh arek. Aynikw ikwer ahelirrek. “Ilek lap ran alakenh aynteyel? Ayeng amengkw awayengkw-rnem-then ngkweng kwenirretyek Atyetyart-apeny?”

¹¹ Awayikw-rnem ikwer ahelirrek. Aynikw ikweren h aleth-antey iterrenh, ywarn-antey, rarl angka renh ilekek.

Joseph-kenh awayikw-rnem ikwerety arlkarir-reyel

12-13 Awayikw-rnem alhek, yep-yep-rnem-then nanikwet-rnem-then arntarnt-aretyek, apmer Shechem-itwek. Aynikwel Joseph thwenek, “Awayengkw-rnem-warl alha.” Joseph-el renh ilek, “Kel, mwerr.”

14 Aynikwel renh ilek, “Awayengkw-rnem arerl-alpa, iley-alpemel atyeng-warl, mwerr yep-yep-rnem rernem arntarnt-areyel.” Ra renh thwenek Hebron arterterr-they apwert irrkerrel-atherr ayntek, ahern arterterr am-pepel aynteyneyel. Joseph apmer Shechem-warl alhenh amern weyt-angketyarr-angkwarr.
15 Artwa anyentel renh ayernek, “Ilekek nga nthwerl-alpeyel?”

16 Joseph-el ilek, “Ayeng nthwerl-apeyel awayaty atyenh-rnemek. Ntwa apek arek renh-rnem? Nthenh-angkwarr rernem alhekan yep-yep-rnem-akert?”

Artwel ilek, “Rernem anper-antey alhek.
17 Apmer nhenh arrangkw-anem. Atha renh-rnem awek, rernemarl angkerrenh apmer Dothan ikwer-warl alhetyek.” Joseph-el awayikw ikwerenh-rnem arek apmer Dothan ikwer-itwek.
18 Awayikwel-rnem renh arnarek, rernem ikwer angkerrek, renh atwetyek.

19 “Yanh ra apetyeyel altyerr arey-angker, tnakelherl-aney-angker. Atyetyart ilelherl-aney-angker! Mpa, anwingkerr ywerrelhemel atwey!
20 Anwingkerr renh irrkewarl iwey, ingwer-rnem-warl ilerl-anemel atnwenth ahelengkwel renh arlkwenty-arrpantey. Ran ilwentyel, rap atyetyart aney-angenh-anemarl!”

²¹ Reuben ra awek rernemarl ikwer angkerrenh atwetyek. Ra arrkernelhek renh-rnem iletyek menty ra anetyek, atwey-angenh. ²² Ra angkek, “Apmer arlpaw-warl renh akngey, irrka ilkwewarl renh iwetyek.” Ra ikwer iterrenh aynikw-warl akngeynetyek-antey irrkewarl twenty-penh, renh ayerrpiletyek.

²³ Joseph awayikw-warl apetyek. Rernem arnkwa arlkeny-angketyarr lhelhek, ²⁴ Irrka ilkwewarl renh iwek. ²⁵ Joseph-kenh awayikw-rnemel amern-anem arlkwenh. Rernem arek Ishmael-areny-rnem apetyenty apmer Gilead-they. Kamwerl-rnemel ampwal ilek-ilek akngetyen Egypt-warl.

²⁶ Judah-el ilek, “Ilekek anwingkerr aytey anwekingkerrenh atwerl-ayntem?

²⁷ Anwingkerr tharlemiley weker-rnem-warl kamwerl-angketyarr yanh-rnem-warl, weker-rnem-warl.”

²⁸ Joseph-kenh awayikw-rnemel renh tharlemileyek weker-rnem-warl. Irrkethey tyerrek. Weker-rnemel renh payemelek, ngkwelty 20-pel-ek. Rernem Joseph renh akngek apmer Egypt-warl.

²⁹ Reuben irrkewarl apetyek, ra arrangkw-anem arey-alhek. Arnkwanem ikwerenh ilterrek, arralty-anek. ³⁰ Ra awayikw ingwer-rnemek angkek, “Avey ra ywerrek irrkethey. Nthakenh-anem ayeng irreman?”

³¹ Joseph-kenh awayikw-rnemel nanikwet atwek, arrkngewarl-anem pwerlpewek, arnkwa arlkeny-angketyarr renhan. ³² Arnkwa arlkeny-angketyarr renh rernem aynikw-warl

akngeynek, arrkngenp. “Arnkwa nhenh aray! Alerengkw akely ngkwenh-kenh apek!”

³³ Artwamp Jacob ra alhengk-arek, “Alerey atyenh-kenh yanhan! Arnkwa arlkeny-angketyarr atharl alhengk-areyel, atnwenth ahelengkwel renh arlkwek apek!”

³⁴ Apmer-itwek amperrngirrek arleng-alenty, ra arnkwa ikwerenh ilterrek. Ra arnkwa apmwel-anem aylpek, amperrngirremel.

³⁵ Rernem ywarn-antey arternpiletyek ikwer arrkernelhenh. Artwamp ilelhek, “Ayeng aleth ikwer artnayntem ilwetyek-atwety.” Aleth-antey artnenh. ³⁶ Weker-rnemel Joseph renh tharlemilek, artwa Potiphar-warl. Potiphar Atyetyart anek artwa ahelengkw Egypt-areny-rnemek. ...

39

Joseph ra aneyel Potiphar-kenh warlel

² Joseph ra anenh Potiphar-kenh warlel.

³ Potiphar ra iterl-arek INGKARTelarl Joseph renh arntarnt-arenh, INGKARTel renh ilek-ilek anthek ampwal-rnem. ⁴⁻⁵ Potiphar-el renh arrernek ampwal ingkerrenh arntarnt-arayntetyek warl ingkerrenh, ranem Atyetyart-apeny anenh, Potiphar renh arrernek-angkwarr. Joseph rarl Potiphar-itwek warrkirrenh mwerr-angkwarr Potiphar renh INGKARTel arntarnt-arek arrpemarl. Ra ilek-ilek warrkirrenh Potiphar ikwer.

⁶ Joseph-el ilek-ilek ingkerrenh arntarnt-arenh. Potiphar atnaratyirrek, amernekant iterrenh.

⁷ Joseph inngeerr mwerr anenh. Potiphar-kenh

anew Joseph ikwer iterrenh, Joseph-ek iytenyir-rek, ywarn-antey. Arelh ra renh ayernek, ikwer-itwek ayntetyek.

⁸⁻⁹ Joseph menty angkek, “Kel, menty! Ayeng ilkelhey-angenh. Anew ngkwenh mwerr atyeng aneyel. Rarl ayenh arrernek, warl atha arntarnt-arayntetyek, warrkenh-rnem-then, ampwal-rnem-then. Nthakenh atha INGKART-angkwarr apmwel-areth mpwarey-angenh.” ¹⁰ Arelh ra aleth-antey ayernenh renh, ikwer-itwek ayntetyek. Joseph ra arelh ikwer awelhey-angenh, arlkarirrenh.

¹¹⁻¹² Arlta anyentel, Joseph ra alhek, warl Potiphar-kenh-warl warrkirretyek. Potiphar-kenh anewikwel arnkwethey-anem renh anterkwemel ilek, “Nga atyeng-itwek ayntetyek.” Joseph ra warl-they anterrekk. Arelh ra renh arnkwa aleth-antey anterrkwenh. Warrkenh ingwer-rneman warl kwen aney-angenh arrangkw, arelh rantarl anenh.

¹³ Arehel renh arek, rarl anterrenh, arnkwa ikwerenh iwerl-alhemel. ¹⁴ Arelh ra warrkenh-rnemek arlkelhilek, “Artwa Hebrew yanh arenherr-arey, rarl anenhantherr kwantheyel. Ra apmwel-areth mpwaretyek atyeng arrkernelhek, ayeng ikwerety arlkekarl. ¹⁵ Rarl ayenh awek, ayengarl arlek, ra aketh-warl anterrekk, arnkwa ikwerenh iwerl-alhemel kwen-itwek-antey.”

¹⁶ Potiphar-kenh anewel arnkwa renh atnyenenh, Potiphar ra apey-alpetyek-atwety. ¹⁷ Arehel irrtywerremel ilek, “Artwa Hebrew warrkenh yanhan arrkernelhek, ayenh mpweny

inetyek. ¹⁸ Ayeng ingwer-rnemek arlkek. Artwa ra aketh-warl-anem anterrek, arnkwa ikweren h iwerl-alhemel.”

¹⁹ Potiphar ahelirrek-anem, ²⁰ Joseph renh tyayl-warl akwernek, Pharaoh-kenh artwa ingwer-rneman tyayl-itwek anenh-warl. Joseph ra tyayl kwenel anenh, INGKARTel renh aleth-antey arntarnt-arenh.

²¹ INGKARTel Joseph renh arntarnt-arenh tyayl-itwek aleth-antey. Atyetyart tyayl-arenyel Joseph renh arntarnt-arenh arrpemarl. ²² Atyetyart tyayl-areny Joseph ikwer Atyetyart-anem ra arrernek tyayl-areny ingwer-rnemek anayntetyek. ²³ INGKARTel Joseph renh arntarnt-arenharl, atyetyart tyayl-arenyel Joseph ikwer atnaratyirrek.

40

Joseph tyayl-itwek aneyel

¹ Pharaoh-kenh warrkenh atherr, anyent wayn anthey-angker, warrkenh ingwer amern amperney-angker. ² Ratherr apmwelhelek. Pharaoh ikwer-atherr ahelirrek. ³ Atyetyartel artwa ikweren-hrnem ilanthek warrkenh renh-atherr tyayl-warl akwernetyek. Renh-atherr atherr-antey tyayl anyent-warl akwernek, Joseph-arl anenh-itwek. Rernem arleng-alenty aleth innga anenh. ⁴ Atyetyart tyayl-arenyel Joseph renh ilanthek, ra artwa renh-atherr arntarnt-arayntetyek tyayl kwen. ⁵ Ingwa anyentel artwa ratherr atherrel-antey altyerr arek. Akngey ingwerant atherr ratherr arek.

6 Ingwepenh Joseph ra alhek, artwa renh-atherr aretyek. **7** Ra renh-atherr arey-alhek, ratherrarl iterrenh artewentyel. Joseph-el renh-atherr ayernek, “Ilek mpwelanth artewentyel iterreyel?”

8 Ratherr angkek, “Akngay aylanth arek, ingwer-rnemel apek aylekanth anayntileyang angka renh.”

Joseph-el ilek, “Akngay rant angka arratyan iterl-areyel. Akngay arek-penh atyeng ilenherr-atherr atha apek iterl-aretyek.”

9-10 Warrkenh wayn anthey-angker ra Joseph renh ilek, “Aylpa irrpety atha arek grapes-itwek, amern-angketyarr irrpety-antey. **11** Pharaoh-kenh irrkwa atha atnyenetyek grapes-rnem iltyel anterrkwenhemel grapes-penh akarr irrkwa ikwer-warl thelhemel. Pharaoh renh-anem anthek, ra antywetyek.”

12 Joseph-el ikwer anayntilek, “Atha ngkweng ingkerrenharl iley, ilekarl ra aynteyel, aylpa irrpety yanhan, arlta irrpety-apenyarl. **13** Arlta irrpety-penhan Atyetyartel ngenh aketh-warl tyarleweyenh. Ntwa warrkenh ikwerenh arrpemarl anem, wayn arrpemarl anthayntetyek, ntwa awank-akerr anthenh-angkwarr-apeny.”

14 Joseph-el renh ilek, “Nga tyerrelhentyelan tyayl-they, Pharaoh renh ila, ra ayenh tyayl-they tyarlewetyek. **15** Artwa ingwer-rnemelan ayenhan anyelkel inenh Hebrew-kenh apmer-apeny-they. Ayeng nharl tyaylel aneyel, atha apmwel-areth mpwarey-angenharl. Ayengan arlarl.”

16 Warrkenh amern amperney-angker ra altyerr ikwerenh-anem ilek Joseph-warl, rarl ingwel arek, Joseph-elarl arraty-angkwarr anayntilek. Ra Joseph renh ayernek, ilekekarl ra altyerr arekek. Atha altyerr arek arrpemarl. **17** Amern-akert amernek-arelh irrpety akngeynenh akapwert irrwerlel. Thip-rnemel amern renh-rnem arlkweynenh amernek-arelh irrpety ikwer-itwek.

18 Joseph-el renh ilek, “Alakenh-anyemarl angka yhanhan aynteyel, amernek-arelh irrpety yhanhan arlta irrpety-apeny aynteyel. **19** Arlta irrpety-penh Atyetyartel ngenh ita rlweth-akem, inkwartey arreylpel. Ipma aylpar-arrerneynenh arwerl arlpenty irrwerl-warl. Thip-rnemel tyelk ngenh arlkwayntetyek.”

20 Arlta irrpety-penh Pharaoh-el amern tyenkerr arlkwenh warrkenh ikwerenh-rnem-akertel. Ra warrkenh ikwer-atherr yangkelhek, ratherr kwenty renh atyenhietyek, rernem amern tyenkerr arlkwetyek ingkerrenhel-anem. **21** Warrkenh wayn anthey-angker arrernek arrpemarl, ra warrkirretyek arrpemarl, ra warrk renh antheynek arrpemarl. **22** Artwa amern amperney-angkeran ra ingwer-rnem ilanthenh renh ipmek atwetyek, ipma aylpar-arrerneyenh arwerl arlpenty irrwerl-warl, Joseph-elarl ilek-angkwarr. **23** Ingkerrenh-angkwarr ayntek Joseph-elarl ilek-angkwarr-antey. Warrkenh wayn anthey-angker ra iyelpirrek. Atyetyart renh iley-angenh-antey, Joseph renh tyayl-they tyarlewetyek.

41*Pharaoh-el altyerr areyel*

¹ Aherrety atherrel Joseph ra tyaylel anen. Pharaoh ra altyerr arek. Akngey ra arekan, Nile ilpay impalthel ra rtnenh. ² Pwelek-rnem anter-akngerr 7-pel tyerrelhey-ayntek kwaty-they. ³ Kel aremel pwelek 7-pel ngkwernant-anem kwaty ikwer-they-antey arrpemarl tyerrelhey-ayntek. ⁴ Pwelek ngkwernant-rnemel pwelek anter-akngerr-rnem akwernek-anem. Pharaoh ra akemirrey-ayntek-anem, rarl altyerr arek-penhan.

⁵ Ankwa arrpemarl aynteynek, altyerr ingwer-anemarl arek. Ra ntang ilkwernem arek. ⁶ Ingwer-rneman arleny aynterrk-rnem. ⁷ Arleny-anterrk-rnemel ntang ingwer-rnem kwernek. Pharaoh akemirrey-ayntek arrpemarl altyerr renh arek-penhan.

⁸ Ingwepenh Pharaoh ra artewentyel iterrek. Artwa ingwerek-ingwer-anem yangkelhek, ra renh-rnem ayernetyek, rarl altyerr arek-pen. Ngangker-akert-rnemek ra yangkelhek. Ywarn-antey ra renh-rnem ayernek. Rernem ikwer arraty anaytiletyek-arrpantey, ywarn-antey rarl altyerr arek.

⁹ Artwa warrkenh wayn anthey-angker ra. Ra angkek, “Ayeng iterl-arelhek-anem, atharl apmwel-areth mpwarek. ¹⁰ Pharaoh aylernek ahelirrek, tyayl-warl akwernek. Aylernanth arey-alhek Hebrew anyent, tyayl kwen-itwek. ¹¹⁻¹² Aylernanth atherrel-antey altyerr arekan.

Hebrew rant arraty innga ilek, aylernantharl altyerr arekan. ¹³ Ayeng warrk-warl alpek, amern amperney-angkeran atwekarl, Hebrew rarl ilek-angkwarr-antey. Arraty inngarl ra ilenhan, Hebrew ran.”

¹⁴ Pharaoh ra Joseph ikwer yangkelhek, renh ra ayernetyek, rarl altyerr arek-penh. Artwernemel Joseph renh tyayl-they tyerrek. Ra althelhek, arnkwa mwerrel-anem aylpemel, Pharaoh ikwer-warl-anem alhek.

¹⁵ Pharaoh ra ilelhek, “Atharl altyerr arekan, ingwer-rnemel atyeng anayntiley-angenh. Ngenhant atha awek, mwerr inngan, anayntiley-angkeran.”

¹⁶ Joseph ikwer-warl ilelhek, “Athan iterl-arey-angenharl, Akngeyelant anayntilem.”

¹⁷ Atyetyart ra ilelhek, “Ayeng ilpay-itwel rtnenh, atharl altyerr arek, ¹⁸ pwelek anter-akngerr 7-pel kwaty-they tyerrelhey-ayntenty. ¹⁹ Ikwer-penhan atha arek, pwelek ngkwernant-rnem kwaty ikwer-they-antey tyerrelhey-ayntenty arrpemarl. ²⁰ Pwelek ampwel-rnem pwelek anter-akngerr-rnem kwernek. ²¹ Rernem arlkwek-penhan, rernem ngkwernant irrkaty-antey anenh. Ayeng akemirrenhey-alpek, anamerl-antey.”

²² “Atharl altyerr arek ntang 7-pel mwerr-angker ilkwernem. ²³ Ikwer-penhan atha arek ntang arleny aynterrk-rnem-anem.

²⁴⁻²⁵ Ntang arlenyel-rnem ntang mwerr-angker ilkwernem kwernek. Atha altyerr renh ilek

ngangker-akert-rnem-warl, rernem atyeng arraty iletyek-arrpantey, rernem iterl-arey-angenh arrangkwarl.”

Joseph-el ikwer anayntilek, “Altyerr yanh arek, ntwa arekan, irrkant-atherr aynteyel. Akngeyel ngkweng lwewarrerneyel, rarl alakenh-anyem mpwareyenh. ²⁶ Aherrety 7-pelant ntwa arlkweman, pwelek anter-akngerr arlkwem-apeny, alakenhaym ra aynteyelan. Alakenh-anyem ntwa ntang arleny 7-pel arlkwey-angenh, ntwa aherrety 7-pel arlengelan arlkwey-angenh arrpemarl. Aherrety 7-pelant ntwa arlkweman, ntang mwerr-angker ntwa arlkwem-apeny. Alakenh-anyem ra aynteyelan. ²⁷ Pwelek 7-pel ampwernem, aherrety 7-pel apmwernem-apeny arrpemarl, pwelek 7-pel anter-akngerrrneman aherrety 7-pel mwerr-rnem-apeny, aherrety atherrk-angketyarr, atherrkeny. Nthakenh arlkwey-angenh arlenyelan. Alakenh-anyem ntwa pwelek ampwerneman arlkwey-angenh, ntwa aherrety 7-pel arlenyelan arlkwey-angenh arrpemarl. 7-pel aherretyel aherrety ilkwa aynteyenh amern lyapey-angenh.

²⁸ Akngeyel lwewarrernek altyerr-angkwarr rarl alakenh-anyem mpwareyenh. ²⁹ Aherrety mwerr-angker 7-pel aynteyenh apmer Egyptel, amern-angketyarr. ³⁰ Aherrety apmwernem 7-pel aynteyenh Egypt ikwer-itwek-antey. Amernek ywarn iterreyel, amern arrangkw. ³¹ Aherrety apmwel rernem angayakw irreyenh, amern-wenyl. Rernem aherrety mwerr-rnem ingkerrenh iylpelirreyenh. ³² Akngeyel lwewarrernek, ntwa alakenh-anyem iterl-aretyek, rarl

alakenh mpwareyenh.

33 Artwa mwerr innga arrerney-areny Egypt-itwek Atyetyart ingkerrenhek anayntetyek.

34 Artwa ingwer arrernem, rernem amern-rnem arntarnt-arayntetyek. Rernem ntang akngerr innga inetyek aherrety 7-pel apmovernem-kety, amern-angketyarr rernem arntarnt-aretyek, amern akngerr arlkwemel.

35 Arlwarey-arlwarey akwernem warl ilkwewarl, rernem ikwer-penh arlkwayntetyek aherrety apmovernem 7-pelek-atwety, amern ingkerrenh ywerremel. Ingkerrenh-antey iteth anetyek-awaty amern ntang akngerr arlkwemel.

36 Rernem amern renh arrernekk aherrety 7-pel ikwerel, amern-weny irrentyek, amernek apatentyek.”

37 Pharaoh ingwer-rnemek inkwerelhekan, ntang-rnem arrernetetyek amern-weny irrentyek.

38 Pharaoh angkek, “Warrkenh mwerr-angker anwantherr arrernem Joseph-arl, ran Akngey-kenh itnweng-akert.”

39 Pharaoh-el Joseph renh ilek, “Akngeyel ngenh akaltyilek, ntwa alakenh-anyem mpwaretyek, ntwa ingkerrenh-angkwarr iterl-areyel ngan mwerr innga ingwer-rnem-theyan. **40** Atha ngenh Atyetyart arrernem apmer ntwa arntarnt-arayntetyek. Ingkerrenh ngkweng awelhetyek. Ayengant Atyetyart ngkweng anayntem.”

Pharaoh-el Joseph renh arrernekk, atyetyart Egypt-areny-rnemek

41 “Atha ngenh Atyetyart arrernem Egypt-itwek, Egypt-areny-rnem ingkerrenhek.”

⁴² Egypt-areny Pharaoh ra ampwal iltyek-arelh gold-penh mpwarekarl iltyethet yhelhek, Joseph iltyewarl arrernek. Arnkwa mwerr-rnem-then anthek ra aylpetyek. Tyeyn itek-arelh gold-penh mpwarekarl Joseph-warl tyeyn arrernek. ⁴³ Joseph renh pakey mwerr-angker anthek, ra alhayntetyek ikwerel. Ingkerrenh ikwer arlek, “Iwerr arnangelhenh-arey Joseph ikwer.” Alakenh-anyem Joseph ra Atyetyart anen Egypt-areny ingkerrenhek.

⁴⁴ Pharaoh-el Joseph renh ilek, “Ayeng anyent Atyetyartan ingkerrenh ngkweng awelh-ayntetyek, ayengan atyetyart arrwekel, ngarl Atyetyart atyeng-theyan.” ⁴⁵ Ra Joseph renh itnewek Zapenath Paneah. Joseph ra anew inek, Potiphera-kenh alerikw, itnan ikwerenh Asenath.

⁴⁶ Joseph ra aherrety 30 anek, Pharaoh-el Atyetyart arrernek Egypt-areny ingkerrenh ra arntarnt-aretyek. Ra ingkerrenh-angkwarr arntarnt-arerl-apenh, warrk-itwek. ⁴⁷ Aherrety 7 ingweran anek, mwerr-angkerarl. Amern akngerr rernem arlkwenharl. ⁴⁸ Ntang ingkerrenhel ra inek-penhan ra renh-rnem warl ilkewarl arlwarey-arlwarey arrernek, tawen ilkwernem-itwek, ntang renh-rnem ra arrernek ingkerrenh arlkwayntetyek. ⁴⁹ Joseph-el ntang arlwarey-arlwarey akngerr arrernek, nthakenh ingwer-rnemel count-emiley-angen.

Joseph-kenh alerikw atherr

⁵⁰ Arrwekel-antey amern ingkerrenh ywerrey-alenty, Joseph-then anew ikwerenh-then

ratherr awey atherr ikwer-atherrenh anek.
 51 Arrwekele ny itnewek Manasseh, alakenh angkemel, “Akngeyelarl ayenh arntarnt-arek, ayeng iterrey-angenh arrangkw-anem, ayeng apmerek alharnteay-angenh anem.”
 52 Avey ingweran itnewek Ephraim-arl alakenh angkemel, “Akngeyel ayenh ampa akngerr anthek, apmer ikwer-itwek rlterrk innga atyeng ayntenh-itwek.”

Amern-weny rernem anen

53 Aherrety 7-pel mwerr-rneman ywerrenhek-anem. 54 Aherrety 7-pel ingwer apmwernem ayntek, amern-weny-rnemarl, Joseph-el ilek-angkwarr-antey. Apmer ingkerrenh-itwek, amern lyapey-angenh ayntek. Apmer aparn-pel. Amern akngerr-antey Egypt-itwek ayn-tenh. Egypt-itwek rernem angayakw-anem irrek, amern-wenyel. 55 Rernem Atyetyart Pharaoh renh ayernenh amernek. Ra angkek, “Joseph ayerneyek alhenherr-arey, ra arrenhantherr amern anthetyek. Arrantherr ikwer awelheyek alhenherr-arey, rarl arrenhantherr ileman.”
 56 Ra amern-weny-anem irreynenh, ra apmwa innaganem ayntek, amern-wenyel. Joseph-el warl ilkwa altywerilek, amern-anem Egypt-areny-rnem tharlemilek, rernemarl angayakw irrek. 57 Apmer arrpanenh-they Egypt anyent ikwer-warl akarrirrek, amern-angketyarr-warl. Aherrety apmwa apmer arrpanenh-itwek-anem ayntek, amern-weny arrangkw, amern lyapey-angenh.

42

Joseph-kenh awayikw-rnem apmer Egypt-warl alheyel amernek

¹ Jacob-el awek ntang weyt-angketyarr apmer Egypt-itwek, angkemel, “Ilek arringkerr apatemel aneyel? ² Atha awek Egypt-an ntang weyt-angketyarr. Arringkerr ingkerrenh alhenherr-arey Egypt ikwer-warl ntang weyt inerl-alpetyek, angayakwirrekerr.”

³ Joseph-kenh awayikw 10-pel alhek apmer Egypt-warl. ⁴ Jacob-el alerikw akelyan thweney-angenh. Anterrkwek apmer-itwek-antey. Ra aterirrek atwekerr apek renh. ⁵ Jacob-kenh-rnem anyentirrenhek angayakw ingwer-rnem-angkwarr, Egypt-warl rernem alhek.

⁶ Joseph ra Atyetyart anenh apmer-rnem arntarnt-arayntetyek, ntang weyt-rnem arlper-ptyilemel anthayntetyek. Awayikw ikwerenhrnem apetyek ikwer-warl, kwenirrey-alhemel ikwer-itwek.

⁷⁻⁸ Rernem Joseph renh alhengk-arey-angenh, rant renh-rnem alhengk-arek, ra ingwer-arrpantey anenh. Ra renh-rnem iltek, “Nthenh-they arringkerr apetyek?”

“Anwingkerr apmer Canaan-they apetyek, ntang weyt inerl-alpetyek, amern-weny-kety,” rernem renh ilek.

⁹ Joseph ra iylpangkek, rarl altyerr awank arek, “Arringkerr arlwarrernerl-ayntetyek, ahelengkw-rnem apek.”

10 Rernem angkek, “Arrangkw anwingkerran arwarl apetyek, amern ntang weyt-angketyarr-warl, amern-weny-kety. **11** Anwingkerr ingker-renh artwamp anyent-kenh-antey. Anwingkerr arraty ileyel, irrtiywerremel iley-angenh. An-wingkerr iylpareth inngarl, irrtiywerremel iley-angenh.”

12 Joseph-el renh-rnem ilek, “Arringkerr apmer renh arlwarrernerl-alpetyek, arringkerr irlkenty-akert apey-alpey-alenty, apmer nhenh-itwek atwetyek-anem.”

13 Rernem Joseph renh ilek, “12-an anwingkerr anekan, artwamp anyent-kenh-antey. Akelyan artwamp anwekingkerrenh-itwek anerl-anem Canaan-itwek. Anyent ingweran ilwekarl.”

14 Joseph-el renh-rnem itwengetilekan, “Arringkerr artwa ahelengkw-rnem apekan.

15 Alerl atha arrenhingkerr iterl-arey-tangkwel, artwa ahelengkw-rneman. Atyetyart Pharaoh iteth aneyel-apeny, arringkerr apmer nhel anetyek, aytey arrekingkerrenh ra apetyeyek-awayt. **16** Anyent apmer-warl alpey ayteyikw inerl-alpetyek atyeng-warl akngetyemel. Awayikw ingwer-rnemarl tyayl-itwek anenherr-arey.” **17** Ra renh-rnem tyayl-ek ingkerrenh akwernek, rernem arlta irrpety tyaylel anek.

18 Joseph-el renh-rnem ilek, “Ayeng Akngeyekant iterreyel. Alerl-apeny atha arrenhingkerr ipmem. Anyent ingweran tyayl-itwek anayntem. **19-20** Arringkerr ilelhek, arringkerr artwa mwerr akwel. Arringkerr atyeng mwerr-angkwarr awelhenty, atha

arrenhingkerr ipmek atwey-angen. Arringkerr aytey arrekingkerenh ikngwerl-alpa atyeng-warl akngetyemel, atha renh aretyek. Atha renh arenty, athap arrenhingkerr iterl-arem, arratyarl ileyel atyeng.”

²¹ Ikwer-penhan rernem angkerreh, “Akngeyel anwenhingkerr atwem, anwingkerrarl Joseph renh awank irrkewarl iwek-penh.”

²² Reuben angkek, “Atha arrenhingkerr ilek, awey atwey-angenhek. Arringkerr atyeng awelhey-angenharl, Akngeyel anwenhingkerr atwemant-anem.” ²³ Rernem iterl-arenh Joseph-el-arl angka ikwer-rnem-kenh awey-angenh-arrpantey. Joseph angkenh angka Egypt-areny-kenhel, artwa ingwerelarl angka anayntilek ikwer-rnem. Rernem ikwer iterrenh iylda arwengkek-arrpantey, angka ikwer-rnem-kenh awey-angen.

²⁴ Joseph intwemelirrek, artnemel-anem. Ikwer-penhan ra angkek arrpemarl ikwer-rnem-warl. Ikwer-penhan ra warrkenh ikwerenh ilanthek, ra Simeon rwepel arertnetyek.

²⁵ Ikwer-penhan Joseph-el warrkenh ikwerenh thwenek, ayteyikw ikwerenh-warl alhetyek, yakweth-warl man angkep irryert akwernetyek ikwerenh, angkep antheynetyek ikwer, rarl amern payemelek. Ra ntang-rnem yakweth arrpanenh arrerneynek, ntang-rnem-then manrnem-then. ²⁶ Rernem ntang tangkey-warl tywenek, alpek-anem rernem.

²⁷ Ingwel rernem ayntey-alpek ampepel. Artwa anyentel yakweth altywerilek, man-akert tangkey wantetyek, rap man amern-akert kwen.

²⁸ Ra ilek, “Angwenhel man angkep antheynek, yakweth-itwek aynteyel?” Rernem ater-anem irrek, “Nthakenh Akngeyel anwenhingkerr angwenhileyel?”

²⁹ Apmer Canaan-warl rernem alpek, rernem aynikw ikwer-rnem-kenh angka ilek-ilek iley-alpek ikwer-warl. ³⁰ “Egypt-areny Atyetyartel anwenhingkerr artwa ahelengkw-arrpantey arey-ayntek, apmer arlwarrernerl-anenty-arrpantey. ³¹ Anwingkerr renh ilek, ‘Anwingkerr artwa mwerr-rneman ahelengkw-wenyarl. ³² 12-an anwingkerr anekan, artwamp anyent-kenh-antey. Akelyan artwamp anwekingkerrenh-itwek anerl-anem Canaan-itwek. Anyent ingweran ilwekarl.’

³³ Atyetyartel anwenhingkerr itwengetilekan, ‘Alerl atha arrenhingkerr iterl-arey-tangkwel, artwa ahelengkw-rneman. Atyetyart Pharaoh iteth aneyel-apeny, arringkerr apmer nhel anetyek, aytey arrekingkerrenh ra apetyeyek-awaty. ³⁴ Arringkerr aytey arrekingkerrenh-akert apey-alpetyek, atha arrenhingkerr iterl-aretyek, arringkerrarl artwa mwerr-rnem, ahelengkw-weny.’”

³⁵ Rernem yakweth-rnem altywerilek. Rernem arek man ingkerrenh ayntenty. Rernem aterirrek, aynikw aterirrek arrpemarl. ³⁶ Jacob-el alerikw-rnem ilek, “Arringkerr awey atyen h atyeng-they rakek. Joseph-an arrangkw, Simeon arrangkw arrpemarl. Arringkerr ilkelheyel Benjamin raketyek arrpemarl, alakenh irrwernek?”

³⁷ Reuben-el aynikw ikwerenh ilek, “Ayeng Benjamin-weny arrangkw apey-alpenty, ntwa

aler atyenh-atherr ipmek atwem. Atha renh arntarnt-aretyek, akngey-alpem innga.”

³⁸ Jacob angkek, “Benjamin, alerey akely atyehan atha nthakenh Egypt-warl thweney-angenh, alerey atyeh arrwekel ilwek-ketyarl. Alerey anyent-anem atyeh impen-antey, nthakenh tyarlewey-angenh ra alhetyek. Ayeng ikwer amperrngirrerl-anekerr, arringkerr renh akngentyan.”

43

Rernem alheyel apmer Egypt-warl, amern inetyek

¹⁻² Aherrety atherrk lyapey-angenh, aherrety innganem ayntek, kwaty rntwey-angenh arrangkw-anem. Ntang-rnem arrangkw-anem irreynenh, Jacob-kenh apmer-itwekan. Ntang-rnem ywerrek-anem. Amern-weny arrangkw-anem anenh. Jacob-el renh-rnem angkep-antey ilanthek ntang akngerr-rnem inerl-alpetyek. Arringkerr alhenherr-arey ntang akngerr-anem inerl-alpetyek.

³⁻⁵ Judah angkek, “Atyetyartel ilek aytey anwekingkerrenh anwingkerr akngeynentyelant, anwenhingkerr amern ntang akngerr anthem. Benjamin anwingkerr akngentyelant mwerr. Anwingkerr ikwer-weny alhentyan arrangkw wenh!”

⁶ Jacob-el renh-rnem ilek, “Arringkerrarl Atyetyart renh ilek, arringkerr irrwernek-anem aytey arrekingkerr. Arringkerr ikwer-warl iley-angenh menty aynteyek-anek.”

⁷ Rernem renh ilek, “Angka akngerr inngel anwenhingkerr ra ayernekan wenh! Nga iteth-antey anentyek, alerengkw ngkwenh ingwer apek anentyek. Anwingkerr ikwer arraty-antey ilelhek. Anwingkerr iterl-arey-angenh-antey rarl anwenhingkerr ilanthetyek aytey anwekingker-renh akngey-alhetyek ikwer-warl.”

⁸ Judah aynikw ikwerenhek angkek, “Menty anwenhingkerr tyarlewa! Amern-weny-kety angayakw irrekerr. Atha renh arntarnt-aremel akngey-alpem apmer-warl. Menty renh tyarlewa anwingkerr alhetyek. ⁹ Ingwerel-rnem renh atwentyan, ayenh anyentant-anem ntwa ileman, athan renh atnwenhek-penh. Ra ilwentyel, ntwa ayenhan-anem iley-ayntem. ¹⁰ Arlta rlwethirreyneyel-kety, anwenhingkerr tyarlewa. Anwingkerr annangelheyel-kety. Alakenh-apenyel apmer ikwerel-anem aney-areny.”

¹¹ Jacob-el renh-rnem ilek, “Atyetyart ikwer ampwal ilek-ilek akngenherr-arey apmer, nhenh-areny, ngkwarl arwengalker amern-rnem-then ampwal ilek-ilek-rnem-then. ¹² Man-then akngenherr-arey, apalelarl ingwerentyel yakweth-warl arrernekk, antheynenherr-arey, ra anwenhingkerr ayntarrp-ilekerr anyelkel-inenty-arrpantey. ¹³ Benjamin ikngwerl-alhenherr-arey, arringkerr alhemelant-anem. ¹⁴ Arringkerr Akngey rlterrk ilkwakert ayernetyek, ra arrenhingkerr arntarnt-aretyek, atyetyartel aytey arrekingkerrenh tyarlewetyek.”

¹⁵ Awayenheng-rnem Egypt-warl anperl-alhek, ampwal ilek-ilek-akert, renh-rnem-

akert ayteyikw-anem ikweren-h-rnem-kenh-then.
16 Joseph-el renh-rnem arnarek Benjamin-akert. Warrkenh ikweren-h ilanthek, “Artwa yanh-rnem apmer atyen-h-warl atnwenha, aker-anem ikwer-rnem atwemel, anwantherr ingkerrenh aker arlkwetyek.”

17 Warrkenhel artwernem Joseph-kenh warl-warl atnwenhek. **18** Rernem iterrek, “Man yakweth-itwel aytenthel-antey anwingkerr irrw-ernek Atyetyart ra apek anwenhingkerr anterkwemel tyayl-warl akwernem apek, tangkey-anem rakem apek.”

19 Rernem Joseph-kenh apmer-warl alhek artwa warrkenh-warl ilelhey-alhek. **20-21** “Anwingkerr ingwer-inger-antey apmer nhewarl apetyek, man irrkaty renh-antey anwingkerr yakweth-itwek arek, nhenh-anem anwingkerr akngey-alpek Atyetyart renh anthetyek. **22** Man akngerr-akert anwingkerr apetyek ntang payemeletyek. Anwingkerr man ingwer yhanhan iterl-arey-angen-h-antey, yakweth-itwek aynterl-apenh.”

23 Warrkenh angkek, “Kel mwerr, Akngey arrekantherrenh ra apek arrernek man atyen-h nhenh-anteyarl.” Warrkenhel Simeon ikwer-rnem-warl atnwenhey-alhek.

24 Warrkenhel renh-rnem Joseph-kenh warl-warl atnwenhek, kwaty renh-rnem anthemel kwatyle-anem ingkernem lhewelhetyek. Warrkenhel tangkey atherrkel wantek, kwatyle-anem anthwengilek. **25** Ampwal rernem Joseph ikwer tywenek, renh anthetyek.

²⁶ Rernem apmer ikwerenh-warl alhek. Ampwal-rnem-anem rernem Joseph renh anthek, kwenirremel. ²⁷ Joseph-el renh-rnem ayernek, “Mwerrang arringkerr? Artwa ampwalew arrekingkerrenh? Iteth-antey ra aneyel?”

²⁸ “Kel, ra mwerr-antey aneyel.” Rernem Joseph ikwer tyernek kwenirremel.

²⁹ Joseph-el ayteyikw ikwerenh akely arek, rap renh-rnem ayernek, “Nhenhang aytey arrekingkerrenh ran? Artwa nhenhang aytey arrekingkerr ran, arringkerr renh atyeng-warl ilenhan.” ³⁰ Ra kwen-warl aylpenhek Benjamin-ek amperrngirremel-anem artney-alpek.

³¹ Inngerr lhewelhek-penh, ra ikwer-rnem-warl angkep alpek. Ra warrkenh ikwerenh-rnem ilanthek, “Amern-rnem akngetyenher-arey artwa yanh-rnem-warl.”

³² Joseph taypel anyentel anenh, ament-areny. Awayikw-rnem taypel ingwerelarl anek. Egypt-areny-rnem taypel ingwer-itwek arrpemarl anenh. Rernem arlkarirrenh Hebrew-rnem-itwek amern arlkwekerr. ³³ Joseph-kenh warrkenh-rnemel awayikw-rneman ilek, rernem akert-arrayt arrernalhetyek ingkerneny-they arrwekelenyek-atwety. Awayenheng rernem ywarn iterrek ilekek ra rnkerneynek arrayt-angkwarr, ra iterl-arentyel apek. ³⁴ Warrkenh-rnemel amern akngerr renh-rnem anthek. Benjamin renh amern akngerr innga anthek ingwer-rnem-angkwarr, ngkwarl-anem rernem antywemel tyenkerr-anem amern akngerr arlkwemel.

44

Joseph-el awayikw-rneman arrkerneyel

¹ Joseph-el warrkenh-rnem ilek, “Yakweth-rnem-warl amern arriwek-atwety arrernerrarey. ² Man-anem yakweth ingwer-warl arenherr-arey irrkwa thilp-penh antywey-angker yhanan ayteyikw ikweren-h-rnem-kenh yakweth-warl arrerna.”

³ Ingwepenh artwernem tangkey-akert alhek. ⁴⁻⁵ Artwernem arrerenty-antey alpenh, Joseph-el warrkenh ikweren-h ilanthek, “Anterrkwetyek alha. Anterrkwentyelan renh-rnem ayernem, ‘Angwenhel irrkwa thilp-penh antywey-angker atyen-h anyelkel inek irrtywerremel? Nhenh ikweren-h impen inngarl antywey-angker, akaltyiley-angker ikweren-h, ngangker-apeny. Arringkerr apmwel-areth mpwarek, ampwal atyen-h anyelkel inerl-alhemel.’”

Warrkenhel inngantey renh-rnem arey-alhek angath-antey alperl-anenty. ⁶ Ra renh-rnem ayernek Joseph-elarl renh ilek-angkwarr. ⁷ Awayenheng-rnem ilelhek, “Arrangkwarl anwingkerr, ampwal anyelk iney-angenh yhanan. ⁸ Anwingkerr man angkep antheynek Canaan-itwek. ⁹ Arentyelan irrkwa thilp-penh antywey-angker yakweth ingwerenty-kenh-itwek ntwa renh atwemarl. Ingwer-rneman anwingkerr warrkenh-anem ngkweng irrem-anem.”

¹⁰ Warrkenhel ilek, “Anyent ingweran atha aletharl anterrkwem, warrk ilkwa anthaynteyek. Ingwer-rnem atha tyarleweman.”

¹¹ Awayenheng-rnem yakweth ikwerenh-rnem-kenh ahern-warl arrernek, altywerilemel.
¹²⁻¹³ Joseph-kenh warrkenhel yakweth-rnem areynek, arrwekeleny-they ingkern-penhek-atwety. Benjamin-kenh yakweth-itwek ra irrkwa thilp-penh antywey-angker ra renh arek, yakweth Benjamin-kenh-itwek. Awayikrnem ikwer amperrngirrek. Ampwal-rnem ingkerrenh tangkey-rnem-warl tywenek angkep-antey tawen ikwer-warl-anem.

¹⁴ Awayenheng-rnem Joseph-kenh apmer-warl alhek. Rernem Joseph-itwek kwenirrey-alhek.
¹⁵ Ra renh-rnem ayernek, “Ilekek arringkerr anyelkel inetyek arrkernelheyel, athan iterl-areyelarl?”

¹⁶ Judah angkek, “Ilek-angkwarr angketyek iterl-arey-angenh. Akngeyel Iwewarrernek, anwingkerr apekarl apmwangkwarr mpwarek. Anwingkerr warrkenh ngkwenhan anayntem irrkwa thilp-penh antywey-angker anyelkel inek warrkenh inngan ngkwenh anayntem.”

¹⁷ Joseph-el renh-rnem ilek, “Athan nthakenh arrenhingkerr anterrkwey-angenharl. Anyent renh atha anterrkweman irrkwa thilp-penh ra anyelkel-inekant.”

¹⁸ Judah alhek Joseph-warl, angkey-alhek, “Ngan Atyetyart ilkwa Pharaoh-apeny. Anwekingkerr ahelirrey-angenh-antey. ¹⁹ Ntwa anwenhingkerr ayernek artwamp anwekingker-renh iteth-antey anentyek aytey anwekingker-renh apek anentyek. Anwingkerr ngenh ilek, aynaynwekingkerrenh artwa ampwanemanarl.
²⁰ Artwa ampwantey ra anenh Benjamin ra

atnyenek-angkwarr. Benjamin-kenh awayikw ilwek-anem. Artwa akely ra anyent impen-antey, ingwerarl ilwek-kety. Aynikw ikwer anyentekant arlkwenteyel.

²¹ Ntwa anwenhingkerr ilanthek, ‘Artwa akely akngetyay nhenh-warl, atha renh aretyek.’

²² Anwingkerr ngenh ilek, ‘Aynaynwekingker-renh ilwemarl, Benjamin attwentyelan.’ ²³ Ntwa anwenhingkerr ilek, ‘Aytey arrekingkerrenh arrangwelan, nthakenh arringkerr atyeng-warl apetyey-angenh.’ ²⁴ Anwingkerr apmer-warl alpek artwamp anwekingkerrenh iley-alpek.

²⁵ Artwampel anwenhingkerr ilanthek, ‘Ntang akngerr-antey inerl-alpetyek, apmer Egypt-itwek.’ ²⁶ Anwingkerr nthakenh Egypt-warl angkep alpey-angenh aytey anwekingkerrenh-wenyant. Atyetyartel anwenhingkerr irrenteyelantarl aytey anwekingkerr anwingkerr akngetyey-angenh-they.

²⁷ Anewikw anyentel awey-atherr atnyenek rarл ikwer-atherrant ilkelhenh. ²⁸ Anyent ywerrek aleth-antey arey-angenh apey-alpey-angenh. ²⁹ Akngey anwekingkerrenh iterreyel atnwenth ahelengkwel artwa akely arlkwentyek-athen. Artwampel anwenhingkerr ilek, ‘Arringkerr artwa akely atyeng-they akngenty, ayeng ilwemarl-anem.’

³⁰ Alakenhaym-kety artwamp anwekingkerrenh-warl anwingkerr artwa akely akngeynem.

³¹ Artwamp anwekingkerrenh ilweman artwa akely anwekingkerr-angkwarr apey-alpey-angenh-kety. ³² Atha artwamp renh ilek atha

artwa akely renh apmer-warl iwerl-alhey-angenh. Atha artwamp renh ilek, ‘Atha artwa akely akngey-alpem. Arrangkwelan ntwa ayenh iterl-ara!’

³³ Ayeng nhel anem ngkweng warrkirr-ayntetyek. Artwa akely yanhan alpeman artwamp ikwer ywarn iterrerl-anekerr Ayeng nthakenh alpey-angenh artwa akely iwerl-alhemel apmer nhenh-itwek. ³⁴ Ayeng ilkelhey-angenh akngey atyenh atha aretyek amperrngir-renty artwa akely ikwer.”

45

Joseph-el awayikw-rneman arrkerneyel

¹ Joseph ra artnenh-anem. Warrkenh ikwerenh-rnem ra ilek, “Aketh-warl tyerrelhenherr-arey!” Awayenhang rernemant-anem aneyelpak. Ra ikwer-rnem-warl ilelhek-anem, “Ayeng Joseph-arl.” ² Joseph artewentyel-anem artnek. Egypt-arenyel renh awek. Rernem ikwer angkerrenh-anem.

³ Joseph-el ayteyikw ikwerenh-rnem ayernek, “Artwamp ra iteth-antey aneyel?” Rernem renh tyerney-angenh akatemel anek aterirremel.

⁴ Joseph angkek, “Arrer-apeny apetyenherr-arey!” Rernem ikwer-warl arrer-anem alhek. Joseph ilelhek ikwer-rnem, “Ayeng aytey arrekingkerrenh. Awank-akerr arringkerr ayenh tharlemilek Egypt-areny-rnem-warl. ⁵ Atyeng iterrey-angenh ayengarl arleng-alenty ywer-rekek. Akngeyel ayenh arrwekel ilanthek, ingwer-rnem itethilerl-apayntetyek. ⁶ Aherrety

atherrel kwaty rntwey-angenh. Aherrety 5-pelel artwerrety arrpemarl, kwaty rntwey-angenh ar-rangkw arrpemarl. Nthakenh ingwerentyel amern rnkerney-angenh arrangkw, akwetyey-angenh arrangkw. ⁷ Akngeyel ayenh arrwekel thwenek, arrenhantherr atha arntarnt-aretyek, amern-wenyel arrantherr ingkerrenh ilwekerr.

⁸ Arringkerr ayenh ikngwey-angenh apmer nhenn-warl. Akngeyelarl ayenhan thwenek, apmer Egypt-warl. Ra ayenh Atyetyart arrernek, Pharaoh-kenhek-rnem, ayeng Atyetyart anetyek apmer Egypt-itwel. ⁹ Arringkerr anamerl alpenherr-arey akngey-warl iley-alpetyek, Akngeyel ayenh arrernek, Egypt-areny ingkerrenhek, atyetyart anetyek. Anamerl-antey akngey akngeynetyek. Akngey atyenh arringkerr iley-alpetyek. ¹⁰ Apmer Goshen-itwek arrer-antey atyeng-itwek anetyek! Alerengkw-rnem-then, arreng ngkwenh-rnem-then artartey ngkwenh-rnem-then aypmenh ngkwenh-rnem-then atnwenth ngkwenh-rnem-then ampwal-rnem-then ingkerrenh-antey. ¹¹ Atha arrenhantherr arntarnt-arem apmer Goshen-itwek aherrety 5-pelek-atwety. Canaan-itwek arringkerr anentyan atnwenth-rnem-akert arrantherr ilwemarl amern-wenyel.

¹² Benjamin-akerr arringkerr iterl-areyel, wetharl ayeng arrekingkerr ilelhek, ayeng Joseph inngarl. ¹³ Akngey atyenh arringkerr iley-alpenherr-arey, ra ayenh iterl-aretyek arrpemarl, ayeng Atyetyart ilkwa Egypt-itwek aneyel. Arringkerr anamerl atyeng-warl akngetyenherr-arey.”

¹⁴ Joseph-then Benjamin-then ratherr artnemel atnyenerrek. ¹⁵ Joseph-el awayikw-rnem arrwantyeynek, anyentarl-anyentarl, ikwerenh-rnem-itwek artnek-anem. Ikwer-penhan rernem angkanem angkerrenh.

¹⁶ Pharaoh-el awek Joseph-kenh awayikw-rnem apetyek. Ra ikwer-rnem inkwerelhek, atyetyart ingwer-rnem inkwerelhek arpemarl. ¹⁷ Pharaoh-el Joseph renh ilek, “Awayengkw-rnem ila, rernem ampwal-rnem tangkey-rnem-warl tywenetyek, rernem apmer Canaan-warl alpetyek. ¹⁸ Ila renh-rnem, rernem aynaynwekingkerr-then ikngwerl-alpetyek apmer nhenh-warl, ikwerenh-rnem ingkerrenh. Apmer mwerr atha renh-rnem anthetyek Egypt-itwek, amern-angketyarr-itwek.

¹⁹ Egypt-areny pakey-rnem akngeynenherrarey ampernem-then anew arrekingkerrenh-rnem-then inerl-alpetyek. Artwamp ikwerenh-rnem-kenh-then akngetyetyek apmer ikwer-warl. ²⁰ Ampwal ingwer-rneman mentyarl iwerlelpey ampwal ilek-ilek Egypt-arenyel anthemkety.”

²¹ Jacob-kenh alerikw-rnem awelhek Atyetyart ikwer. Joseph-el pakey-rnem renh-rnem anthek, amern-rnem-then, rernem apmer Canaan ikwer-warl akngeynetyek, atyetyartarl ilanthek-angkwarr. ²² Joseph-el awayikw-rnem arnkwa mwerr-rnem amentew-ament anthek. Benjamin arnkwa 5-pel anthek thilp man akngerr-then. ²³ 10 tangkey ra thwenek ampwal Egypt-areny ilek-ilek-akert, aynikw ikwerenhek.

Tangkey 10-pel ingwer-rneman amern ilek-ilek-akert, alethek-arelh. ²⁴ Joseph-el renh-rnem ilek, “Ampep-itwek ahel ilterrey-angenh! Mwarrant-arey arringkerr alpenherr-arey Canaan-warl.”

²⁵ Rernem ayerrer Egypt-they alpek, aynikw ikwerenh-rnem-kenh-warl, apmer Canaan-warl. ²⁶ Rernem ikwer iley-alpek, “Joseph iteth-antey, anwingkerr arerl-alpek Egypt-itwek, atyetyart renh arrernek apmer ikwer-itwek ra anayntyek.” Artwamp ra iyapelant renh-rnem awek, irrywerremel ilerl-anenty-arrpantey. ²⁷ Rernem artwamp renh ilek ingkerreh-angkwarr Joseph-elarl renh-rnem ilek-angkwarr-antey. Artwamp ra iterl-anem-arek, rarl pakey arekel. ²⁸ Rernem renh ilek, “Arringkerr atyeng arraty ileyel wenh, rarl iteth aneyel. Kel atha renh aretyek, ayeng ilwey-alentyel.”

46

Jacob alheyel Egypt-warl ikwerenh-rnem-akert

¹ Jacob Canaan-they anperl-alhek atnwenth-rnem-akert ampwal-rnem-akert-then. Tawen Beersheba ikwer-itwek, ra tyenkerr anthek Akngeyek, renharl Isaac-el Akngeyek anthek-apeny.

² Ingwa ikwerel-antey ra altyerr-anem arek, INGKARTarl ikwer-warl arlkek, “Jacob-ay, Jacob-ay.”

“Ilekekay?” Jacob angkek.

³ Akngey angkek, “Ayeng Akngey irrkaty-antey akngey ngkwenharl atyeng awelhekarl.

Aterirrey-angenh alha Egypt-warl. Alerengkw-rnem atha akngerrileyenh, alerengkw-rnem akngerr aneyenh, apmer ilenhel. ⁴ Ayeng ngkweng-angkwarz alheyel arrpemarl Egypt-warl. Ngkwenh-rnem atha akngey-alpeyenh apmer nhenh-warl. Alerengkw ngkwenh Joseph ngkweng-itwek aneyenh ilwetyek-atwety.” ⁵⁻⁷ Jacob ikwerenh-rnem-akert Beersheba-they anperl-alhek. Rernem artwamp renh tyweneck pakey-warl, Pharaoh-elarl pakey ikwer thweneck. Pakey ingwer-rnem-warlant anewikw-rnem alerikw-rnem rernem tyweneck. Ingkerrenh-antey rernem alpek Egypt-warl, alerikw ikwerenh-rnem-then arrengey ikwerenh-rnem-then artarteyikw ikwerenh-rnem-then. Atnwenth-rnem rernem akngeynek, ampwalar-nem-then. ...

²⁶ Akngerr inneganem, 66-pel-anem ikwerenh-rnem rernem anperl-alhek, apmer Egypt-warl. Anew ikwerenh-rnem-kenh akngerr arrpemarl. ²⁷ Jacob-kenh arrengeyikw atherr Egypt-ekarl atnyenek-atherr, ratherr Egypt-itwel anenh. Artwamp ikwerenh-rnem 70-pel ikwerenh-rnem anekan ra artwamp-anemarl.

²⁸ Jacob-el Judah arrwekel thweneck Joseph ayernetyek, ra Goshen-itwel rlwatetyek. ²⁹ Joseph pakey-warl nganey-alhek artwamp ikwerenh rlwatetyek. Ratherr rlwatirrek. Joseph-el artwamp renh atnyenek, rarl ikwer amperrngir-rekel.

³⁰ Jacob-el Joseph renh ilek, inkwerelhemelanem, “Kel ayeng ilwetyek arrer-anem. Atharl

ngenh kel iteth-antey arek-penh ayeng alhewer-anemarl ilwetyek. Arwa alhewer ayeng ilwetyek atharl ngenh arek-penh, iteth-antey.” ...

49

Jacob ilweyel

¹ Jacob-el alerikw-rnem akarrilek, anyent-warl ilemel, “Anyentirrenherr-arey ingkerrenh, atha arrekantherr ileyteyk nthakenharl irreyenh, arrantherr iterl-aretyek-awaty.” ...

¹⁰ Jacob-el Judah renh ilek, “Ingkerrenh ngkweng awelh-ayntem nga atyetyart ikwer-rnem anayntem.” ...

²⁹⁻³⁰ ... Jacob-el alerikw ingwer-rnem ilek, “Arrer-anem ayeng ilwetyekan. Irrkaty ikwer-warl arringkerr ayenh akwernetyek, Abraham rarl payemelek Hitt-kenh-rnem-itwek, akngey atyenh-itwek-antey. Intey ra akngerrakwampeny, apmer Canaan-itwek. ³¹ Abraham anew ikwerenh-then-antey intey ikwer arrpemarl akwernek, Isaac-then anew ikwerenh Rebekah-then ikwer-antey arrpemarl akwernek. Leah kelantey atha akwernek arrpemarl. ³² Apmer renhan Hitt-kenh-rnem-itwek payemelekarl intey-akert arrewaly-rnem akwern-ayntetyek.”

³³ Alerikw ikwerenharl ra ilanthek-penh, ra panty-itwek aynterl-arrernek. Ikwer-theyan, ra ilwek-anem, panty ikwerel-antey.

50

Jacob-kenh alerikw-rnemel renh awenng-warl akwerneyel

¹ Joseph ra artnek-anem aynikw-anem attnyenek, arrwantyek. ² Egypt-areny akalty ingkerrenh anek, arrewaly anterel apernetyek. Rernem arlta 40-ek-atwety alakenh-anyem mpwarek. ³ Rernem atnalhelerrenh arlta 70-ek-atwety artwamp ikweran. Joseph-el artwa ilanthek arrewaly renh anterel apernetyek rag-el ataperrelemel.

⁴ Rernemarl amperrngirrek-penh, Joseph Egypt-areny Atyetyart-rnem-warl angkek, "Arrantherr apek atyeng inkwerelhentyan, arrantherr Pharaoh renh ayernenherr-arey. ⁵ Akngey atyenh ilweyew-athath, atha renh alhelek, intey apmer Canaan-itwek renh akwernetyek."

⁶ Pharaoh-el renh ilek, "Akngey ngkwenh akwerna, ntwarl renh ilek-angkwarr-antey akwerne-tyek." ...

¹² ... Jacob-kenh alerikw-rnemel irrkaty-angkwarr mpwarek, rarl renh-rnem ilek-angkwarr-antey. ¹³ Apmer irrkaty Machpelah intey ikwer-itwek-antey Abraham-el Ephron, Hitt-kenh payemelek-itwek, renh akwernek. ¹⁴ Rernemarl atnalhelirrek-penh awayenheng rernem Egypt-warl-anem alpek.

Joseph-el awayikw ikwerenh-rnem ileyel

¹⁵ Aynikw ikwerenh-rnem-kenh ilwek-penhan rernem angkerrenh, "Joseph anwekingkerr ahe-lirrekerr wenh, ra anwenhingkerr atwekerr." ¹⁶ Rernem thwenek artwa angkakert Joseph ikwer-warl. Ra iley-alhek, "Aynaynwekingkerr ilwey-alentyel, wetharl anwekingkerr ilerlelpék,

¹⁷ ‘Arringkerr Joseph ayernetyek, mwarrant-arey arringkerr anetyek, arringkerrarl apmwel-areth ikwer anenh.’” Ra angka awek-penh, Joseph artnek-anem.

¹⁸ Awayikw ikwerenh-rnem ikwer-warl apetyek, angkey-alhemel, “Anwingkerr ngkwenh warrkenh-anemarl.”

¹⁹ Joseph-el renh-rnem ilek, “Aterirrey-angenh. Ayengan Akngey-wenyarl. ²⁰ Arringkerr atyeng ilkelhey-angenh irrek Egypt-areny-rnem ayenh anthemel. Akngeyel ayenh arntarnt-arekarl. Atyeng-angkwarran Akngeyel ikwerenh-rnem arntarnt-arek, itethilek. ²¹ Alakenh-anyemkety arringkerr aterirrey-angenh anetyek. Atharl arrenhingkerr arntarnt-arem, aler arrekingkerrenh-rnem-then. Ikwer-penhan rernem mwarrant-arey-anem anenh.”

Joseph ilweyel

²² Joseph apmer Egypt ikwer-itwek anenh, awayikw-rnem-akert. Joseph aherrety 110 anenh, artwa ampwanem. ²³ Ra Ephraim-kenh arreng-rnem arek, Manasseh-kenh alerikw Makir.

²⁴ Joseph ra awayikw ikwerenh-rnem ilelhek, “Arrer-anem ayeng ilwetyek-anem. Akngeyel anwenhingkerr arntarnt-arem, apmer rarl Abraham ingkerrenh alhelek ikwer-warl, Abraham-ek, Isaac-ek, Jacob-ek.” ²⁵ Rap renh-rnem ilek, “Arringkerr arraty ayenh iletyek. Ayeng iltwenty, arrewaly ayenh aknga Akngeyel arrenhingkerr atnwenheyneyel apmer Canaan ikwer-warl, ikwer-itwek akwernetyek.” Kel rernem renh arraty ilek.

Genesis 50:26

cxiii

Genesis 50:26

26 Joseph aherrety 110 irrekel-anem, ra ilwek.
Rernem arrewaly anterel-anem apernek, rag-el
ataperrelemel, coffin-warl arrernemel.

**Alyawarr Bible
Portions of the Holy Bible in the Alyawarr language
of Australia**

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-11

PDF generated using Haiola and XeLaTeX on 11 Nov 2022 from source files dated 27 May 2022

284d4e02-292d-5bd8-a8a6-8360a307b937